

DXUS YUWE SAN JUAN FXI'JNI

Kristo naa kiwete vxyaani

¹ Nyafxiitey naa kiwe meeiin, Kristo' ũsyã'kh yu'. Txã' Dxus yakhku ũsu', sa' Dxus íçxáak yu'. ² Nyafxiiteya' txã'wêk Dxus yakh ũssa yu'. ³ Dxusa' txã'sna neewe'weçxak kījīhnawa jxuka kvxiitu'j. Txãa pa'ga naa kiwete kījīhwa ũssa' jxuka txajx vxitniçxaçxáata'. Dxus yakh ũssa kījīhnawa vxitmeewaça', kīh yuhwa mee yuutxna. ⁴ Uuçxa ki' itxi yuuwa'ja's txãak ji'phu', sa' txãa íçxáak nasatx eena'te kaafxi'ze'jwa'jsa yu'. ⁵ Txãa eena'sa' çxhi'dxte kweethku, aça' çxhi'dxsa' fxīçxhaya' ājame'.

⁶ Txãa eena'sa's tuuthe'jsa' teeçx piçthē'j Juan yaasesak yu' Dxus kaahni. ⁷ Txã' txãa eena'te kaafxi'ze'jwa'jsa's tuuthe'jsak yu', maawa txajx tuuthe'jni's wēse'jçxa Kristo's ũuste jxpa'gakahn. ⁸ Juan yu' eena'te kaafxi'ze'jwa'jsa meek yu', naasáa eena'te kaafxi'ze'jwa'jsa's tuuthe'jsaçxáak yu'. ⁹ Naapkaçxha' nasatx eena'te kaafxi'ze'jwa'jsa Kristo' naa kiwete vxyaaççxáak yu'. ¹⁰ Sa' vxyaaçxa' naa kiwete fxi'zena ũsu'k. Txã'wētewa, naa kiwetewe'sxa' jiyumeeta', makwe txajx vxitnisaçxawa. ¹¹ Txajx vxitni kiwete vxyaatewa, txajx ji'j jīnisa' jxpa'gameeta'. ¹² Makwe txajx ji'j jīnisa' jxpa'gameetewa, maaíi yu' txã's nwēese'jçxa ũuste jxpa'gatx. Aça' txã'sna jxpa'gasatxi's

Dxusa' txajx luuçx yuuwa'ja's ũsku. ¹³ Txãa pa'ga txãawe'sxa' naa kiwete neywe'sx kakweju kakwe yakh upxhi'tx neywe'sx jxthãasni txã'wēsameeta', txãawe'sxa' Dxus luuçx yuuna pa'jsata'.

¹⁴ Nyafxiitey Dxus yakh ũssa' nasaa kakwe's jxpa'gaçxa kwe'sx yakh ũsu'k, isasaçxá's pta'sxna peeygãhna. Txãa pa'ga kwe'sxa' txajx fxi'zeni wala zhiçxkwesa's uytha'w, txãasa jiitha'w Dxus Nçxi'k teeçxçxáasatewa.

¹⁵ Txã'snak Juana' tuuthe'jna na'jina we'we:

—Adxa' na'snath pta'sxi' i'kwe'sxtxi: Adx e'ste yuja' txã' adx naa kiwete upxmeyna we'sxku yu', txãa pa'ga adxte jxthaakwesa' jina'k pta'sx.

¹⁶ Aça' kwe'sxa' txajx peeygãani makwe ne' yu' txã'sa' jxukatha'w jxpa'ga jxukaysa.

¹⁷ Nyafxi' juuna' jxkaahnisa ley Moises nvxihtku txã'sçxáanatha'w jxpa'ga, naapkaçxha' Jesukristo' isa Dxus peeygãani'sku nuypa'j txã'snatha'w jxpa'ga.

¹⁸ Nawa maa yuhwa Dxusa's iuymeeta'. Txã'wētewa Dxus Nçxi'k teeçxçxáasa Ney yakh ih ũssa' kwe'sxtxi' kaajiyu'kh Dxus ma'wēsatewa.

Jesus kimtewa Juan pta'sxni

(Mt 3.11-12; Mr 1.7-8; Lk 3.15-17)

¹⁹ Jerusalente judiuwe'sxa' pējxya' kaahtx sacerdote vxite' levxitawe'sxtxi Juan kimtewa jiyuya'. ²⁰ Aça' Juana' āatek pta'sx:

—Adxa' Kristomeeth jina'.

²¹ Txajũ' ki'kin pējxtxi:

—Txã'wēçxa' ¿kimga? ¿Txãniitey Dxus yuwe pta'sxsa Elias wá'ga? jite', Juan pasçxa':

—Txã'wěmeeth jĩk.

Aça' ki'kin pějxtxi:

—Dxus yuwe pta'sxsa' pa'jana jĩ'tx txãa wá'ga jĩte':

—Txãameeth jĩnak pas.

²² Txajũ' ki' pějxtxi:

—Txã'wěçxa' idxa' ¿kinga? Idxa' kĩh yũuna fxi'zesaçxawa mpeeta'sx. Txã'wěme', kwe'sxtxi jxkaahsatx pta'sxya' u'jwa'j ji'ptha'w jĩte', ²³ Juan pasçxa':

—Dxus yuwe pta'sxsa Isaiasa' na'jĩnak we'we: Nasa u'pnimée kiwesu sus we'weni pthũusena: Dxus pa'jwa'ja's mpheu'jwe jĩna, nawa adx tu-uthe'jna pekũhwa'ja's pta'sxnak txã'jĩ.

²⁴ Juana's paapějxya' pa'jsa' fxariseowe'sx kaahnisatx yu', ²⁵ sa' ki'kin paapějxtxi:

—Txã'wě Kristomeeth, sa' Eliaswa meeth, sa' Dxus yuwe pta'sxsa pa'jana jĩ'tx txãameeth jĩ'g sa' ¿kĩjxa'çxáaga nasatx yu'te bautisaĩ'? jĩte', ²⁶ Juan pasçxa':

—Adxa' yu'teçxáath bautisaĩ'. Nawa i'kwe'sx ksxavxyte teeçx ũsa' txã'sa' jiimeene'kwe. ²⁷ Txã' adx e'su vxyaana, nawa txã' adxte jxthaakwesa'. Aça' adxa' txajx pelgatxi tudni weşçxáa yuhtxwa khihbxa' āhmeekwesath jĩnak pas.

²⁸ Juana' Jordan yu'wala kuteju sek kãani ju'gu Betábara yaasesatek txã'wě bautisãyna ũsu', aça' kxteetx txã'wě paapějxya' pa'jna ũsu'.

Kristo Dxus kaahni piisxakuẽ

²⁹ Kuskuskhẽ' Juana' Jesus yuhte uyçxa', na'wěk we'we:

—Mthegwe, naaí Dvus kaahni piisxakuẽ', jxukaysa pkaltxi txudewa'jsa. ³⁰ Aça' adxa' txã'sna we'weçxath txã'wẽ pta'sx: Adx e'su teeçx piçthẽ'j vxyaana, txã' adxte jxthaakwesa', txã' naa kiwete adx upxmeyna we'sxku yu' txãa pa'ga. ³¹ Txã'sa' adxíi yuuwa jiimeeth yu' kimtewa. Nawa Israelwe'sx txã's jiyukahn yu'teçxáawa bautisãyna ũsu'th.

³² Juana' ki'kin we'wek na'jĩna:

—Dvus Espiritu's uythu cieluju tub çxihme na'wẽsa Jesus kajkwekhẽ kĩijaçte. ³³ Txã'wõtewa, adxa' nee jiiimée íçxáath yu' kimtewa. Nawa adxa's bautisãyya' kaahsa' pta'sxku: Espiritu's uyuune'ga teeçx piçthẽ'j kajkwete kĩijaçte', aça' txãa piçthẽ'ja' isa Dvus Espiritu's nasaa ũuste kxu'akhe'jsa yuuna jĩnak pta'sx. ³⁴ Aça' açxha' uyçxa', jiyuth Dvus Nçxi'ktewa, sa' txã'snath tuuthe'je'.

Kristo yakh u'jusa nyafxtewe'sx

³⁵ Vxite kuskuskhẽ' Juana' ki' kxtex ũsu'k txãa yakh u'jusa e'zsa yã'jçxa. ³⁶ Sa' Jesus jxkhẽuuçte uyçxa', Juana' na'jĩk:

—Mthegwe, naaí Dvus kaahni piisxakuẽ'.

³⁷ Txã'jĩni's wẽse'jçxa', txãa e'zsa' Jesus e'stey u'jtx. ³⁸ Aça' Jesusa' yu'thegçxa', txajx e'ste yuusatx uyku, sa' na'wẽk pẽjx:

—¿Kĩjke pakwé'? jĩte', txãawe'sx pasçxa':

—Kaapiya'jsa, ¿mteega u'pu'? jĩte',

³⁹ Jesus pasçxa':

—Mejkawe thegya' jĩk. Aça' txãawe'sxa' u'jçxa' jiyutx mtee u'psatewa. Sa' txãa yakh kxtee neeyũutx, kusuçyã'kh yu' naa pa'ga.

40 Juan we'weni's wēse'jçxa Jesus e'stey u'jsa teeçxa' Adresku yaase yu', Simon Pedro nyakh.

41 Aça' Adresa' txajx nyakh Simon khuē'yna nyafxte pta'sxya' u'kh:

—Dxus tasxu yuusa Kristo jīni's yuutha'w uy jīna.

42 Txajū' Adresa' txajx nyakh Simona's pe'jna kūjk Jesus ūsnite. Aça' Jesus uyçxa' na'jīk:

—Idxa' Jonas nçxi'k Simon yaaseg, nawa āçxha' Cefxas yaseni neeyūune'ga. Cefxas yu', Pedro jīni'.

Fxelope, Natanaelwe'sxtxi Jesus pa'yani

43 Vxite kuskukhē' Jesusa' Galilea kiwen u'jweççxa', Fxelope's uyçxa':

—Adx yakh myuh jīnak pi'kx.

44 Fxelope yu', Beçaida çxhabte u'psak yu', Adres Pedrowe'sxwa txāa çxhabteywe'sxtxi yu'.

45 Aça' Fxelope' Natanaela's pta'sxya' u'jçxa' na'jīk:

—Moisesa' teeçx piçthē'ja' vxyaana jīnak fxi'j ley librute, aça' Dxus yuwe pta'sxsa txāniiteywe'sxwa txā'snaíçxáatx tuuthe'jna fxi'j txā'stha'w kwe'sxa' puutx uy. Txāa piçthē'ja' Jose nçxi'k Jesusa', Nasaret çxhabtewe'sxa' jīte',

46 Natanael paşçxa':

—Nasarette', ¿maaçxá' nasa ewsa kasejxa' ājama'k? jīte', Fxelope paşçxa':

—Mejka wakx thegya' jīk.

47 Txajū' Natanael utxaana kūjuçte Jesusa' uyçxa', na'jīk:

—Naa piçthē'j yuuçxa' Israel nwe'sx jxpub-asamée nasa ewsa yuh yu'ga.

⁴⁸ Txã'jïte', Natanaela' pëjxku:

—¿Ma'wë yuuçxaga adxa's jiyu? jïte', Jesus pasçxa':

—Fxelipe pa'yameyna, idxa's uythu higwera fxtüu tasxte u'pte jïte', ⁴⁹ Natanaela' na'wëk pas:

—Idxa' Dxus Nçxi'kgu, Israelwe'sxtxi jxkaahsa jïte', ⁵⁰ Jesusa' na'jïk:

—Txã'wë higwera fxtüu tasxte u'pte idxa's uythu jïteçxáa ¿adx kintewa jiyuwá'ga? Txã'wëyã'jçxa', naajÿyã'ja' Dxus kaavxya'ja'jnïtx wejx walasatx uyuune'ga jïk.

⁵¹ Sa' ki' we'weçxa':

—Adxa' isath we'we': cielu phaateçxa ùste', Dxus angeleswe'sxa' kïhna tejkana ùste uyu-une'kwe Dxus Nçxi'k Nasa Yuusáa kajkwekhë jïk.

2

Kaná çxhabte ptamunisa

¹⁻³ Tekh en skhëwniite', Galilea kiwesu Kaná çxhabte ptamusáa ùsu'tx. Aça' Jesuswa pi'kxni pa'jçxa ùsu'k, txãa yakh ih u'jusawe'sx yã'jçxa. Jesus nji'jwa kxtee ùsu'k, naapkaçxha' vxino pçuute', Jesusa's na'jïnak pta'sx:

—Vxino pçuk jïk.

⁴ Aça' Jesusa' na'wëk pas:

—¿Kïh yÿukahnkwe adxa's txã'wë pta'sxi'? adx en yuu ähmeya' jïte', ⁵ nji'ja' kxtee selpisaawe'sxtxi na'jïk:

—Txãa ma'wë jxkaathe', kxtey myÿuwe jïna.

⁶ Kxte' seis kiwe mitxh walasatx ùsu'. Txãa yu' judiuwe'sx khweeçxawa'j yu' awnisatx yu'. Mitxh iisa oçxenta meeçxawa cien litro yu'

khêesatx yu'. ⁷ Txajũ' Jesusa' jxkaakh kxtee selpisaawe'sxtxi':

—Naa mitxhsu jxuka yu' uta mawwe jîte', kxtey yuutx. ⁸ Txajũ' Jesusa' na'jĩnak we'we txãawe'sxtxi': Naa mitxhte le'çxkuẽ pa'kxçxa boda namu's me'jwe yusya' jîte', txãawe'sxa' kxtey yuutx. ⁹ Txajũ' boda namu' tudxçxawa, jiyume' yu'a's txã'wẽ vxino vxitnitewa. Kxtee selpisaawe'sxçxáatx jii yu', yu'a's txã'wẽ vxino vxitnisatewa. Txajũ' boda namu' ptamusa's pa'yaçxa ¹⁰ na'jĩnak we'we:

—Maawa vxino ewsa's khuẽ'ytxi nyafxte yusu' pi'kxnisatx, txãa e'sutx vxino açxamée ewsa's yusu'. Nawa idxa' txã'wẽ yũumée vxino wejx ewsa'sgu nmehte yus jĩk.

¹¹ Jesusa' Galilea kiwesu Kaná çxhabtek txã'wẽ kim yuhwa ãjãnimeesa's kaavxyaj. Txã'wẽ yũuçxak txajx ewuni's khiyu'j, aça' txãa yakh u'jusawe'sxa' jiyutx Jesus kimtewa.

¹² Txãa e'su' Jesusa' Kapernaum çxhabnak u'j, txajx nji'j vxite' txajx nyakhwe'sx, txãa yakh u'jusawe'sx yã'jçxa.

*Dxuus yatte txweyna ùssatx Jesus kasxisxni
(Mt 21.12-13; Mr 11.15-18; Lk 19.45-46)*

¹³ Judiuwe'sx fxiesta Paskua en ãjãçte', Jesusa' Jerusalen çxhabna u'kh. ¹⁴ Sa' dxuus yatte u'kaçxa', bwey, piisxáa, tub çxihmetx txweyna ùstek uy, vxite' vxyuu yu'pthehna ùssatx. ¹⁵ Sa' Jesusa' txã'wẽ yũuna ùste uyçxa', kha'txa pheu'jçxa eka kasxisxku nasa vxite' ni-imaltxi jxuka. Sa' txã'wẽy vxyuu yu'pthehna

ũsni mesatxwa jxuka pũsxku petx vxyu yã'jçxa.

¹⁶ Sa' kxtee tub çxihme txweysatxi' na'jĩk:

—Naatxi' ayjxu jxuka mkaasxisxwe. Adx Tata yatte' txweyna vxyuu yu'pthehna ũswa'jme'.

¹⁷ Txã'jĩte', Jesus yakh u'jusawe'sxa' yajkxtxi Dxus librute na'wẽ fxi'jni's: Dxuus yatte' ewmée yũuni's weh yuhwa peejxmeeth jĩni's.

¹⁸ Txajũ' judiuwe'sxa' ũușçxa we'wenatx pějx:

—Kim jxkaathe txã'wẽ yũușçawa, kwe'sxtxi mpeeta'sx jĩte', ¹⁹ Jesus pașçxa':

—Naa dxuus yata's pěttxtewa, adxa' tekh ente' ki' kiisya' ajãwa'jsath.

²⁰ Txajũ' judiuwe'sxa' iiveeçx we'wena na'jĩtx:

—Naa dxuus yata's kuarenta y seis anxutetx txahna jxã'j, aça' idxa' ¿tekh enteççáa txajxa' ewuudxijíima'g?

²¹ Nawa Jesusa' txajx kakwe'sku dxuus yata' jĩna we'we'. ²² Aça' uuçxa ki' ĩtxi yuute', txãa yakh u'jusawe'sxa' yajkxtxi txã'wẽ we'weni's. Sa' Dxus libru' isane' we'we', aça' Jesuswa isasa's íiççáane' we'we' sũhna ewtxi jiyu.

Jesus nasaa ũus yaakxnitx jiyuni

²³ Judiuwe'sx fxiesta ente Jesus Jerusalente ũste', nasa wala kuh jiyutx Jesusa' Dxus tasxu yuusatewa, txã'wẽ kim yuhwa ajãnimeesa's kaavxya'ja'pha'ga. ²⁴ Nawa Jesusa' txãawe'sx ma'wēsatewa jxuka jiyã'kh yu', txãasak txã'wẽ jiyutx sũju'çmée. ²⁵ Txãa nasa' txã'wēsata' jĩna pta'sxi peejx yu'çme', txãa pa'gatey nasaa ũus yaakxnitx jxuka jiyã'kh yu' naa pa'ga.

3

Jesus, Nikodemo yakh puutx we'weni

¹ Teeçx fxariseo Nikodemo yaasesa u'pu'k. Txã' judiu npiičthē'jsatewe'sxku yu'. ² Txãa piçthē'ja' Jesus tasxte kus pa'jçxa', na'jīk: Ji-itha'w idxa's Dxusne' txã'wē kaah, kwe'sxtxi kaapiya'khan. Dxus pu'çxmeewaça', kim yuhwa ājawa'jsame's kaavxya'ja'jmeena, idx na'wēg yu' txã's jīte', ³ Jesusa' na'wēk pas:

—Isath we'we', maawa ki' upxmeeçxa yu', Dxus jxkaahna ūsnite u'kaya' ājameena.

⁴ Txã'jīte', Nikodemo' na'wēk pējx:

—Nasa iisxyā'jsa' ma'wē ki' upxya' ājakx? Njī'j tutxhte ki' u'kaçxa upxya' ājama'k? jīte', ⁵ Jesusa' pta'sxku:

—Adxa' naa kakwe upxwa'ja's we'we'çmeeth. Maawa Dxus jxkaanite u'ka wēeçxa', yu'te vxite' Dxus Espiritute upxwa'ja'sthu txã'jī'. ⁶ Nasaa kakwe' nasaa kakweteyçxáak upxhi', naap-kaçxha' Dxus luuçxa' Dxus Espiritutek upxhi'. ⁷ Maawa ki' upxwa'ja' jī'th aça' fxiy yuh txã'wē we'we'k sūhna yaakxnu. ⁸ Wejxa'swa ma'wēga susni's wēse'jçxawa, majū yuhte ki' maa dxi'j u'jweçtewa ya'jiyu'çmée, txã'wēyku Dxus Espiritute upxni's ya'jiyu'çmée jīte', ⁹ Nikodemo' jiyuya' ājameeçxa' ki' pējxku:

—¿Ma'wē txã'wē yuja' ki' ya'upxhikx? jīte', ¹⁰ Jesus pasçxa':

—Idxa' Israelwe'sxtxi kaapiya'jsaçxawa, na'wēsa yuutxi' ¿jiimeewá'ga? ¹¹ Isath we'we': Dxus Espiritute upxnisa' wejxa na'wēsaçxá' txã' ma'wēsatewa iuythu sa' jiiçxath txã'jī'.

Nawa i'kwe'sxa' jiyu'çmeei'kwe. ¹² Naa kiwetewe'sxtxi we'wena pta'sxte jiyumeeçxa', ¿ma'wē jiyuki'kwe cielutewe'sxna pta'sxte'?

¹³ Maa yuhwa cielute u'kasa yu' meeta', naasáa cielujũ kīisa yuuçxáa cielute u'kasa', Dxus Nçxi'k Nasa Yuusáa txã' cielutewe'sxa' naa pa'ga. ¹⁴ Dxus Nçxi'k Nasa Yuusa's ēekhē a'kxçxa ki'pni yuuna, Moiseswa ma'wēga nasa u'pnimée kiwete ũsçxa' ul weeswe's fxtũukhē a'kxçxa ki'p txã'wēy, ¹⁵ kxah maawa jxukay txã'sna uyçxa ũuste jxpa'gasa', bagaçxte yuhwa pçuwa'jmée ítxi fxi'zewa'ja's ji'phutxna vxitumée.

Dxusa' nasatx iiméh wala peeygãani

¹⁶ Dxusa' naa kiwete nasatx iiméh wala peeygãhçxa yuuçxáak txajx Nçxi'k teeçxçxáasanawa naa kiwete kaah, kxah maawa txã'sna ũuste jxpa'gaçxa' bagaçxte yuhwa pçumée ítxi fxi'zewa'ja's ji'phukahñ vxitumée. ¹⁷ Dxusa' naa kiwete txajx Nçxi'ka's kaahçxawa, nasatx ewmeete nvxihtxa' kaahme', wejxwa nwe'weya'k kaah. ¹⁸ Maawa Dxus Nçxi'ka's ũuste jxpa'gasa', ewteyã'j neeyũutxna. Nawa txã'wē Dxus Nçxi'k teeçxçxáasana ũuste jxpa'gasame', ewmeeteyã'j neeyũuwa'jsata'. ¹⁹ Maawa ũuste jxpa'gasame', ewmeeteyã'jtx nvxiitni yu', txã'wē eena'sa naa kiwete kīhtewa, ewmeeçxáa yũuna ũsçxa', çxhi'dxteçxáa wejx fxi'ze wēepa'ga. ²⁰ Sa' maawa jxukay ewmeeçxáa yũuna ũssa', eena'sa's ahççxa utxa'çmeeta' eena'te, txãawe'sx ewmée yũuni ãate vxyakahmen. ²¹ Nawa ew yũuna fxi'zesa

yu' eena'sa's utxa'tx, txãawe'sx ew yũuni' Dxus jxkaahnisatewa ãate vxyaakahn.

Jesusa's tuuthe'jni's wēse'jçxa' Juan weçxanũ

²² Txãa e'su' Jesusa' Judea kiwen u'kh txãa yakh u'jusawe'sx yã'jçxa. Sa' kxte' maz en ũsu'k nasatx yu'te bautisãyna. ²³ Juanwa bautisãynak ũsu' teeçx ahte Enon yaasesate Salim utxate, txãa ja'dasu yu' ũsu'k naa pa'ga. Aça' Juana' nasa wala kuh yu'te bautisãyku. ²⁴ Karcelte kxupmeynaçxáak txã'wē bautisãy.

²⁵ Txajũ' judiuwe'sxa' Juan yakh u'jusawe'sxtxi paapējxtxi txã'wē bautisãyni's. ²⁶ Aça' txãawe'sxa' Juana's pta'sxtxi na'jĩna:

—Kaapiya'jsa, mwēese'j. Sek kãani ju'gu Jordan yu'wala kutete ũste pta'sxgu txãa piçthē'jwa ãçxha' bautisãyna ũsa', aça' nasa jxukay txãa yakhçxaçxáa u'jweçta' jĩte', ²⁷ Juana' na'wēk pas:

—Kim yuhwa txã'wē tuuthe'jni yuumeena, Dxus jxkaahnimeesa yu'. ²⁸ I'kwe'sxa' yaçtey adx pta'sxni's jiiyã'ji'kwe: Adxa' Kristomeeth, naasáa txajx yaçte kaahnisaçxáath jĩni's. ²⁹ Naa ejemplo's mjiyuwe: Ptamú ente' novxio' novxia yakhku u'pu'. Aça' novxio namiku' pukate u'pçxa' wala weçxweçxa yaaki'k novxio we'weni's wēse'jçxa. Adxwa txã'wēythu wala weçxweçxa yaaki', Jesusa's tuuthe'jni's wēse'jçxa. ³⁰ Txã' jweeíçxáa tuhthesa yuuna u'jwena, naapkaçxha' adxa' jweeíçxáa ãhmeekwesa yuuwa'th.

Jesusa' cielujũ kũisa'

³¹ Cielujũ kĩisa' maatewa jxthaakwe tuhthesa'. Kiwete ũssa' naa kiwetewe'sxta', sa' naa kiwetewe'sxçxá'stxi pta'sxi'. Nawa cielujũ kĩisa' maatewa jxthaakwe tuhthesa'. ³² Txã'wẽçxaíik txajx wẽse'jçxa uyni's pta'sxi', nawa kim yuhwa nwẽese'je'çmeeta' txajx we'weni's. ³³ Nawa txajx pta'sxni's maaçxáawa nwẽese'jwaça', Dxusa' isak pta'sxi' sũhna jiyuna pa'jatxna. ³⁴ Txã'wẽ Dxus jxkaahnisa' Dxus kwe'we'jni'sku we'we', txã'sa' Dxusa' txajx Espiritu's makwewa ũsu'k txãa pa'ga. ³⁵ Neya' Nçxi'ka's wedxçxa kĩhnawa jxuka txajx kusete nvxihtku. ³⁶ Aça' maawa Dxus Nçxi'ka's ũuste jxpa'gasa' pçumée itxi fxi'zewa'ja's ji'phutxna. Nawa Dxus Nçxi'ka's nwẽese'jsame' pçumée itxi fxi'zewa'ja's ji'phumeetxna, naasáa Dxus kastigo seena'saçxá's jxpa'gawa'jsata'.

4

Teeçx u'y Samariatewe'sx yakh Jesus puutx we'weni

¹ Txã'wẽ Jesus tasxte nasa wejx wala utxaate', Jesusa' Juante jxthaakwe bautisãyni's fxariseowe'sxa' jiyutx. ² Isa yu' Jesusa' bautisã'çme', naasáa txãa yakh u'jusawe'sxçxáatx bautisã'. ³ Nawa txã'wẽ fxariseowe'sx jiyuni's Jesus wẽse'jçxa', Judeajũ kasehna u'kh, Galilea kiwen. ⁴ Nawa Galilea kiwen u'jweççxa', Samaria kiwegak khẽwna u'jwa'j ji'phu'. ⁵ Sa' Samaria kiwesu' teeçx çxhab Sikar yaasesa ũsa' txãa çxhab peeku'thek pa'j txãa yakh u'jusawe'sx yã'jçxa. Txãa Sikar çxhaba' Jakob kiwe ũsku txajx nçxi'k

Jose's txãa utxatek neeyũ'. ⁶ Txãa kiwete' Jakoba' txãniitey yu' kutxi'jni kafx nvxihtna ũsu'ne', aça' Jesusa' ěepxãh wahtxna u'jweççxa', kxteek jxkaaseya' kaçx. ⁷ Naapkaçxha' teeçx u'y Samari-asuwe'sxa' yu' pa'kxya' pa'the', Jesusa' na'jîk:

—Yu' mpeeswe tudxwa'j.

⁸ Txãapkaçxha' txãa yakh u'jusawe'sxa' çxhabna ũ' weyya' u'jnitx yu'. ⁹ Aça' txãa u'ya' na'jînak pas:

—Idxa' judiu nasag, sa' ¿ma'wētega ũ'kwe's yu' thãasu'? ũ'kwe' Samariasuwe'sxthu açuja' jîk. (Judiuwe'sxa' Samariasuwe'sxtxi ahçeçxa we'we'ççxáa yuhwa meeta'.)

¹⁰ Txajũ' Jesusa' pta'sxku:

—Dxusa' kîh ũsya'watewa jiyuçxa txã'wēy yu' thãassa' kintewa jiyuwaça', adxa's yu' thãasune'kwe, aça' adxa' yu' pçuwa'jmeesa's peesu'nja jîte', ¹¹ txãa u'ya' na'wēk pas:

—Naa kafxa' wala dxiaa', aça' idxa' yu' pa'kxwa'j ji'phmeeg. Sa' ¿ma'wēga ũ'kwe's yu' pçuwa'jmeesa's peesu'nja jî'? ¹² Kwe'sx yaçgawe'sx Jakobku naa kafxa's phaade yu' pa'kxwa'j, aça' txajx nçxi'kwe'sxwa kxteetx pa'ki' tajkxtxi yuswa'j vxite' txãawe'sx tudxwa'j yã'jçxa. Aça' idxa' ¿kwe'sx yaçgawe'sx Jakobte jxthaakwe wáa walasane'ga? jîte', ¹³ Jesus pasçxa':

—Jxukay maawa ayte yu'a's tudxsa' yũ'wēena nes yuutxna. ¹⁴ Nawa adx peesni yu'a's tudxçxa', bagaçxte yuhwa yũ'wēemeetxna. Txãa pa'gatey adx peesni yu'a' txãawe'sx ũuste yu'îçh na'wē nes yuuna, pçuwa'jmée îtxi fxi'zewa'ja's ji'phukahn.

¹⁵ Txã'jïte' txãa u'ya' na'jïnak pas:

—Txã'wëte', txãa yu'a's mpees, kxah yũ'wëewame'nja, sa' peena yu' naa kafxte pa'kxya' pa'jme'nja.

¹⁶ Aça' Jesus we'weçxa':

—I'kwe nmi'a's me'jwe pa'yaya', sa' txãa yakh yuweene'kwe ayte' jïte', ¹⁷ txãa u'ya':

—Nmi' ji'phmeeth jïnak pas.

Txajũ' Jesusa' na'jïk:

—Nmi' ji'phmeeth jïçxa' isa yuh we'we'i'kwe.

¹⁸ Txã'wë nyafxii yu' tahç nmi'i'kwe ji'phu', nawa açxwe'sxa' nmi' me', aç'a' isa yuh we'wei'kwe.

¹⁹ Txã'wë wëse'jçxa', txãa u'ya' na'jïnak pas:

—Idxa' Dxus yuwe pta'sxsaï ne'ga sũju'th.

²⁰ Kwe'sx yaçgathë'jwe'sxa' naa vxïçtetx Dxusa's neewe'weya' pkhaakhe'. Nawa judiuwe'sx yu', Jerusalentëçxáa Dxusa's neewe'weya' pkhaakhewa'ja' jï'i'kwe jïte', ²¹ Jesus pasçxa':

—Ew mjiyuwe: naa vxïçte meeçxawa Jerusalentëçxáa Dxusa's neewe'wewa'jme'. Dxusa's mteewa neewe'wewa'j en ãjana.

²² Samariatewe'sxa' Dxusa's ma'wë neewe'wewa'ja'swa jïimeei'kwe. Nawa judiuwe'sxa' jiiçxatha'w Dxusa's neewe'we',

nwe'wesa' judiu nwe'sxa' naa pa'ga. ²³ Dxusa's neewe'wewa'j en ãjana jï'th txãa ena' ãjxã'kh.

Aça' maawa ïsxiiimée ũusuh jxuka yajkxçxa Dxusa's ũusteçxáa neewe'wesa' ew yuutxna, kwe'sx Tata' txã'wë yũuni'sku jxthãasu' naa pa'ga. ²⁴ Dxusa' kwe'sx na'wëy kakwe ji'phme'

na' mtee mteewa ũsa', aç'a' txã'sna neewe'wesa' ũusuh jxuka yajkxçxa neewe'wewa'ja' jïte',

²⁵ txãa u'ya' na'wëk pas:

—Ũ'kwe' jiith Kristo Dxus tasxu yuhna, açá' txãa pa'jçxa jxuka ew pta'sxina jíte', ²⁶ Jesus pasçxa':

—I'kwe yakh puutx we'wena u'psa adxíi Dxus tasxu yuusath jík.

²⁷ Naapkaçxha' txãa yakh u'jusawe'sxa' sx-awedna pa'jtx. Sa' Jesusa' txã'wë txãa u'y yakh puutx we'wena ũste uyçxa', kuh yajkx-natx neeyũ. Nawa ¿kĩjxa'ga txãa u'y yakh puutx we'we'? jĩna maa yuhwa paapëyi'çmeeta'.

²⁸ Txajũ' txãa u'ya' mitxha's kxtee txahna' u'kh çxhabsu nasatx pta'sxya':

²⁹ —Naa kiwete ma'wë fxi'zeni'swa teeçx piçthë'j jiyuk txã'sa' myuhwe thegya'. Txã' Kristo íina jĩna pta'sxte', ³⁰ çxhabtewe'sxa' thegya' u'jtx Jesus ũsnite pa'j. ³¹ Naapkaçxha' txãa yakh u'jusawe'sxa' Jesusa's na'jĩnatx we'we:

—Idxa', ¿wëemeegá'? Pan mẽ' jĩna.

³² Nawa Jesusa' na'wëk pas:

—I'kwe'sxa' jiimeei'kwe adx kĩh ũ'wa'j ji'phtewa.

³³ Txã'jíte', puutx paapëyi'tx txãawe'sx pwe'sx:

—Meeçxa' ¿maa nasa puuçya' kũhwá'ntakx? jĩna.

³⁴ Açá' Jesusa' na'wëk pta'sx:

—Adx Tata jxthãasçxa mjĩiya' kaahni's kxtey yuuniçxáa, adx ũ'ni na'wësa'. ³⁵ Ũ' thë'jwa'j pahz a'tey peejxa' jĩ'i'kwe i'kwe'sxa'. Nawa txã'wëme'. Mjĩinisú mthegwe wakx, jxuka thë'jniyã'j ũsa', açá' pkhakhwa'jçxáa yã'j peejxa'. ³⁶ Pkhakhna mjĩisa' deweni's jxpa'gawa'j

ji'pha', aça' txãa pkhakhnisa' pçuwa'jmée itxi fxi'zewa'jsata', kxah uuhsa' pkhakhsa yakh ja'daçxah weçxweçxa yajkxna neeyũutxna e'zîi. ³⁷ Teeçxsa' uja'k, naapkaçxha' vxite' pkhakhe'k jïni' isa yuja'. ³⁸ I'kwe'sxa' uuhsameei'kwe, nawa adxa' pkhakhya' kaath vxite nasa uuhnisu jîk.

³⁹ Txã'wẽ txãa u'y ũ'kwe ma'wẽ fxi'zeni'swa jxuka jiyuk jïna pta'sxpa'ga, txãa çxhabte nasa kuhsa' Jesusa's ũuste jxpa'gatx. ⁴⁰ Sa' Jesus ũsnite thegya' pa'jçxa', Jesusa's wala neevxisx-atx txãawe'sx yakh kxtee pta'sxna neeyũukahn. Aça' e'z enku kxtee fxi'ze, Dxus yuwe's pta'sxna. ⁴¹ Aça' txã's wẽse'jçxa', Jesusa's ũuste jxpa'gasa' jweeîçxáatx pehna. ⁴² Sa' txãa u'ya's na'wẽtx we'we:

—I'kwe pta'sxniçxá's jiyumée, kwe'sx yu-utha'w txajx we'weni's wẽse'jçxa jiyu Dxus tasxu yuusa Kristotewa, maatxwa jxuka nwe'wesa.

⁴³ Txajũ' e'z en skhẽwniijũ', Jesusa' Samari-ajũ kasehna u'kh Galilea kiweníi. ⁴⁴ Jesusíi we'weçxawa: Dxus yuwe pta'sxsa' maa yuhwa peekx kiwetey yu' wedxni fxi'ze'çmeeta' jîk txãasak Galilean u'j. ⁴⁵ Aça' Galileate pa'the', kx-teewe'sx yu' wala weçxana jxpa'gatx, Jerusalem fxiestan u'jsa' uyne'ta Jesusa' ma'wẽ yũutewa txãasatx txã'wẽ yũu.

Teeçx ãçã'sa's Jesus nuykatxhini

⁴⁶ Jesusa' Galilea kiwete pa'kh Kaná çxhabte, yu'a's vxino vxitku nyafxíi kxtee. Aça' kxtey teeçx piçthẽ'j ũsu'k ne'jwe'sxa's jxkaah pu'çxsa. Txã' teeçx nçxi'k wala ãça'sa ji'phu'k Kapernaum çxhabte. ⁴⁷ Sa' Galileatey Jesus sxawedna pa'jni's

jiyuçxa', txãa piçthê'ja' puutx uyna kühçxa', na'jĩnak pxthaa we'we:

—Adx yatna mejka, adx nçxi'ka's nuykatx-hiya'. Txã'wême', uuçyã'ja' jĩte', ⁴⁸ Jesus pasçxa':

—I'kwe'sxa' adx ãjani's kaavxya'ja'jmeete yu', adxa's jiyumeene'kwe kimtewa.

⁴⁹ Txã'jĩte', txãa piçthê'j yu' na'jĩk:

—Dud myuh, adx nçxi'k uumeyna.

⁵⁰ Txajũ' Jesusa' na'jĩk:

—Yatna sxawedna me'j. Iidx nçxi'ka' katx-hiyã'jçxa ũsa'.

Txã'jĩte', txãa piçthê'ja' Jesusa' isa yuh we'wene' sũhna yatna sxawedna u'kh. ⁵¹ Sa' yatte pa'jaçte', txã'sna selpisaawe'sx pu'thegya' kasehçxa' na'wêtx pta'sx:

—Iidx nçxi'ka' katxhiyã'kh jĩna pta'sxte', ⁵² txãa piçthê'ja' pějxku:

—Adx nçxi'k ãçã'sa' ¿ma'wêga wêtkuẽ' yajkx? jĩte':

—Jũ'na la unatek kakwesek ũçxha jĩnatx pta'sx. ⁵³ Aça' neya' yajkxku txãa oratey Jesusa': Iidx nçxi'ka' katxhiyã'jçxa ũsa' jĩni's. Txajũ' txãa piçthê'ja' Jesus kimtewa jiyuçxa' txajx ũuste jxpã'gak, yattewe'sxwa txã'wêy. ⁵⁴ Txã'wê Judeajũ sxawedna Galileate pa'jçxa ãça'sa's nuykatxhini yakha' e'z usyã'ja' Jesus ãjani's kaavxya'ja'jni'.

5

Treinta y oçxo anxu ãçã'na ũssa's Jesus nuykatxhini

1 Txãa e'su' judiuwe'sx fxiesta en ãjaçku yu', aça' Jesusa' Jerusalenna ki' u'kh. 2 Txãa çxhabte' ïikha'jni yu' ji'phu'tx piisxáa ka'ga'jni vxitx utxate. Txã' Betesda yaase' hebreo yuwete. Æça'sa pa'jçxa ũswa'j tahç ahtek txudeni yu', yat pwa' na'wësa. 3 Kxte' wala kuh aça'sa ũsu'tx, uyya' ãjasamée, çxida puuplesa, vxite' ëseyá' ãjasamée txã'wësatx ũyhasna ũsu', yu' ëseçpkaçxa' kxtee khëeya' sũhna. 4 Txã'wë maa enteya' Dxus angel kïhçxa yu'a's këese'je'k, naapkaçxa' maa yaçte khëjena txã' jxuka katxhiçxak neeyũ' kïh wee ji'phçxawa. 5 Kxteea' teeçx piçthë'j treinta y oçxo anxu aça'na ũssak txkaa ũsu'. 6 Aça' txã'sna Jesus uyçxa' txakwe txaçx aça'na ũste jiyuçxa', pëjxku:

—¿Katxhi wëega'? jïte', 7 aça'sa pasçxa':

—Yu' ëseçpkaçxa' yu'te adxa's akhwa'jsa kim yuhwa meeta'. Adx khëe wëjeçpkaçxa' vxite khuë'y khëje'tx jïte', 8 Jesusa' na'jïnak jxkaah:

—Kiiteçxa iidx pusçxa deeni's tũ'sçxa me'j jïçpkaçxa', 9 naa dudtey txãa piçthë'ja' katxhiyã'jçxak neeyũu. Sa' txajx pusçxa deeni's tũ'sçxa u'kh.

Nawa judiuwe'sx ki'sni ente txã'wë dee pusni's tũ'sçxa u'jweçte uyçxa', 10 judiuwe'sxa' na'wëtx pëjx txãa piçthë'j katxhisa's:

—Æçxa' ki'swa'j ena' aça' txã'wë tũ'sçxa u'juwa'j ji'phmeeg jïte', 11 txãa piçthë'ja' pasçxa na'jïk:

—Adxna nuykatxhisaíik txã'wë jxkaah: Iidx pusçxa deeni's tũ'sçxa me'j jïpa'ga txã'wë tũ'sçxa u'jweçthu.

12 Aça' judiuwe'sxa' ki'kin paapějxtxi:

—Txã'wě jxkaahsa' ¿kimga yu'? jīte', 13 txãa piçthě'j katxhisa' jiyuya' ajame' kim txã'wě nuykatxhitewa. Kxteea' nasa wala kuh ūste', txãa katxhisa' jiimeek yu' maa dxi'j kasehçxa Jesusa' u'thewa.

14 Txãa e'su' Jesusa' dxuus yatte txãa piçthě'j katxhisa's puutx uyçxa', na'jīk:

—Āçxha' katxhgu neeyūu na', naa weete jx-thaakwe nxussa pa'khamen pa'yajkx mfxi'ze, ewmée yūuna u'jumée jīte', 15 txãa piçthě'j u'jçxa' judiuwe'sxtxi pta'sxku:

—Adxna nuykatxhisa' Jesusga yu' jīna. 16 Txãa pa'gath judiuwe'sxa' Jesusa's ahççxa ikh wěe, ki'sni ente txã'wě āça'sa's nuykatxhipa'ga.

17 Txajū' Jesusa' judiuwe'sxtxi na'wěk we'we:

—Adx Tata' naa entewa mjīna ūsa', txãa pa'gath adxwa mjī'. 18 Txã'jīte', judiuwe'sxa' jweeíçxáatx Jesusa's ikh wěena kiite. Txã'wě ki'swa'ja' jīna jxkaahni leyçxá's nwěese'jmée adx Tata' Dxusa' jī'k na' txãawa Dxus na'wěysath jī'ne' sūhçxatx txã'wě ikh wěena kiite.

Dxusa' Nçxi'ka's ĩtxi vxit-ya' ajawa'ja's ūsni

19 Txajū' Jesusa' na'wěk pta'sx:

—Isath we'we', adxa' Dxus Nçxi'kthu, nawa adxçxáa yu' mjīiya' ajame'nja. Adx Tata' ma'wě mjīite', txajx mjīini's thegçxa yuuçxáath txã'wěy mjīiya' aja'. 20 Txãa pa'gatey Tata' adxa's peeygāhçxa txãa kīh mjīiççxawa jxuka pta'sxi'k adxa's. Txãasa āçxh uyi'kwe txāate jweeíçxáa walasatx kaavxya'ja'jana, aça' txāatx uyçxa' i'kwe'sxa' kuh yajkxna

neeyũune'kwe. ²¹ Tata' ma'wēga uusaatx itxi vxitu', txã'wēy adxwa itxi vxitu'nja maatxwa. ²² ãçxha' Tata' yuuwesatx kastigãywa'ja's jxuka adxçxaçxáanak nvxiht, txãasa ãçxha' yuuwesatx kastigãywa'ja's Tata' kim yuhtxwa thegwa'jsame'. ²³ Tata'swa ma'wēta nwēese'je', txã'wēy adxnawa jxukaysa nwēese'khanku txã'wē yũu. Adxna nwēese'jsame' adxna kaahsa Tata'swa nwēese'jsameeçxa txã'wē yuutxna. ²⁴ Isath we'we': Maawa adx pta'sxni's jxpa'yajkx wēse'jçxa adxna kaahsa's ũuste jxpa'gasa', bagaçxte yuhwa pçumée itxĩ fxi'zewa'ja's ji'phutxna. Txã'wē yũusa' ewmeete nvxiitni yuumée, uuwa'ju kutxi'jçxa bagaçxte yuhwa pçumée itxi fxi'zewa'the nvxiitnisa yuuna. ²⁵ Isath we'we': Pçumée itxi fxi'zewa'j en pa'jana jĩ'th txãa ena' ãçxhíia'. Aça' uusaawe'sxa' Dxus Nçxi'k we'weni's wēse'jçxa kxtey yuusá' itxi fxi'zewa'ja's ji'phutxna. ²⁶ Txãa pa'gatey adx Tata' itxĩ vxit-ya' ãjãwa'ja's ji'pha', sa' adxnawa ũsku txã'wē itxi vxit-ya' ãjãwa'ja's. ²⁷ Sa' yuuwesatx kastigãywa'ja'swa adxa'síiçxáak ũs, adxa' Dxus Nçxi'k Nasa Yuusath naa pa'ga. ²⁸ Txã'wē Dxus Nçxi'k we'weni pthũuseté', uusaawe'sxa' pedaniijũ kasehwa'j en pa'jana jĩna pta'sxte', fxiy yuh we'we'k sũhna yaakxnuwe. ²⁹ Txãa en ãhte', uusaawe'sxa' pedaniijũ itxi yuuçxa kasejetxna, ew yũuna fxi'zesa' ewte u'jya', naapkaçxha' ewmée yũuna fxi'zesa' ewmeete u'jya' itxi yuutxna.

Jesus kimtewa kaajiyu'jsa

³⁰ Adxçxáa yu' kījxa'wa ājame'nja. Adx Tata jxkaatheçxáath yuuwesatx kastigaĩ'. Adx ũuste peekxçxáa yajkxçxa txã'wē yu'çmeeth, txāasa adx kastigāyni' isasata'. Adxna kaahsa ma'wē jxthāaste' txāaçxá'sthu kxtey yu'. ³¹ Adx ma'wēsatewa kimwa pta'sxwa'jsa ji'phméé peekxçxáa txã'wēsath jīte', isa yuhna sūhwa'ja's ya'ji'phu'çme'. ³² Nawa txã'wē ājawa'jsa yuja' jīna adx ju'gu we'wesa ũsa', aça' adxa' jiith txajx we'weni' isasa yuja'. ³³ I'kwe'sxa' Juan tasxte paapējxya' kaaji'kwe, aça' txã' isa yuh pta'sxku adx kimtewa. ³⁴ Adxa' naa kiwetewe'sx adx ju'gu we'weni's peejxmeeth. Nawa i'kwe'sxa' Juan pta'sxni's jiiyā'jçxa', thēymée ewte neeyūuwa'ja's pakwekahnçxáath txã'jī. ³⁵ Juana' eena'te kaafxi'ze'jwa'jsa's tuuthe'jsak yu', aça' i'kwe'sxa' wa'lmée i'kwe Juan pta'sxni's jxpa'gana ũsu' maz ençxáawa. ³⁶ Nawa adxna tuuthe'jna isa pta'sxsa yu' mazwa ji'pthu, Juan pta'sxnite jxthaakwesa. Adx mjīini' adxna tuuthe'jna isa pta'sxsata'. Na'wē mjīith nawa adx Tata jxkaahniçxáatxthu txã'wē yu', Dxus kaahnisa yuh yu'ne' sūjkahn. ³⁷ Txã'wēy adxna kaahsawa isak pta'sxi' adxa's tuuthe'jna. Txã'wētewa, i'kwe'sxa' багаçxte yuhwa txajx we'weni's iiwēse'jmeene'kwe, sa' txã'sa' iiuuywameene'kwe. ³⁸ Sa' txajx kaapiya'jni'swa i'kwe'sx ũuste ji'phmeene'kwe, txāasa i'kwe jxpa'gaya' ājā'çméé, adxa's Tata kaathewa. ³⁹ I'kwe'sxa' jxpa'yajkx i'kwe leeĩ', pçumée itxĩ fxi'zewa'ja's ji'phuya'. Aça' txāa libru' adxa's pta'sxsaíçxá'. ⁴⁰ Makwe txã'wēçxawa, i'kwe'sxa'

adx tasxte utxa'çmeei'kwe ïtxi fxi'zewa'ja's ji'phuya'.

⁴¹ Naa kiwete nasa adxa's tuuthe'jni's jxthãasu'çmeeth. ⁴² Adxa' i'kwe'sxtxi ew

jiith, i'kwe'sxa' Dxusa's wedxi'çmée i'kwe.

⁴³ Tata kaathe' yuwe'th, nawa i'kwe'sxa' adxa's jxpa'ga'çmée i'kwe. Nawa Dxus kaahnisamée vxite pa'jwaça', txãa yu'sa' jxpa'gane'kwe.

⁴⁴ ¿Ma'wē yũuçxa adxa's jxpa'gaya' ãjaki'kwe, nasaa pwe'sx puutx ew tuuthe'jniçxáana jxthãasçxa, Dxus teeçxçxáasa tuuthe'jni yu'sa' jxpa'gameeçxa'?

⁴⁵ Adx Tata tasxte i'kwe'sxtxi ewmée yuwe ũswa'jsana sũjuwá'kwe adxa' txã'wēmeeth. Txã'wē i'kwe'sx ma'wēsatewa

adx Tata tasxte pta'sxsa' Moisesiçxá', i'kwe'sx nakwe wala ewçxáa we'we'i'kwe txãa. ⁴⁶ Moises

we'weni's jiyuwaça', adxa's jxpa'gane'kwe, Moisesa' adxnaíçxáak tuuthe'jna fxi'j naa pa'ga.

⁴⁷ Nawa txajx fxi'jni's jxpa'gameeçxa', ¿ma'wē adx we'weni's jxpa'gaya' ãjaki'kwe?

6

Cinko mil nasatx Jesus sã'jĩni

(Mt 14.13-21; Mr 6.30-44; Lk 9.10-17)

¹ Txãa ensu' Jesusa' Galilea ïkh kuten u'kh, txãa ïkha's Tiberias jĩ'tx. ² Txã'wē naa kiwete

kim yuhwa vxit-ya' ãjanimeesa's kaavxya'ja'jna ãça'satxwa nuyçxhãçxhapa'ga, nasa wala kuh pkhaakhena Jesus e'stey u'jtx. ³ Aça' Jesusa' thã'j vxiçna u'jçxa kxtee kaçxku txãa yakh

u'jusawe'sx yã'jçxa. ⁴ Txajũ' Judiuwe'sx fxiesta Paskua en ãjaçku yu' txãa ensu'. ⁵ Aça' nasa

wala pkhaakhena yuhte uyçxa', Jesusa' Fxelipe's na'jĩnak pẽjx:

—¿Mtee ũ' weyuukxtha'w nasa jxukaysatx puuçwa'j?

⁶ Nawa Jesusa' Fxelipe ma'jĩtewa jiyuya'çxáak txã'wẽ pẽjx, ma'wẽ yũuwa'ja'swa jxuka ji-iyã'jçxawa.

⁷ Aça' Fxelipe' na'wẽk pas:

—Dos cientos peso pan weyçxa jxukaysatx pe'ltedeçxa peesu'swaçwa, ãhmeena jĩte', ⁸ Jesus yakh u'jusa Simon Pedro nyakh Adresa' na'wẽk pta'sx:

⁹ —Ayte teeçx kuẽ e'z wedx taç cebada pan ji'phsa ũsa'. Nawa kxazçxáasa yuja' ¿ãhma'k? jĩte', ¹⁰ Jesusa' txãa yakh u'jusawe'sxtxi': Mkaaçxi'jwe jxukaysatx jĩnak jxkaah. Aça' cinko mil piçthẽ'jsa kxaazkuẽesay txaksu kaçxna skhẽwtxi. ¹¹ Aça' Jesusa' pantxi' jxpagaçxa', Dxusna weçxana'wa txãa yakh u'jusawe'sxtxi ũsu'sku. Aça' txãawe'sxa' kxaazkuẽesaytxi puuçna skhẽwtxi subapkaçx. Wedxnawa txã'wẽytxi yũu, makwe ũ'çxawa txikpkaçx.

¹² Txajũ' jxukaysa txikna skhẽwte', Jesusa' jxkaakh txãa yakh u'jusawe'sxtxi':

—Jxuka mepkhakhwe pe'la kijxasaatxi' kĩhwa vxitukahmen jĩte', ¹³ doce kanastate utatx pkhakh txãa taç cebada pan kijxasaatxi'.

¹⁴ Txã'wẽ Jesus yuuçxáa maa yuhwa ãjanimeesa's vxitte uyçxa', nasa' na'wẽtx weçxana we'we:

—Naa yuuçxá' isa Dxus yuwe pta'sxsa yuh yu'ga, naa kiwete pa'jana jĩ'tx txãaga yu' jĩna weçxaçxa', ãadxijimée jxkaahwa'jsa ki'pxa'watx

yu'. Aça' Jesus jiyuçxa', ¹⁵ txãaçxáa txuteena u'kh thã'j vxiçte pa'j.

Îkh kajkwega Jesus u'juni
(Mt 14.22-27; Mr 6.45-52)

¹⁶ Çxhi'dxna kîinite', Jesus yakh u'jusawe'sxa' îkh pukate kîhçxa, ¹⁷ barkote khêena'wa îkhuy ktejkana u'jtx Kapernaumte pa'jya'. Txã'wê jxuka çxhi'dxni yã'thewa Jesusa' sxawedna kîhmeyna, ¹⁸ barko îkhuy u'jweçpkaçxha', wejxaa wala kiiteçxa îkha's seena' wala kêese'kh. ¹⁹ Txã'wê seena' yuuçtewa îkh pxãhsu jxu'j u'jweççxa', Jesusa's îkh kajkwesu yuhte uytxi, sa' wala ûukhtxi. ²⁰ Aça' Jesusa' na'wêk we'we:

—Ûukhnuwe, adxthu jïte', ²¹ wala weçxana jxpa'gatx barkote. Sa' yaakxnimeete naa dudtey îkh kutete pa'jtx.

Nasa' Jesusa's pakwení

²²⁻²⁴ Kuskuskhê' Jesusa' kxtee meeyã'the', txãa yakh u'jusawe'sxwa meete', nasa' barkote khêena' u'jtx Kapernaum çxhabna Jesusa's pakweya'. Txã'wê Jesus yakh u'jusawe'sx teeçx barkote khêeçxa u'the', Jesus yu' txãawe'sx yakh u'jmeetewa jiyuçxane'ta pakweya' u'jna ũsu' îkh kuteju nasa neeyũusa'. Jesusa' Dxusna weçxaçxa pan puuçku txãa ja'date barko pa'jne'ta Tiberias çxhabuh yuusa, aça' txãatetx khêeçxa pakweya' u'j.

Û' cielujũ kîisa

²⁵ Sa' îkh kutete pa'jçxa Jesusa's uyçxa pëjxtxi:
—Idxa' ¿ma'wënga ayte pa'j? jïte', ²⁶ Jesusa' na'wêk pas:

—Isath we'we', i'kwe'sxa' pana's txikpkaçx ù'çxaçxáa i'kwe txã'wẽ adxa's pakwé'. Nawa adx txã'wẽ maa yuhwa ãjanimeesa's vxitthu txã's yu' jiyuça txã'wẽ yu'çmeei'kwe. ²⁷ Txik ù'çxa fxi'zewa'jçxá's pakwewa'jme', wejxwa ù' bagaçxte yuhwa pçumée itxi kaafxi'ze'jwa'jsa's pakweewa'ja'. Aça' Dxus Nçxi'k Nasa Yu-usa' txã'wẽ pçumée itxi fxi'zewa'ja's ùsu'nja, txã'wẽ yũuwa'ja's adx Tata' ùsku naa pa'ga jík. ²⁸ Txã'jíte', na'wẽtx pějx:

—¿Ma'wẽ yũukxtha'w Dxus jxkaahnitxi' kxtey yuuna fxi'zeyá? jíte', ²⁹ Jesusa' pta'sxku:

—Dxus jxkaahnitxi' kxtey yuu wẽeçxa', adxa's mpa'gawe, adxa' Dxus kaahnisath naa pa'ga jík.

³⁰ Aça' ki'kin pějxtxi:

—Idxa' Dxus kaahnisane'ga sũhna kwe'sx ew jiyukahn açxha' ¿kĩh kaavxya'ja'jya'waga?

³¹ Kwe'sx yaçgawe'sx manteywe'sxa' nasa u'pnimée kiwesu u'juçxa', ù' maná yaasesa's ù'tx. Aça' txã'wẽ yũuni's Dxus librute na'wẽk we'we': Dxusa' cielujũ ù'a's puuçu ku jík. ³² Aça' txã'jíte', Jesusa' na'wẽk pas:

—Isath we'we', cielujũ ù'a's Moises puuçme'. Cielujũ ù'a's adx Tatak puuç. ³³ Aça' Dxus puuçni ù' cielujũ kũisa' naa kiwetewe'sxtxi pçumée itxi kaafxi'ze'jwa'jsa'.

³⁴ Txã'jíte', na'wẽtx pějx:

—Kwe'sxtxi jxpe'jsa, cielujũ kũisa ù'a's pejka puuçune'ga kwe'sxtxiwa jíte', ³⁵ Jesusa' pta'sxku:

—Û' itxi kaafxi'ze'jwa'jsa' adxthu. Aça' maazkuéesawa adx tasxte pa'jsa' bagaçxte yuhwa wẽemeetxna. Sa' txã'wẽy adxna

ũuste jxpa'gasa' peena yu' yũ'wěemeetxna.
³⁶ Adxa' kimçxawa i'kwe'sxtxi pta'sxyã'th,
 nawa i'kwe'sxa' makwe uyçxawa, adxa's cielujũ
 kãisana sũju'çmée i'kwe. ³⁷ Makwe i'kwe'sx yu'
 adxa's jxpa'gameetewa, adx jxpe'khan Adx Tata
 dukhnisawe'sx yu' jxukaysa adx tasxteçxaçxáa
 pa'jatxna. Aça' maawa adx tasxte pa'jsatxi'
 ahçemée weçxana jxpa'ga'nja. ³⁸ Txã'wě
 cielujũ kĩhçxawa peekx adx ũus yaakxniçxá's
 kxtey yuuya' yuwe'çmeeth. Adx Tata ma'wě
 yũukaathe' txã'sçxáanath kxtey yuuya' yuwé'.
³⁹ Adx Tata' adx jxpe'khan dukhnisatxi'
 teeçxçxáa yuhwa ivxiitu jxthãasu'çme', kxajíi
 adxa' nmeh ente' ki' itxi vxitu'nja. ⁴⁰ Adxna
 kaahsa jxthãasni' na'wě': maawa jxukay
 Dxus Nçxi'ka's ũuste jxpa'gasa' pçumée itxi
 fxi'zewa'ja's ji'phu jxthãasu'k. Txãa pa'ga txã'wě
 ũuste jxpa'gasatxi' adxa' nmeh ente' ki' itxi
 vxitu'nja.

⁴¹ Txã'wě adxíi ũ' cielujũ kãisath jĩpa'ga judi-
 uwe'sxa' Jesusa's açewe'weya' takhtxi:

⁴² —¿Naa pihçíi Jose nçxi'kmeená'? Sa'
 ¿ma'wěga cielujũ kãisath jĩna we'we'?
 Txã'jĩkahmeníi kwe'sxa' txajx neywe'sxtxi ew
 jĩtha'w.

⁴³ Txajũ' Jesusa' txã'jĩni's jiyuçxa', na'wěk
 we'we:

—Maa yuhwa txã'wě açewe'wen ũswa'j
 ji'phmeei'kwe. ⁴⁴ Adxa' Tata jxkaahnisath
 aça' txãaíi adx tasxte kuutxa'the yuuçxáa
 txãatxi' jxukaysatx nmeh ente' itxi vxitu'nja.
⁴⁵ Txã'wě yũuwa'ja's Dxus yuwe pta'sxsa
 libroute na'wě fxi'jni ũsa': Dxusa' kaapiya'jana

jxukaysatx ¿jĩ'çmeená'? Kxajii maawa adx Tata kaapiya'jni's wēse'jçxa txajx jxkaahnitx kxtey yuusa yuuçxáa adx tasxte pa'jatxna.

⁴⁶ Maa yuhwa Dxusa's iuuymeeta'. Adx yuuçxáa Dxus tasxu yuusath na' txã'sna iuuythu. ⁴⁷ Adxa' isath we'we': Adxa's jxpa'gasa' pçumée ãtxĩ fxi'zewa'ja's ji'phutxna, ⁴⁸ txãasa pçumée ãtxĩ kaafxi'ze'jwa'jsa ũ'a', adxthu. ⁴⁹ Kwe'sx yaçga manteywe'sx nasa u'pnimée kiwesu u'juçxa' maná yaasesa's ũ'çxawa, pejka uu ena's ji'phutx. ⁵⁰ Nawa adxa' cielujũ kãisa ũ'a'sthu pta'sxi', txã'sna ũ'çxa' uukahmen. ⁵¹ Adxii cielujũ kãisa ũ' ãtxisath. Maawa txãa ũ'a's ũ'sa', bagaçxte yuhwa uumée ãtxi fxi'zewa'ja's ji'phutxna. Aça' ũ' adx ũsu'nja txã' adx kakwe', kxah maa nasawa pçumée ãtxi fxi'zewa'ja's ji'phukahntxã'wē adx kakwe's ũsu'nja.

⁵² Txã'jĩte', judiuwe'sxa' na'wētx puutx ya'paapēyi':

—Naa piçthē'ja' ¿ma'wē txajx kakwe's kwe'sxtxi puuçya' ãjakx? jĩte', ⁵³ Jesusa' na'wēk pta'sx:

—Adxa' isath we'we': Dxus Nçxi'k Nasa Yuusáa kakwe's ũ'çxa txajx eenawa tudxmeeçxa yu', pçumée ãtxi fxi'zewa'ja's ji'phumeene'kwe. ⁵⁴ Aça' maawa adx kakwe's ũ'çxa adx eenawa tudxçxa yuuçxáa pçumée ãtxi fxi'zewa'ja's ji'phutxna, kxah txã'wē yũusatxi' adxa' nmeh ente' ãtxi vxitu'nja. ⁵⁵ Txãa pa'gatey adx kakwe' peena yu' kwēje'jmeena, aça' adx eewa peena yu' kxũ'wē'jmeena. ⁵⁶ Maawa adx kakwe's ũ'na txã'wēy adx eenawa tudxsa', bagaçxtewa adx

yakh ih ũsuna, aça' adxwa txãa yakh ih ũsu'nja.
⁵⁷ Tata' adxna kaakh txã' ãtxãsa'. Txãa pa'ga
 adxwa ãtxãsath. Aça' adxwa Tata yakh ma'wẽ
 ãtxãsatka'w, txã'wẽy ãtxã fxi'zewa'ja's ji'phutxna
 maawa adx kakwe's ũ'sa'. ⁵⁸ Cielujũ kãisa
 ũ'a'sthu pta'sxna we'we'. Kwe'sx yaçgawe'sx
 manteywe'sxa' maná yaasesa's ũ'çxawa pejka
 uu ena's ji'phutx. Nawa naa ũ'a' txãa maná
 na'wẽsame'. Maawa naa ũ'a's ũ'çxa', bagaçxte
 yuhwa pçumée ãtxã fxi'zewa'ja's ji'phutxna jãnak
 pta'sx.

Jesus we'weni' pçumée ãtxã kaafxi'ze'jwa'jsa

⁵⁹ Jesusa' txã'wẽk pta'sx Kapernaumte
 judiuwe'sx pkhaakhenite. ⁶⁰ Aça' txã'wẽ
 kaapiya'jni's wẽse'jçxa', txãa yakh u'jusawe'sx
 maái yu' na'wẽtx we'we txãawe'sx pwe'sxçxáa:
 —Na'wẽ pta'sxni', wala thëya' jiyuwa'j, aça'
 ma'wẽ yuhwa ya'jiyu'çme'.

⁶¹ Nasa jiyumeeçxa kuh jwed we'wena ũste
 Jesusa' jiyuçxa', na'jãk:

—Adx pta'sxni's jiyumeeçxa ũusçxa
 yaaki'wá'kwe. ⁶² Txã'wẽ jiyumée ũsçxawa, Dxus
 Nçxi'k Nasa Yuusa' cielun teekaçte uyçxa', çmaa
 sũjuki'kwe? ⁶³ Na'jã'th na': Dxus Espiritu' ãtxã
 kaafxi'ze'jsa', aça' txãaçxá'sthu we'wena pta'sxi',
 naa kiwete ũ'çxa ãtxã fxi'zeni's pta'sxi'çmeeth.
 Adxa' isath pta'sxi' Dxus yakh ãtxã fxi'zewa'ja's.
⁶⁴ Nawa maái yu' isane' pta'sxi' sũju'çmeei'kwe
 jãk.

Jesusa' dxiikhëy jiyã'kh yu' maa txã'wẽ
 açeçtewa, sa' kim ikhkahn dukhwa'jsatewa, txãa
 pa'gak dxiikhëy txã'jãna we'we.

Sa' ki' we'weçxa':

⁶⁵ —I'kwe'sx maai' yu' açeçte jiiçxath adx Tata kuutxa'the yuuçxáa txáawe'sxa' adx tasxte pa'jatxna jīna we'we.

⁶⁶ Jesus txā'wē pta'sxteçxáa, txāa yakh u'jusawe'sx maai' yu' txuteena u'jtx. ⁶⁷ Txajū' Jesusa' pējxku docesatx:

—¿I'kwe'sxwa adxa's txuteeçxa u'jya'wakwe'? jīte', ⁶⁸ Simon Pedro' na'wēk pas:

—Kwe'sxa' ¿kim yakh u'jwekxtha'w? Idx yuuçxáa pçumée itxī fxi'zewa'ja's pta'sxna ūsgu aça'. ⁶⁹ Txāa pa'gatey kwe'sxa' idxa's jiyutha'w, txāasatha'w idxa' Kristo, Dxus itxisa Nçxi'kne'ga sūju'.

⁷⁰ Txā'jīte', Jesus we'weçxa':

—Adxa' i'kwe'sx docesatx txhitxhçxa pa'yatewa, teeçxsa' eçxthē'j jīia' jīnak pta'sx.

⁷¹ Jesusa' Simon nçxi'k Judas Iskariote's we'weçxak txā'jī, Judas txā'wē doce-satewe'sxçxawa Jesusa's ikhkahn dukhya'wak yu' naa pa'ga.

7

Jesusa' Dxus Nçxi'kna sūju'çmeeta' Jesus nyakhwe'sxa'

¹ Txajū' Jesusa' Galilea kiwesuk u'ju'. Judea kiwesu yu' u'ju wēeme', kxteea' judiuwe'sx ikhya' pakwenatx ūsu' naa pa'ga. ² Judiuwe'sx fxiesta wa' vxitni en ājaçku yu', ³ aça' Jesus nyakhwe'sxa' na'wētx we'we:

—Ayte ūsmée Judea kiwen me'j, kxah nasa iidx ju'guh ūssawe'sx uyuutxna idx na'wē yū'g

txã'sa's. ⁴ Maawa ãate tuuthe'j jxthãasuçça', paaçsu u'jumeena. Na'wẽ kimwa ãjanimeesa's kaavxya'ja'g na' txãatxi' ãate mkaavxya'j maawa uykahn jĩnatx we'we'.

⁵ Nyakhwe'sxii yuhwa Dxus Nçxi'kna sũju'çmeene'ta, txãasatx ũuste jxpa'gameeçça' txã'wẽ we'we'.

⁶ Txajũ' Jesusa' na'jĩnak pta'sx:

—Adx u'jwa'j ena' ãhmeya', nawa i'kwe'sx yu' kĩh entewa u'jya' ewuçxáane'kwe. ⁷ Naa kiwetewe'sxa' i'kwe'sxtxi' açe'çmeeta', nawa adxa's açe'tx, txã'wẽ txãawe'sx ewmée yũuni's ãateth pta'sxi' txãa pa'ga. ⁸ I'kwe'sxa' fxiestan me'jçxáawe. Adxa' yuhme'nja, adx u'jwa'j en ãhmeya' aça'.

⁹ Txã' we'weçça', Jesusa' Galileatee neeyũuk.

Jesus fxiestan u'jni

¹⁰ Nawa txajx nyakhwe'sx u'jni e'su', Jesuswa fxiestan u'kh, kimwa jiyunimeete. ¹¹ Aça' judi-uwe'sxa' na'jĩnatx txãa fxiestate Jesusa's pak-wena ũsu':

—¿Mtee ũski txãa piçthẽ'ja'? jĩna.

¹² Txãa fxiestate' Jesusa's nuywe'wesa yuuçxáatx susna ũsu'. Vxiteii yu': Jesusa' ewsa yuja' jĩçpkaçxha', vxite yu': Ewmeesa', nasatx i'sxiina u'jusaçxá' jĩnatx nuywe'we'.

¹³ Nawa Jesusa's ew we'wesa yu' maa yuhwa ãate yu' we'weçmeeta', judiuwe'sxtxi ũukhçça.

Fxiesta ente Jesus kaapiya'jni

¹⁴ Fxiesta pçuuna u'jweçpkaçxha', Jesusa' dx-uus yatte u'kaçça kaapiya'jya' takhku. ¹⁵ Aça'

judiuwe'sxa' kuh yajkxnatx ũsu' txãawe'sx pwe'sxçxáa na'jĩna:

—Naa piçthẽ'ja' ¿ma'wẽçxa txakwe wala jiina, maa kaapiya'jsa yakh yuhwa u'jusameeçxawa?

¹⁶ Aça' txã' we'weni's jiyuçxa', Jesusa' na'jĩnak pta'sx:

—Na'wẽth kaapiya'ja' txã' adx peekx yajkxçxa kaapiya'jnisame'. Adxna jxkaakh txajx we'weni'sthu kaapiya'ja'. ¹⁷ Maawa

Dxus jxthãasni's kxtey yuuwa'jsa ũçxa', naa kaapiya'jni's jiyuna Dxus we'wenitewa, meeçxa' adx peekxçxáa yajkxçxa kaapiya'jnitewa.

¹⁸ Peekíiçxáa yajkxçxa we'wesa', jxtuhtesa yuuwa'jçxá'sku jxthãasu'. Nawa Dxusçxáana tuuthe'jsa', Dxus jxkaahniçxá'sku isa we'wena pta'sxi'.

¹⁹ Moisesa' leya's fxi'jçxa ¿i'kwe'sxtxi ũsyuhmeena' wakx? Txã'wẽtewa i'kwe'sxa' maa yuhwa ley jxkaahni's kxtey yu'çmeei'kwe.

Txãasa i'kwe adxa's ikhya'çxáa yaaki' jĩte', ²⁰ nasa' na'wẽtx pas:

—Eçxthẽ'j yakh ũsne'ga. ¿Kimga idxa's ikh wẽje'?

²¹ Txajũ' Jesusa' na'jĩnak we'we:

—Ki'swa'j ente teeçx nasa aça'sa's nuykatx-hith txãa pa'gaçxáa i'kwe txakwe susya' ki-ite. ²² Nawa i'kwe'sx yu' ki'swa'j entewa luuçx

pihçtxi cirkuncidaĩ'i'kwe, Moises jxkaahni's nwẽese'jçxa. Naa kxah i'kwe aça'sa's adx nuykatxhini yu'sa' txakwe susu'. (Nawa ew

jiyute yu', Moises txã'wẽ cirkuncidãywa'ja's jxkaahna takhme', jwee yaçgawe'sxtxi txã'wẽ jxkaah.) ²³ I'kwe'sxa' Moises leya's kxtey yuuya'

sũhçxa i'kwe ki'swa'j entewa cirkuncidaĩ' luuçx pihçtxi'. Sa' ¿kĩjxa'kwe txakwe ũusçxa' adx teeçx piçthẽ'j aç'a'sa's ki'swa'j ente nuykatx-hiçxa nvxiitpa'gaçxáa? ²⁴ I'kwe'sxa' ew jiyumey yu' fxiyfxiyçxáa yajkxna we'wenuwe, naasáa ew jiyuçxa yuuçxáa txã'wẽ dxih yu'ga sũhna we'wewa'ja' jĩnak pta'sx.

Dxus tasxu yuusa

²⁵ Txajũ' Jerusalemte nasa maaíi yu' na'wẽtx puutx paapëyi':

—¿Naa piçthẽ'ja'síi ikhya' pakwe'çmeetxna'?

²⁶ Txã'wẽ pakweeçtewa, nasaa ksxavxyte yajkxyajkxmée we'wena ũsa', kim yuhwa ma'jĩnimeete. Meeçxa' ¿kwe'sx npiiçthẽ'jwe'sxa' ew yuh jiyuwá'ntakx naa piçthẽ'ja' Dxus tasxu yuusa Kristotewa? ²⁷ Naa piçthẽ'ja' majuwe'sxtewa jiitha'w, aç'a' isa Dxus kaahni Kristo dxihwaç'a, txã'sa' txãa kiwejuwe'sxa' jĩni yuumeena jĩnatx we'we'.

²⁸ Aç'a' Jesusa' dxuus yatte kaapiya'jna ũsíi, sus we'weçxa na'jĩk:

—Adxa'sa' jiiyuji'kwe majũwe'sxtewa. Nawa adxa' peekx yuu wẽeçxaçxáa yuwe'çmeeth, Dxus kaahni ayte ũsthu. Txãa yuuçxáa isa we'wesa' txãa kaahsa's yu' i'kwe'sxa' jiyu'çmeei'kwe. ²⁹ Txã'sa' adx yuuçxáa jiith, txajx tasxu kaahni ayte ũsthu naa pa'ga jĩk.

³⁰ Txã'jĩte', tudçxa preesu jxũna u'j wẽetx, nawa kim yuhwa tud yu' meeta', txã'wẽ yũuwa'j en ähmeyne' yu' naa pa'ga. ³¹ Txã'wẽtewa, wala kuh jiyutx Jesusa' kimtewa sa' na'jĩ'tx:

—Dxus tasxu yuusa Kristo kīhçxa', ¿naa piçthē'the jxthaakwe kījkiħwa kaavxya'ja'jya' ājāma'k? jīnatx we'we'.

Jesusa's preesu'jya' kaahni

³² Nasa txā'wē Jesusa's tuuthe'jna ūste fxarise-owe'sxa' wēse'jçxa', sacerdote npiiçthē'jwe'sx yakh puutx we'weçxa', dxuus yat thegsawe'sxtxi kaahtx Jesusa's tudçxa jxūna yuukahn. ³³ Aça' preesu'jya' kaahni's jiyuçxa', Jesusa' na'jīnak we'we:

—Adxna kaahsa tasxna sxawedna u'jya'wath na' i'kwe'sx yakh txaçxmeeçxāa pi'kxna ūsya'wath. ³⁴ Aça' adxa's pakweçxawa uymeene'kwe, txāa pa'gatey adx u'jweçthu kxte' pa'jya' ājāmeene'kwe naa pa'ga.

³⁵ Txajū' judiuwe'sxa' na'wētx puutx ya'paapējxya' takh:

—Naa piçthē'ja' ¿mtee u'the txā'wē kwe'sxa' uymée yuukxtha'w? Meeçxa' ¿judiuwe'sx ūsta' vxite kiwesu griegowe'sx ksxavxysu aça' txāa griegowe'sxtxi wāa pta'sxya' u'jweçnakx? ³⁶ Adxa's pakweçxawa uymeene'kwe, txāa pa'gatey adx u'jweçthu kxte' pa'jya' ājāmeene'kwe naa pa'ga jīnak we'we' sa' ¿ma'jīçxaki'k txā'wē we'we'? jī'tx.

Yu' pçuwa'jmeesa

³⁷ Fxiesta pçuuya' nmeh en yuuçte', Jesusa' yujuçxa na'jīnak sus we'we':

—Maawa yū'wēesa ūsçxa', adx tasxte myuhwe tudxya'. ³⁸ Adxa's ūste jxpa'gasatxi's txāawe'sx ūste yu' pçuwa'jmeesa kasehna nes yuuna, Dxus librute we'we'k txā'wē.

³⁹ Jesusa' txã'jĩna we'weçxa', txã'sna yaakxsa' Dxus Espiritu's jxpa'gawa'ja'sku pta'sxna txã'jĩ'. Txãa ensu' txãa Dxus Espiritu' pa'jmeyku yu', Jesus yuu cielun tejkameyku yu' naa pa'ga.

Jesus kimtewa jiyumeeçxa nasa fxiyfxiy yaakxni

⁴⁰ Nasa wala kuh pkhaakhena ũsnite maaí yu' Jesus pta'sxni's wëse'jçxa', na'wëtx we'we:

—Naa piçthê'ja' isa Dxus yuwe pta'sxsa yuhna jĩ'tx. ⁴¹ Aça' vxite yu' na'jĩ'tx:

—Na' Dxus tasxu yuusa Kristona jĩ'tx. Nawa vxite we'weçxa':

—Galileajũ yuja', ¿Kristo' kasehma'k?
⁴² Txã'wëmeeteíik Dxus librote we'weçxa': Kristo' jxkaahsa Davxid nwe'sxçxa', Davxid upxni çxhab Belentey kasejena jĩ'k jĩnatx we'we'.

⁴³ Txajũ' maaí yu' Jesus ju'gu we'wenatx neeyũ, aça' vxite yu' Jesusa's ahçenatx neeyũ.

⁴⁴ Aça' maaí yu' preesu'jçxa jxũna u'j wëeçxawa, maa yuhwa txã'wë yu' yũumeeta'.

Judiu npiiçthê'jwe'sxa' Jesusa's jxpa'gameeta'

⁴⁵ Dxuus yat thegsawe'sxa' ki'kin sxawedna pa'the', sacerdote npiiçthê'jwe'sx vxite' fxariseowe'sxa' na'jĩnatx pêjx:

—¿Mjĩitekwe txãa Jesusa's preesu'jçxa jxũna yuwe'çmée? jĩte', ⁴⁶ txãawe'sx pasçxa':

—Bagaçxte yuhwa naa piçthê'j na'wë zhiçxkwe pta'sxi'k txã'wësa yu' iiwëse'jmeetha'w. Txãasatha'w preesu'jmée.

⁴⁷ Txajũ' fxariseowe'sxa' wëesxũ we'weçxa', na'jĩtx:

—¿I'kwe'sxwa vxitesa na'wēy ya'ĩsxiijaçwá'kwe? ⁴⁸ ¿Kwe'sx npiiçthē'jwe'sx meeçxawa fxariseowe'sx maaçxá' txāa piçthē'j kaapiya'jni's jxpa'gaçxa ũste i'kwe'sxa' jii'kwe'? ⁴⁹ Nawa txāa piçthē'ja's nwēese'jsa' leya's jiiimeesata' na' iiméh seena' ewmeesa nwe'wewa'jmeesa yā'tha'.

⁵⁰ Txā'jīte', kxtee ũssa teeçx fxariseo Nikodemo yaasesa Jesus tasxte kus pa'jya' u'ju'ga txāa we'weçxa na'jīk:

⁵¹ —Yuuwesa's pa'yaçxa pējxmey yu', kastigāyya' ājame'nja'w, kwe'sx leya' txā'wē jxkaaja'çme' jīte', ⁵² txāawe'sx paççxa':

—¿Idxwa Galileajūwe'sxwá'ga? Dxus li-bru's mtheg wakx, sa' jiyune'ga: Galileajū yu', bagaçxte yuhwa Dxus yuwe pta'sxsa iikasehmeeta' jīnatx açewe'we. ⁵³ Txā'jīçxa', puutx txuteena u'jtx txāawe'sx yatna.

8

Teeçx u'ya's Jesus peltunāyni

¹ Naapkaçxha' Jesusa' Jerusalenu kasehçxa Olios vxiçnak u'j. ² Sa' kuskus kusiiçxáa dxuus yatte sxawedna pa'kh. Txajū' nasa jxukaysa utxaate', Jesusa' kaapiya'jya' kaçxku. ³ Txajū' ley kaapiya'jsawe'sx vxite' fxariseowe'sxa' teeçx u'y kazx yūuna ũste kpajkxçxa Jesus tasxte nuypajtx sa' pxāhte txahçxa' ⁴ na'jītx:

—Kaapiya'jsa, naa u'ya's kazx yūuna ũsīin kpa-jkxtha'w. ⁵ Txā'wē yūusatxi' Moises leya' kwet

wāatatahçxak ikhkaja'. Aça' idxa' ¿ma'wē jxkaa-jaki'g? jīnatx pējx. ⁶ (Kxtee āhmée we'wete', paatxhī'khya' sūhçxatx txā'wē paapēyi'.)

Nawa Jesusa' kīiçhuçxak kiwete kuseju fxi'ja'. ⁷ Aça' maz uswa jwee pējxte', Jesusa' kaphuteçxa na'jīk:

—I'kwe'sxa' maaçxáawa pkal ji'phmeesa ūsçxa', txāa khuē'y naa u'y kakwete kwet mwāatahwe jīçxa', ⁸ ki' kīiçhuçxa kiwete fxi'kh. ⁹ Aça' txā'jīni's wēse'jçxa': Kwe'sxwa pkalsane'tka'w sūhçxa, kasehna u'jtx teeçxteeçxçah, nyafxte' jwee ūsxsu khuē'ytxi kaseh. Txā'wē jxuka kasehna u'the', txāa u'yçxáak kxtee neeyūu Jesus ūsnite. ¹⁰ Aça' Jesusa' kaphuteçxa ley kaapiya'jsawe'sx jxuka kasehna u'jnite' txāa u'yçxáa ūste uyçxa', na'jīk:

—I'kwena paatxhī'khsawe'sxa' ¿mteeta yuu? ¿Maawa i'kwe's ewmeete nvxiht-ya' ājāmeewá'nta? jīte', ¹¹ txāa u'ya' na'jīnak pas:

—Maa yuhwa ājāmeeta' jīte', Jesusa' na'jīk:

—Adxwa i'kwe's ewmeete nvxihtme'nja. Me'jwe, nawa peena yu' ewmée yūuna u'junuwe jīk.

Jesusa' eena'te kaafxi'ze'jsa

¹² Ki'kin nasa pkhaakhete', Jesusa' na'jīnak we'we:

—Adxa' eena'te kaafxi'ze'jsath, aça' maawa adx yakh yuusa' eena'te fxi'zewa'ja's ji'phutxna, sa' багаçxte yuhwa çxhi'dxte fxi'zemeetxna.

¹³ Txajū' fxariseowe'sxa' na'wētx we'we:

—Idxa' peekíıçxáa ya'tuuthe'jna ũsgu aça' txã' kxul yuhna jıte', ¹⁴ Jesus pasçxa':

—Makwe peekíıçxá'ntka ya'tuuthe'je', nawa adx pta'sxni' ĩsxiinisame'. Txãa pa'gatey adxa' jiith majũwe'sxçxa' ki' maa dxi'j u'jweççxawa. Nawa i'kwe'sxa' jiiimée i'kwe adx majũwe'sxtewa sa' maa dxi'j u'jweçtewa. ¹⁵ I'kwe'sxa' peekx ũus yaakxnijũçxáa i'kwe txã'wē we'we', adx isa we'weni's jiyumey. Nawa adxa' jiimeeçxa yu' we'we'çmeeth. ¹⁶ Nasa ma'wēsatewa isa jiyuçxath we'we', Tata' adxa's kaakh txãak ma'wē yũuwa'ja'swa adxa's pu'çxhi' txãa pa'ga. ¹⁷ I'kwe'sx leyte' na'jĩ'k: Yuwe's jiisa e'zii txãa na'wēçxaçxáa we'wenisaçxáa selpiina jĩ'k. ¹⁸ Aça' isa we'wesa teeçxsa' adxiıçxáath. Aça' vxite' adxna kaahsa Tataııçxá'.

¹⁹ Txã'jıte', fxariseowe'sxa' na'jıtx:

—İidx Tata' çmtee ũsna? jıte', Jesus pasçxa':

—I'kwe'sxa' adxa's jiyu'çmeei'kwe, sa' adx Tatanawa jiyu'çmeei'kwe. Adx kintewa jiyuwaça', adx Tatanawa jiyune'kwe jınak pta'sx.

²⁰ Dxuus yatte ofxreda āsxni kaja pukate kaapiya'jna ũsçxa', txã'jınak pta'sx Jesusa'. Nawa maa yuhwa preesu'jya' ājāmeeta', preesu'jwa'j en āhmejne' yu' naa pa'ga.

Adx ũsnite' pa'jya' ājameene'kwe

²¹ Jesusa' ki'kin we'weçxa na'jĩk:

—Adxa' u'jweçthu, aça' i'kwe'sxa' makwe pakweene'kwe, nawa adxa's uymey i'kwe'sx pkalte uune'kwe. Txãasa adx u'jweçthu kxteea' pa'jya'

ājameene'kwe jīna we'wete', ²² judiuwe'sxa' na'jītx:

—Meeçxa' çpeekx kusetey uuya'wawáanaxk, txāasa wá' adx u'jweçthu kxteea' pa'jya' ājameene'kwe jīna we'we'kx? jīte', ²³ Jesusa' pta'sxku:

—I'kwe'sxa' aytewe'sxi'kwe, naapkaçxha' adxa' ēejūwe'sxthu. Aça' i'kwe'sxa' naa kiwetewe'sxi'kwe, naapkaçxha' adxa' naa kiwetewe'sxmeeth. ²⁴ Txā'wēçxa'ith i'kwe'sx pkalte uune'kwe jīna pta'sxi'. Txā'wē Dxus kaahnisa' adxçáath jīna pta'sxtewa jiyumée yā'jçxa', i'kwe'sx pkalte uune'kwe jīna pta'sxte', ²⁵ na'jīnatx paapējx:

—Txā'wēçxa' çidxa' kimga? jīte', Jesus pasçxa' na'jīk:

—Adxa' kimçxawa nyafxíi pta'sxyā'th. ²⁶ Txāasa wala pta'sxwa'j jī'pthu i'kwe'sx ma'wēsatewa āate pta'sxna, txāa pa'gatey adxna kaahsa' īsxiisame', aça' adxa' txajx we'weni's wēse'jçxa txā'wē íiçxáath pta'sxi' maawa jiyukahñ jīnak we'we.

²⁷ Txā'wē Dxusa' adx Tata' jīna Jesus pta'sxtewa jiyumeeta'. ²⁸ Txāa pa'gak Jesusa' na'jīna we'we:

—I'kwe'sxa' Dxus Nçxi'k Nasa Yuusa's ēete txahçxa yuuçxáa jiyune'kwe kimtewa, sa' peekxçxáa yu' we'wemée, wejxwa Tata kwe'we'jniçxá'sne' kaapiya'j sūjune'kwe. ²⁹ Txāa pa'gatey adxna kaahsa', adx yakh ih ūsa', Tata' adxçxáa yu'sa' nvxiitu'çme', txajx jxthāasniçxá'sthu kxtey yu' naa pa'ga jīk.

³⁰ Txā'jīna we'wete', nasa kuhsa Jesus ju'gu yuutx.

Ewmeete fxi'zesa vxite' ewmeejũ nwe'wenisa

³¹ Txajũ' Jesusa' txajx ju'gu yuusaawe'sxtxi' na'jĩnak pta'sx:

—Adx kaapiya'jni's jxpubamée nwēese'jçxa', adx nasa yuuçxa ³² ewsa's jiyune'kwe, açã' txãã ewsa' ewmeesajũ nwe'wena jĩte', ³³ txãawe'sxa' na'wētx pas:

—Kwe'sxa' Abrahan ji'tha'w, sa' bagaçxte yuhwa ewmeete yu' fxi'zesameetha'w. Açã' idxa' çma'wēga ewmeesajũ nwe'weni yuune'kwe jĩna we'we? jĩte', ³⁴ Jesusa' pta'sxku:

—Isath we'we', maawa ewmée yũuna fxi'zesa', ewmeete fxi'zesata'. ³⁵ I'kwe'sxa' peekx jii i'kwe: selpisa' yat namu na'wēsame', naasáa peekx nçxi'k yuuçxáa yat namu na'wēsa'. ³⁶ Txãã pa'ga yat namu na'wēsa Dxus Nçxi'k txã'wē ewmeesajũ nwe'wete yuuçxáa, isa ewmeete fxi'zesamée yuh yuune'kwe. ³⁷ I'kwe'sxa' Abrahan ji'thewa jiith, nawa adxa's ikh wēje'i'kwe, adx kaapiya'jni's nwēese'j wēemeeçxaçxáa. ³⁸ Adx Tata kwe'we'jniçxá'sthu pta'sxi', naapkaçxha' i'kwe'sxa' i'kwe'sx tata jxkaahniçxá's i'kwe kxtey yu' jĩte', ³⁹ txãawe'sxa' na'wētx pas:

—Kwe'sx tata' Abrahana' jĩte', Jesus pasçxa':

—Abrahan luuçxwaça', Abrahan na'wēy yũune'kwe. ⁴⁰ Txã'wētewa, adxna ma'wē Dxus kaapiya'the', txã'sçxáath isa pta'sxi'. Nawa i'kwe'sxa' adxa's ikhya' yuuçxáa i'kwe pa'pçxu'. Abrahana' bagaçxte yuhwa txã'wē yũume'. ⁴¹ I'kwe'sx tata ma'wē yũute', i'kwe'sxwa txã'wēy i'kwe yũ' jĩte', na'wētx pas:

—Txã'jikahna', kwe'sxa' ¿ptamunimeesa luuçx wá'ntka'w? Kwe'sxa' teeçx tataçxáa jip'tha'w, txã' Dxusa' jíte', ⁴² Jesusa' na'jínak we'we:

—Isa Dxusa' i'kwe'sx tatawaça', adxa's ahçemeene'kwe, adxa' Dxus tasxu kaahnith yuwé' txãasa ayte ũsthu. Adxa' peekçxáa yu' yuwe'çmeeth, adxa'sa' Dxusku kaah. ⁴³ Na'swa adx kaapiya'jni's jiyu'çmeei'kwe, txã'wê adx we'weni's nwēese'je'çmeei'kwe, txãasa i'kwe jiyu'çmée. ⁴⁴ I'kwe'sx tata', eçxthē'ja', aça' i'kwe'sxa' txajx luuçxi'kwe. Txã'wēçxái i'kwe txajx jxthãasni's kxtey yuu wēje', eçxthē'ja' nyafxiitey nasaa kiikhe'jsa' naa pa'ga. Eçxthē'ja' bagaçxte yuhwa ewsa's yū'çme', sa' bagaçxte yuhwa isa we'we'çme'. Txãa yuu txã'wēesana na' ĩsxiinaçxáak we'we', sa' kaaĩsxiija'jsa'. ⁴⁵ Nawa adx isa we'weni yu's nwēese'je'çmeei'kwe. ⁴⁶ I'kwe'sxa' ¿maaça' adxa's pkalsa' jīna ukhe'jya' ājama'kwe? adxa' isasaçxá'sthu pta'sxi' aça'. Adx isasa's kaapiya'jaçte', ¿ma'wētekwe adx we'weni's nwēese'je'çmée? ⁴⁷ Dxus luuçxa' Dxus we'weni's nwēese'je'tx. Nawa i'kwe'sxa' nwēese'je'çmeei'kwe na' Dxus luuçx meei'kwe jīk.

Abrahan meetey Kristo ũsyã'kh yu'

⁴⁸ Txajũ' judiuwe'sxa' Jesusa's na'wētx açewe'we:

—Idxa' Samariajũwe'sxgu, txãasa eçxthē'j yakh ũsgu aça' isatha'w txã'jī' jíte', ⁴⁹ Jesusa' na'wēk pas:

—Adxa' eçxthē'j yakh ūsmeeth, naasáa adx Tata's tuuthe'jsaçxáath. Nawa i'kwe'sxa' adxa's açe'i'kwe. ⁵⁰ Adxa's weçxana tuuthe'jni's pakwe'çmeeth. Nawa teeçx ūsa' adxa's tuuthe'jsa txā' adx ma'wēsatewa jiia'. ⁵¹ Isath we'we': Adx we'weni's kxtey yuusa', bagaçxte yuhwa uu ena's ji'phumeetxna.

⁵² Txā'jīte', judiuwe'sxa' na'wētx we'we:

—Āçxhtha'w wejx ew jiyu, eçxthē'j yakh ūstewa. Abrahana' uuk sa' Dxus yuwe pta'sxsawe'sxwa uutx. Naapkaçxha' idxa' na'jī'g: Maawa adx we'weni's kxtey yuuçxa', bagaçxte yuhwa uu ena's ji'phumeetxna jī'g. ⁵³ Kwe'sx yaçgawe'sx Abrahana' uuk sa' Dxus yuwe pta'sxsawe'sxwa uutx, aça' idxa' ¿Abrahante jxthaakwesa wá'ga? jīte', ⁵⁴ Jesusa' na'wēk pas:

—Adxíiçxáa ya'tuuthe'jna pta'sxi'nja na' txā' selpimeena. Nawa adxa's tuuthe'jsa' adx Tata' txā's i'kwe kwe'sx Dxusa' jīna we'we'. ⁵⁵ Nawa i'kwe'sxa' txāa Dxusa's jii yuwa meei'kwe. Nawa adxa' txā'sa' ew jīith. Txā'wē txā'sa' ew jiiçxa jīimeeth jī'nja na', i'kwe'sx na'wēy iisxihsa yu'nja. Nawa adxa' iisxiimée Dxusa's jīith, sa' txajx jxkaahni's kxteythu yu'. ⁵⁶ I'kwe'sx yaçgawe'sx Abrahana' adx naa kiwete pa'jwa'ja's jiyuçxa', wala weçxana yajkxku, sa' kxtey yuuni's jiyuçxa' wejxku wala weçxa.

⁵⁷ Txā'jīte', judiuwe'sxa' na'wētx weeçx we'we:

—Idxa' cinkwenta anxu yuhwa mée ji'phgu, sa' ¿ma'wēga txā'wē Abrahana's uy? jīte', ⁵⁸ Jesus pasçxa':

—Isath we'we', Abrahan meein, adxa' ũsyā'th yu'.

⁵⁹ Txã'jĩte', judiuwe'sxa' ũusaçxaçxa', Jesusa's kwet wāatatajxa'watx yu'. Nawa Jesusa' txāawe'sx ksxavxysuy dxuus yatu kasehna u'kh, kim yuhwa jiyunimeete.

9

Teeçx piçthē'j uyya' ājasame's Jesus yu'çe'jni

¹ Jesusa' u'jweççxa', teeçx piçthē'j naa kiwete upxhí uyya' ājasame'sku puutx uy. ² Aça' txāa yakh u'jusawe'sxa' Jesusa's na'wētx paapējx:

—Naa piçthē'ja' ¿kĩh yuupa'gaki'k txã'wē yafx ji'phméé upxna ũsu'? ¿Txajx pkalpa'ga ma'k txã'wē nxus ji'phu, meeçxa' neywe'sx pkalpa'ga wá' txã'wē yuu? jĩte', ³ Jesus paççxa' na'jĩk:

—Txajx pkalpa'gawa me', sa' neywe'sx pkalpa'gawa meek txã'wē yuu, naasáa Dxus ewuni's āate kaavxya'ja'khançxáak txã'wē yuu. ⁴ Txāa pa'ga kaahsa mjĩia's āate kaavxya'ja'jna mjĩiwa'j ji'pthu nee en ũsiyna. Txã'wēme' kus yā'the', kim yuhwa mjĩiya' ājameena. ⁵ Adxa' naa kiwete nee ũsíçxáawa, nasatx eena'te kaafxí'ze'jwa'jsath.

⁶ Txã'jĩçxa', kiwe's fxne'sxju tuuphaçxa txāa piçthē'j yafxte sxūsxna'wa, ⁷ na'jĩnak jxkaah:

—Me'j pkhi'kxya' Siloé yu'kafxte. (Txāa Siloéa' Jxkaahnisa jĩni'.)

Txajũ' txāa piçthē'ja' u'jçxa', yafxtxi pkhi'kxku, sa' uyna yā'kh sxawedna kũh. ⁸ Aça' txajx yat utxasuwe'sx vxite' nyafxíi txã'wē yafx ji'phméé upxsatewa ew jiisa' na'wētx we'we:

—Naa piçthê'jí ¿nyafxí' lmusxnu pêjxna u'psa meená'? jíte', ⁹ maaíi yu':

—Txâaíik jĩ'tx. Naapkaçxha' vxite':

—Txâa na'wê yuh thegu'k, nawa txâame' jĩ'tx. Nawa txâa piçthê'j yu':

—Adxíith jĩk.

¹⁰ Txajũ' pêjxtxi:

—Idx upxnijũjx uyya' âjameeçxa', açxha' ¿ma'wê yuuçxaga uyya' âja'? jíte', ¹¹ pta'sxku:

—Teeçx piçthê'j Jesus yaasesa' kiwe's fxne'sxju tuupha'çxa adx yafxte sxũsna'wa na'jĩk: Me'j pkhi'kxya' Siloé yu'kafxte jíte', u'jna'wa pkhi'kxthu, aça' adx yafxa' phatetx aça' uyu'th jíte', ¹² paapêjxtxi:

—Idxa's txâ'wê kaahsa' ¿mtee ũsna? jíte':

—Jiimeeth jĩnak pas.

Fxariseowe'sx txâa piçthê'ja's paapêyni

¹³ Txajũ' txâa piçthê'ja's pe'jna u'jtx fxariseowe'sx tasxna. ¹⁴ Jesus txâ'wê kiwe's fxne'sxju tuupha'jçxa uyya' âjasame's yu'çe'jni' ki'swa'j enne' yu'. ¹⁵ Aça' fxariseowe'sxa' ki' paapêjxtxi txâa piçthê'ja's:

—¿Ma'wê yũuçxaga açxha' uyya' âja'? jíte', na'jĩnak pta'sx:

—Kiwe's fxne'sxju tuupha'çxa adx yafxte sxũsxku, aça' pkhi'kxthu sa' uyya' âjath jĩk.

¹⁶ Txajũ' fxariseowe'sx maaíi yu' na'wêtx we'we:

—Txâ'wê yũusa' Dxus luuçx meena, ki'swa'j ena's ki'su'çme' na' jíte', vxite' na'wêtx we'we:

—Pkalsaçxa', ¿ma'wê txâ'wê kim yuhwa âjãnimeesa's kaavxya'ja'jya' âjãkx?

Txajũ' txãawe'sxíçxáa txã'wě we'weçxa', pu-
utx puuidxi'tx neeyũu. ¹⁷ Sa' txãa piçthě'ja's ki'
paapějxtxi:

—Iidx yafxa's yu'çe'jsa' ¿kimna sũju'ga? jĩte':

—Txã' Dxus yuwe pta'sxsana sũju'th jĩnak pas.

¹⁸ Txã'wě upxniñũjx uyya' ãjasameeçxawa
ãçxha' uyu'th jĩtewa, judiuwe'sx yu' txã'wěne'
yu' sũju'çmeeta'. Sa' txãa piçthě'j neywe'sxtxi
pa'yaçxa', ¹⁹ paapějxtxi:

—¿Naa txã'wě i'kwe'sx luuçx upxniñũjx uyya'
ãjasameena wakx? Sa' ¿ma'wě yũuçxaga ãçxha'
uyya' ãja'? jĩte', ²⁰ neywe'sx pasçxa':

—Na' kwe'sx luuçx yuja', txã'wě upxhíi uyya'
ãjasameetewa txã'sa' jiitha'w. ²¹ Nawa ji-
imeetha'w ma'wě yũuçxane' ãçxha' uyya' ãja'.
Sa' kim txã'wě yafxtxi' yu'çe'thewa txã'snawa ji-
imeetha'w. Txã's yuu mpějxwe, txã' thě'jsayã'ja'
na' txãa pta'sxina.

²² Paapěysatxi' ũukhçxatx txã'wěçxáa pas.
Txã'wěme' maa txã'wě Jesusa' Dxus kaahni
Kristo' jĩna tuuthe'jena txã'sa' fxariseowe'sxa'
ahçeçxa peena yu' txãawe'sx pkhaakhenite
kaapa'ja'jya'méetx ũsu'. ²³ Aça' txã'wě yu-
uya'watetx ũukhçxa: Na' thě'jsayã'ja' na' txãa
pta'sxina jĩnaçxáa pasu'.

²⁴ Txajũ' fxariseowe'sxa' txãa piçthě'ja's ki'
pa'yaçxa' na'wětx we'we:

—Dxus dxi'pte ĩsxiimée mpeeta'sx. Kwe'sxa'
jiitha'w iidx yafxtxi yu'çe'jsa' pkalsatewa jĩte',
²⁵ txãa piçthě'j pasçxa' na'jĩk:

—Pkalsa wáana nawa adxa' jiimeeth. Adxa' na'wěçxáa jiith: nyafxí' uyya' ája'çmeeth, nawa áçxha' uyu'th jíte', ²⁶ ki' paapějxtxi:

—¿Kĩhga yũu? sa' ¿ma'wěçxah yũuçxaga iidx yafxtxi' yu'çe'j? jíte', ²⁷ txã' na'wěk pas:

—Pta'sxyã'th, nawa pta'sxtewa açewe'we'çxáa i'kwe. Sa' ¿kĩjxa'kwe peena pta'sxkaja'? ¿I'kwe'sxwa txãa yakh u'ju wěje'wá'kwe? jíte', ²⁸ na'jĩnatx wěesxũu:

—Idxa' txãa yakh u'jusag. Nawa kwe'sxa' Moises jxkaahni's nwěese'jsatha'w. ²⁹ Kwe'sxa' jiitha'w Dxusa' Moises yakh puutx we'wek. Nawa txãa thě'ja's majũwe'sxtewa jiimeetha'w.

³⁰ Txajũ' txãa piçthě'ja' na'wěk we'we:

—Wala yuh fxiya', adx yafxtxi yu'çe'jsa's majũwe'sxtewa i'kwe'sxa' jiyumeete'. ³¹ Maawa jiitha'w Dxusa' pkalsawe'sx we'weni's pasu'çme', naasáa Dxusna yajkxçxa txajx jxkaahni's kxtey yuusaçxáatxku Dxusa' pasu'. ³² Bagaçxte yuhwa iiwěse'jmeetha'w upxhíi uyya' ájasameetx ki' kaauyu'jni yu'sa'. ³³ Adx yafxtxi yu'çe'jsa' Dxus kaahnisameewaça', txã'wě kaauyu'jya' ájawa'jmeene' yu' jíte', ³⁴ na'wětx wěesxũu we'we:

—Idxa' upxhíi iidx ũuste pkalçxaçxáa uta ji'ph upxsag na' ¿ma'wětega kwe'sxtxi yu'kxpeh wěje'? jĩna açewe'weçxa', neeutx peena yu' jxpa'gaya'mée.

Uysaaçxawa Dxus yu's jiimeesa

³⁵ Txajũ' Jesusa' txãa piçthě'ja's neeuni's jiyuçxa', ki' puutx uyçxa' na'wěk pějx:

—¿Dxus Nçxi'k kimtewa jiigá'? jíte', ³⁶ txãa piçthê'j pasçxa':

—Mpeeta'sx adx jiyukahn jîna pějxte',
³⁷ Jesusa' pta'sxku:

—Idxa' Dxus Nçxi'ka's iuuyã'jg. Adxíith, açã' idxa' txãa yakhgu puutx we'we'.

³⁸ Txã'jíte', txãa piçthê'ja' Jesus tasxte pee-jxūkweçxa':

—Idxa' Dxus Nçxi'k yuh yu'ga sūju'th jíte',
³⁹ Jesusa' na'jînak pta'sx:

—Adxa' na'wě yuuya'íiçxáath naa kiwete kîh, uyya' âjasameeçxawa uyya' âjâkahn, açã' makwe uysaaçxawa uyya' âjâkahmén.

⁴⁰ Txajũ' fxariseowe'sx kxtee ũssa' txã'wě wěse'jçxa', na'wětx pějx:

—Kwe'sxwa uyya' âjasameewá'ntka'w jíte',
⁴¹ Jesusa' na'jînak pta'sx:

—I'kwe'sxa' uyya' âjâsamée dxihwaça', yu-uwesamée yuune'kwe. Nawa uyu'tha'w jî'i'kwe na', txãa pa'ga Dxus dxi'pte' yuuwesai'kwe jîk.

10

Piisxáa kxuuphni's kaaja'dajna pta'sxni

¹ Isath we'we', maawa piisxáa ka'ga'jni vx-itxtey u'kamée, vxite ahte vxitxtemée u'kasa' txã' pesweeta'. ² Nawa vxitxte u'kasa' piisxáa-thegsaçxa txã'wě yuuna. ³ Açã' kxte vxitxte thegsa' vxitxa's phaade'k u'kakahn. Açã' piisxá' jiyu'tx jxpe'jsa we'weni's, txajũ' teeçxteeçxçxah kxsusna pa'yaçxa kxuuphni'jũ kutxi'ji'k. ⁴ Sa' jxuka kasxisçxa', piisxáa-thegsa' yaçtek u'jwe', açã' piisxa' txajx e'ste wa'lmeetx u'jwe', jxpe'jsa

pa'yani's jiyu'ne'ta naa pa'ga. ⁵ Nawa nasa fxiysa pa'yate yu', u'jmée wejxwa ũphna u'jwe'tx, nasa fxiysa pa'yate jiyuçxatx txã'wẽ ũphu'.

⁶ Jesusa' naa ejemplo's pta'sxnak kaapiya'j, nawa nasa' jiyumeeta' txã'wẽ pta'sxni's.

Jesusa' ew jxpe'jsa'

⁷ Nasa jiyumeete', Jesusa' na'jĩnak ki'kin pta'sx: —Isath we'we': Adxíi piisxáa u'kani vxitx na'wēsath. ⁸ Adx pa'jmeyna yaçte pa'jsa' jxukay ĩsxiisa pesweeçxáatx yu'. Aça' piisxá' ũukhçxa utxaameeta'. ⁹ Adxíi vxitx na'wēsath, aça' maawa adx tasxte u'kasa', nwe'weni yuutxna. Txajũyã'ja' ki' kasehn ki' u'kan txã'wẽ yuuna ũsçxawa, sã'jĩni nes yuutxna.

¹⁰ Ewmeesa' pesweena ikhna jxuka pabaya'çxáatx pa'ja', naapkaçxha' adxa' bagaçxte yuhwa pçumée ĩtxi fxi'zekahnthu yuwé'. ¹¹ Adxa' piisxaatx ew jxpe'jsath. Aça' ew jxpe'jsa' piisxaatx peeygãhçxa nwe'wepa'gaçxáa txajx ĩtxi fxi'zeni's ivxiituya' ũsa'. ¹² Nawa vxyuu pa'gaçxáa piisxaatx thegna ũssa' yu'kh eçx yuhte uyna'wa, piisxaatx thegmée ũphna u'jwe'tx, piisxáa-thegsa meena sa' piisxa' txãa jĩwa meetxna, txãa pa'gatx txã'wẽ yũ'. Aça' txã'wẽ yũute', yu'kh eçxa' piisxaatx mazwa ikhe'k, naapkaçxha' ĩtxisa yu' ma'wẽwa ũphu'tx. ¹³ Txã'wẽ vxyuu pa'gaçxáa thegna ũsna, txãasane' ũphna u'jwe' piisxaatxi' thegmée.

¹⁴⁻¹⁵ Adxa' piisxaatx ew jxpe'jsath. Adx Tatawa ma'wẽ adxa's ew jiina aça' adxwa ew jiith Tata's, txã'wẽy adxwa piisxaatxi' ew jiith, aça' adx piisxaawa adxa's jiita'. Adx

piisxaatx wedxçxa nwe'weya' adx îtxi fxi'zeni's ivxiituya'wath. ¹⁶ Txã'wëy piisxáa vxite jì'pthu ayte kxuuphnimeesa txãatxwa nuypa'ja'nja. Aça' txãawe'sxwa adx pa'yani's nwëese'jetxna. Txã'wë yūute', teeçx ahteçxaçxáa jxuka pkhakhni neeyūtxna teeçx jxpe'jsa yakhçxáa.

¹⁷ Txã'wë adx îtxi fxi'zeni's ya'ivxiituya'wath, nawa îtxi yuwa'ja's ki' jxpa'gaya'wath, txãa pa'gak Tata' adxa's wedxi'. ¹⁸ Adx îtxi fxi'zeni's kim yuhwa kusa'jya' ājameena. Adx yu-uth peekíi ya'dukhe'. Sa' adx îtxi fxi'zeni's ya'dukhçxa uuya'wa āja'nja sa' ki' îtxi yu-uwa'ja'swa ki' jxpa'gaya' āja'nja. Txã'wë yūukahnku adx Tata' adxa's kaah.

¹⁹ Txã'wë we'weni's judiuwe'sx wëse'jçxa, kuh jwedtxi yajxna neeyūu. ²⁰ Maaíi yu' na'wëtx ūusçxawe'we':

—¿Kĩjxa'kwe nwëese'je' eçxthē'j yakh ūsçxa luuku we'weni's? jì'tx. ²¹ Naapkaçxha' vxite' na'jì'tx:

—Eçxthē'j yakh ūsçxa', kim yuhwa na'wë zhiçxkwe kaapiya'jya' ājameena. Eçxthē'jçxa', txã'wë uyya' ājasameetx kaauyu'jya' ¿ājāma'k?

Judiuwe'sx Jesusa's açeni

²² Dxuus yata's txahna jxã'jni's anxu iisatx fxiesta'ja' Jerusalen çxhabte. Sa' txãa fxiestatetx ūsu' nus ente. ²³ Naapkaçxha' Jesusa' dxuus yat pwa' Salomon jīi jīnisuk pekūhna u'ju'. ²⁴ Aça' judiuwe'sxa' txajx tasxte pkhaakheçxa na'wëtx pējx:

—¿Bagaçxpkaçx kwe'sxtxi kaypuba'jna ũsya'waga? Idxa' Dxus tasxu yuusa Kriŝtoçxa', teehwed mpeeta'sx jĭte', ²⁵ Jesusa' na'jĭnak pas:

—Pta'sxyã'th, nawa adx we'weni's jxpa'gaçmeei'kwe. Adx Tata jxkaathe', na'wẽ kĭhwa mjĭ'th, aça' adx mjĭini' ãate kaajiyu'ju'tx adx kimtewa. ²⁶ Adx piisxáa meeikwe jĭ'th na', isa i'kwe'sxa' txã'wẽsa yuji'kwe. Txãasa i'kwe adxa's jxpa'gaya' wa'lu'. ²⁷ Adx piisxaatx jiith, aça' txãawe'sxa' adx pa'yanis'wa wa'lmée nwẽese'je'tx, sa' adx yakh u'jwe'tx. ²⁸ Txãasath txãawe'sxtxi' pçumée ĩtxi fxi'zewa'ja's peesu'. Aça' kim yuhwa adx kusejũ' kusa'jmeena, sa' bagaçxte yuhwa vxitumeetxna. ²⁹ Adx Tata maatewa jxthaakwesak adx kusete dukh, aça' kim yuhwa kusa'jya' ãjameena adx Tata kusejũ'. ³⁰ Tata adx yakha' txãa na'wẽçxaçxáatha'w.

³¹ Txã'jĭte', judiuwe'sxa' Jesusa's ki' kwet wãatatajxa'watx yu'. ³² Aça' Jesusa' we'wek:

—Adx Tata pu'çxte i'kwe'sx dxi'pte mjĭi ewsaçxaçxáa wala kuh kaavxya'ja'th. Aça' adx mjĭi ewsa çmaaga i'kwe'sxtxi ewmeena' thegu' açkwe adxa's kwet wãatatah wẽje'? jĭte', ³³ judiuwe'sx paçxa' na'jĭtx:

—Ew yũupa'ga txã'wẽ kwet wãatatajxa'wameetha'w. Nasaçxáag, naa kxahg Dxusthu jĭna Dxusa's weeçx we'we', txãa pa'ga txã'wẽ yũuya'watha'w.

³⁴ Txajũ' Jesusa' na'wẽk we'we:

—I'kwe'sx leyte i'kwe'sxtxi we'weçxa': Dxus i'kwe çjĭçmeena'? ³⁵ Jiitha'w Dxus libroute fxi'jni's maawa weeçx we'wewa'jme'.

Maawa Dxus yuwe's jxpa'gasayã'ja', Dxus i'kwe jĩnak we'we Dxusa'. ³⁶ Nawa adxa' txã'wěsaçxáameeth. Adxa' Dxus yuu txhitxhçxa naa kiwete kaahnisath, aç'a' adxa's çma'wě Dxusa's weeçx we'we'k Dxus Nçxi'kthu jĩna jĩya' ãjaki'kwe? ³⁷ Meeçxa' adx Tata mjĩi kaahnimeesaçxáatx wáa mjĩina ũsne'tka aç'a' adx we'wenitxi' jxpa'ganuwe. ³⁸ Nawa adx Tata mjĩi kaahnisatx yuh mjĩite', adx yu's jxpa'gameeçxawa, adx we'weniçxáatxwa miipa'gawe. Txã'wě yũuçxaçxáa jiyune'kwe, adx Tata' adx yakh ũsa', aç'a' adxa' Tata yakh ũstewa.

³⁹ Txã'jĩte', Jesusa's preesu'jçxa jxũna u'j wěetx. Nawa preesu'jmeyna, kasehna u'kh.

⁴⁰ Txajũ' Jesusa' Jordan yu'wala kuten u'jçxa', Juan nyafxĩi bautisãyna ũsu'k kxteek ũsu'.

⁴¹ Aç'a' nasa wala kuh thegya' pa'jçxa', na'wětx we'we:

—Juana' kim yuhwa ãjanimeesatx kaavxya'ja'jmeeçxawa, pta'sxku naa piçthě'j pa'jçxa ma'wě yũuwa'ja'swa, aç'a' txã' ĩsxiinimée jxuka kxtey yuuk jĩ'tx.

⁴² Txajũ' kxtee ũssa nasa' wala kuhsa Jesus kimtewa jiyutx.

11

Lasaro uunĩ

¹ Betania çxhabte teeçx piçthě'j Lasaro yaas-esak ãçã'na ũs yu', npe'sxwe'sx Maria Marta u'pni çxhabte. ² Txãa ãçã'sa npe'sx Mariak txã'wě Jesus çxidakhě wět putasa's awçxa tx-ajx dxkhasju adxi'jwa'jsa yu'. ³ Txãawe'sxa'

pxakhíitx dxiy ãçã'na ũste', Jesusa's pta'sxkahn yuwe kaah:

—Iidx namiku wedxnisa' wala ãçã'na ũsa' jīna.

⁴ Txajũ' Jesusa' naa pta'sxni's wēse'jçxa' na'jīk:

—Na'wē ãçã'na ũsçxawa, uuwa'jsa meea'. Naasáa Dxus ãjāni's āate kaavxya'ja'jna, txã'wēy Dxus Nçxi'k ãjani'swa kaavxya'ja'khançxáa txã'wē ãçã'na ũsa'.

⁵ Aça' Marta Maria txãawe'sx dxiy Lasaro yakha' Jesus wedxnisatx yu'. ⁶ Nawa Lasaro' wala ãçã'na ũsa' jīna pta'sxni's wēse'jçxawa, nee e'z eníik txajx u'junisu jxthēeyũ. ⁷ Txãa e'z en skhēwnijũ', Jesusa' na'jīnak we'we txãa yakh u'jusawe'sxtxi:

—Judea kiwen ki' u'jwega jīte', ⁸ txãawe'sxa' na'wētx pas:

—Kaapiya'jsa, mwēese'j. Txãwāsu' judiuwe'sxa' idxa's ikh wēçxa kwet wāatatajxa'watx yu', aça' ¿ma'wēga kxtey ki' u'j wēje'? jīte', ⁹ Jesusa' na'wēk pas:

—Isa ena' doce ora ¿ji'phmeena'? Maawa en u'juçxa' yu'spē'themée fxi'zetxna, eena' kweethniitene'ta fxi'ze' naa pa'ga. ¹⁰ Nawa kus u'juçxa', yu'spē'thetxna, eena' kweethnite u'jupa'gamée.

¹¹ Txajũ' na'jīk Jesusa':

—Kwe'sx namiku Lasaro' deeni', nawa adxa' fxītxya' u'jwe'nja jīte', ¹² txãa yakh u'jusawe'sxa' na'jītx:

—Deeniçxáa ũsçxa yu', fxīttxte' kiiteena jītx.

¹³ Lasaro' uuni ũstek Jesusa' txã'wē we'we. Nawa txãa yakh u'jusawe'sxa' jiyumeeçxa', ĩ'née deeniçaçxá'sne' we'we' sũju'ne'ta.

¹⁴ Txajũ' Jesusa' teehwedku āate pta'sx:

—Lasaro' uuni' jīna. ¹⁵ I'kwe'sxa' adx ājani's uyçxa' adx kintewa jiyukahñ, ewçxá'ntka kxtee ūsu'çmée. Txā'wē uuniyā'j ūstewa, thegya' u'jwega jīte', ¹⁶ Tomas melxisu jī'tx txā' na'wēk we'we vxite pi'kxna u'jusawe'sxtxi:

—Kwe'sxwa u'jwega Jesus yakh ja'da uuya' jīk.

Jesus ītxi vxit-sa

¹⁷ Jesus kxtee pa'jaçte', Lasaro's pedaní pahz enyā'kh yu'. ¹⁸ Aça' Betania çxhaba' Jerusalen çxhabuh e'z kilometro y medioçxáak jxu'kha ūsu'. ¹⁹ Aça' judiuwe'sxa' wala kuh pa'khu'ta txā'wē dxiy uute', npe'sxwe'sxtxi kvxiisxa'jya'. ²⁰ Aça' txāa entey Jesusa' pa'jaça' jīni's jiyuçxa', Marta' puutx uyya' kasejk. Nawa Maria' yatte neeyūuk.

²¹ Txajū' Marta' Jesus yakh puutx uyçxa' na'jīnak we'we:

—Idx ayte ūssawaça', uuwa'jmeene' yu' ū'kwe dxi'sxa'. ²² Nawa jiith Dxusa' jxuka ūsuna idx kīh pējxtewa jīte', ²³ Jesusa' na'wēk pas:

—I'kwe dxiya' ītxi yuuna jīte', ²⁴ Marta' na'wēk pas:

—Ū'kwe' jiith, uusaawe'sx ītxi yuu ente' ītxi yuuyujuna.

²⁵ Nawa Jesusa' na'jīk:

—Adxii uuniitewa ītxi vxit-sath, sa' pçumée ītxi fxi'zewa'ja'swa adxii peessath. Maawa adxa's ūuste jxpa'gasa' makwe uuçxawa ki' ītxi yu-utxna. ²⁶ Aça' maawa nee ītxi ūssa' adxna ūuste jxpa'gaçxa', bagaçxte yuhwa uuwa'jmée ītxi fxi'zetxna. Adx we'weni' isa yuhtxna çsūju'kwe'? jīte', ²⁷ Marta pasçxa':

—Txã'wě yuhna sũju'th. Idxa' Kristog, Dxus Nçxi'k naa kiwete kãisa jĩk.

Jesus ũ'neni

²⁸ Txã'wě we'wena jxã'jçxa', Marta' yatna sxawedna u'kh nyakha's pa'yaya'. Sa' na'jĩnak susmée we'we:

—Kaapiya'jsa ayte yã'j ũsa', sa' i'kwe's yuu kaakh.

²⁹ Txã'jĩ'çpkaçxa', Maria' kiitena' wala dud u'kh Jesusa's puutx uyya'. ³⁰ Jesusa' Betania çxhabte u'kameyku yu', Marta yakh mteene' puutx uy kxtee nee ũsiyçxáak yu'. ³¹ Aça' Maria' kiiteçxa wala dud skhẽwte', judiuwe'sx txãa yatte kvxiisxa'jna ũssa' e'stey u'jtx, pedaní kafxte wáa ũ'neya' u'jweçna sũhçxa.

³² Txajũ' Maria' Jesus tasxte kũhna'wa, pee-jxũkweçxa na'wěk we'we:

—Kwe'sxtxi jxpe'jsa, idx ayte ũssawaça', ũ'kwe dxi'sxa' uuwa'jmeene' yu' jĩnak we'we.

³³ Txã'wě Maria vxite' judiuwe'sx pi'kxna yuusa ũ'neçte Jesusa' uyçxa', txãawa wala nxusçxa' ³⁴ pẽjxku:

—¿Mteekwe pedáa? jĩte':

—Myuh wakx thegya' jĩtx.

³⁵ Aça' Jesusa' ũ'nek. ³⁶ Txã'wě Jesus ũ'neçte uyçxa', judiuwe'sxa' na'jĩtx:

—Mthegwe ma'wěga wala peeygãja'.

³⁷ Nawa maaí yu' na'wětx we'we:

—Naa piçthẽ'ja' uyya' ājasameetxwa kaauyu'ju'k na' ¿kĩhçxáawa yũuya' ājawa'jmée ma'k yu' Lasaro uukahmén?

Lasaro's ĩtxi vxitni

³⁸ Txajũ' Jesusa' ki'kin wala nxusna utxaak Lasaro's pedaní kafxte. Txãa kafxa' dxiiga pwa'ja'nik yu', açá' u'kani vxitxte yu' kwetku aphni yu'. ³⁹ Jesusa' na'wêk jxkaah:

—Aphni kweta's mkiiswe jĩte', uusáa npe'sx Marta' na'jĩk:

—Uuní pahz enyã'ja', açá' phadete' çkaxx putameema'k? jĩte', ⁴⁰ Jesus we'weçxa':

—Adx pta'sxnitxi' txã'wê yuhna sũhna ũuste jxpa'gaçxa', Dxus ma'wêsatewa jiyune'kwe çjĩçmeetka'?

⁴¹ Txã'jĩte', txãa aphni kweta's kiistxi. Açá' Jesusa' cielute pagayçxa na'wêk we'we:

—Tata, adx pēyni's pasu'g naa pa'ga weçxa'th.

⁴² Adxa' jĩith, idxa' bagaçxtewa adxa's pasu'g. Nawa txã'jĩna ãateth weçxá', ayte nasa ũsta' txãawe'sx wêse'jçxa', adxa'sa' Dxus kaahni yuh yu'ne' sũjkahn.

⁴³ Txã'jĩçxa', Jesusa' susku we'we:

—Lasaro, txãajũ mkaaseh jĩçpkaçxha', ⁴⁴ uusá' ãtxi yuuçxa kasejk, çxida, kuse petx dxi'p yã'jçxa yapni. Açá' Jesusa' khibkaakh u'jya' ãjãkahn.

Jesusa's ikhya' puutx we'weni

(Mt 26.1-5; Mr 14.1-2; Lk 22.1-2)

⁴⁵ Uusá's ãtxi vxitni's uyçxa', Maria's pi'kxna ũssa judiuwe'sxa' Jesusa's ũuste jxpa'gaçxatx neeyũ. ⁴⁶ Nawa vxite judiuwe'sx açesa yu' fxariseowe'sx tasxna u'jçxa', Jesus txã'wê uusá's ãtxĩ vxitni's pta'sxtxi. ⁴⁷ Açá' fxariseowe'sxa' sacerdote npiiçthē'jwe'sx yakh pkhaakheçxa', na'jĩnatx puutx we'we:

—Naa piçthê'ja' naa kiwete kim yuhwa ãjanimeesatx kaavxya'ja'jna kîjkîhwa yûuna ũsa'. Aça' ¿kîh yuukxtha'w? ⁴⁸ Txãa piçthê'ja's kîhçxáawa yûumeete', nasa' jxukay txãa yakhçxaçxáa u'jwetxna. Aça' Romajũ nasa kwe'sx dxuus yata's ivxiituçxa', kwe'sxtxiwa ivxiitutxna.

⁴⁹ Txajũ' txãa anxute sacerdote npiiçthê'j Kaifxasa' na'wêk we'we:

—I'kwe'sxa' ũus yajkxya'çxáa yuhwa ãjã'çmeei'kwe. ⁵⁰ Kwe'sx jî'j jxuka yu' vxitukahmen wejxwa jxukasa pa'gate teeçx yuuçxáa vxituwaççxáa wejx ewna. Txã'wê yûuwa'ja's ũus yajkxya' i'kwe ãja'çmêe.

⁵¹ Kaifxasa' txãa anxute' sacerdote npiiçthê'kh yu', sa' peekxçxáa txã'wê yajkxçxa we'wemeene'. Jesusa' judiuwe'sx jxukaysa pa'gate txãaçxáa uuwa'thene' Dxusa' Kaifxasa's txã'wê we'wewa'ja's kaaũusuthe'j. ⁵² Nawa judiuwe'sxtxi nwe'weya'çxáameene' txã'wê uuya'wa yu'. Dxus luuçx mtee mteewa ũstxna txãawe'sxtxiwa pkhakhya'k txã'wê uuya'wa yu'. ⁵³ Aça' txãajũjx judiu npiiçthê'jwe'sxa' Jesusa's ikhya' puutx we'wetx.

⁵⁴ Txãa pa'gak Jesusa' Judiuwe'sx ksxavxysu u'juya' ãjãmeeçxa', Judea kiwejũ kasehna u'j txãa yakh u'jusawe'sx yã'jçxa teeçx çxhab nasa u'pnimêe ja'dasu Efxrain yaasesa ũsu'k kxtee ũsya'.

⁵⁵ Txajũ' Judiuwe'sx fxiesta Paskua en ãjaçku yu'. Aça' wala kuh nasa' u'jtx Jerusalenna, Paskua fxiesta ãhmeyna txãawe'sx kakwete pkaltxi yaateçxa ũsya'. ⁵⁶ Kxte' Jesusa's pakwena

yã'jtx ũs yu' sa' dxuus yatte na'wẽtx puutx paapẽyi':

—¿Ma'jĩki'kwe? Jesusa' fxiestate ũsya' ¿yuh-manx?

⁵⁷ Txajũ' fxariseowe'sx vxite' sacerdote npiiçthẽ'jwe'sxa' neewe'wetx maaçxáawa Jesusa' fxiestate ũste jiyuçxa' txãawe'sxtxi pta'sxkahn tudxa' kaajxa'.

12

*Wẽt putasa's Jesus çxidakhẽ teeçx u'y awni
(Mt 26.6-13; Mr 14.3-9)*

¹ Paskua fxiesta ãjxa' seis en peejiyna, Jesusa' Betania çxhabna u'kh, Lasaro uuniitewa ïtxi vxitku kxtee. ² Kxteea' ũ'wa'j pheu'jtx Jesusna weçxana, naapkaçxha' Marta yu' puuçuçsak yu'. Aça' Lasaro' Jesus yakh kaçxku ũ'ya'. ³ Txajũ' Maria' teeçx libra ãjk wẽt putasáa wala pa'gasa's jxũna pa'jçxa', Jesus çxidakhẽ sxũsxçxa', tx-ajx dxkhasjuk adxi'. Aça' yat dxiite txãa wẽt putasaçxáa jxuka utak.

⁴ Txajũ' Jesus yakh u'jusa Simon nçxi'k Judas Iskariote yaasesa' Jesusa's ikhkahn dukhwa'jsa' na'wẽk we'we:

⁵ —¿Ma'wẽteki'k naa u'ya' wẽt putasa's tres cientos pesote txweyçxa nasa puuplesatx peesu'çmée? jĩk.

⁶ Nawa Judasa' puuplesatx pees jxthãasçxa txã'jĩçme'. Txã' vxyuu jxaawsak yu', nawa vxyuu pkhakhnitx kim yuhwa jiyunimée paaçte nkuutxi'ji'u'ga, txãasak txã'wẽ we'we'.

⁷ Txajũ' Jesusa' na'wẽk we'we:

—Naa u'ya's txã'wẽ yuja' we'wewa'j ji'phmeeg. Naa wět putasa's adx kakwe's pedaaçtewe'sxku jxaawni ji'phu'. ⁸ Puuplesa' bagaçxtewa i'kwe'sx yakh nes yuutxna. Nawa adxa' jwee yu' i'kwe'sx yakh nes yuuwa'jsameeth jĩnak pta'sx.

Lasaro's ikh wēeni

⁹ Jesusa' Betaniate ũsa' jĩni's jiyuçxa', judiuwe'sx wala kuhsa pkhaakheçxa Jesusa's thegya' txãa çxhabna u'jtx. Nawa Jesusçxá's thegya' u'jmée, Lasaro's ja'datx thegya' u'j, txã'sa' uuniitewa Jesusa' ki' ĩtxi vxitku txãa pa'ga. ¹⁰ Txajũ' sacerdote npiiçthē'jwe'sxa' puutx we'wetx Lasaro'swa ikhya', ¹¹ txã's Jesus ĩtxi vxitpa'gaçxáa judiuwe'sx wala yã'j txuteeçxa Jesus yakhtxi u'jweç yu' naa pa'ga.

Jerusalente Jesus u'kani

(Mt 21.1-11; Mr 11.1-11; Lk 19.28-40)

¹² Jerusalente Paskua fxiestate nasa wala pa'tha. Sa' kuskus enkhē' Jesuswa Jerusalente fxiestate pa'jana jĩni's jiyuçxa', ¹³ lamus eç spē'thçxa Jesusa's pu'thegya' kasehtx. Sa' na'jĩnatx sus we'we':

—;Dxus txakwe ewte, teeçx yuja' Dxus kaahni, Israelwe'sxtxi Jxkaahsa wala ewsa! jĩnatx weçxá'.

¹⁴ Txajũ' Jesusa' teeçx buçxu ũste uyçxa', txãatek a'jçxa u'j, Dxus libroute na'wẽ fxi'jni' txãa kxtey yuukahn:

¹⁵ Ũukhnuwe, Sion çxhabetewe'sx.

Mthegwe, i'kwe'sxtxi Jxkaahsa yuja', teeçx buçxute a'jçxa jĩnak fxi'jni yu'.

¹⁶ Txãapkaçxhíi yu', Jesus yakh u'jusawe'sxa' jiyumeeta' txã'wẽ yũuni's. Nawa Jesus cielun u'jnite', jiyutx txã'wẽ fxi'jni' kxtey yuutewa.

¹⁷⁻¹⁸ Txã'wẽ uusá's Jesus ìtxi vxitpa'gatx nasa jiyuwẽesa' txakwe wala pu'thegya' kaseh, Lasaro's ìtxi vxituçte' kxtee ih thegna ũssa' jiimeesatxwa pta'sxne'ta txãa pa'ga.

¹⁹ Txajũ' txã'wẽ nasa pu'thegya' kasehpa'gaçxáa fjariseowe'sxa' na'jĩnatx ũusçxa we'we' txãawe'sx pwe'sx:

—Mthegwe wakx, kĩh yuhwa yũuya' ajaçmeetha'w, naapkaçxçxáa nasa' jxukay Jesus yakhçxaçxáa u'jweçta' jĩ'tx.

Greciajũwe'sx Jesusa's pakwení

²⁰ Jerusalente fxiesta ente jxu'j kiwe Greciajũwe'sx pa'jçxa ũsu'tx. ²¹ Txajũ' Greciajũwe'sxa' Galilea kiwesu Beçaidatewe'sx Fxelipe's utxaana kũhçxa', na'wẽtx pxthaa we'we:

—Jesusa'stha'w puutx uy wẽje' jĩte', ²² Fxelipe' u'jçxa Adresa's pta'sxku, sa' txajũ' e'zsay Jesusa's pta'sxya' u'jtx. ²³ Aça' Jesus we'weçxa':

—Dxus Nçxi'k Nasa Yuusa' uuçxa ki' ìtxi yu-uwa'j en ajaça'. ²⁴ Na'jĩ'th na': Teeçx sku-utxh nxinxá' kiwete weteçxa uumeeçxa yu', pehnamée teeçxçxáa nes yuuna. Nawa uuçxa buçxaçxa', jweeíçxáa penana. ²⁵ Maawa naa kiwete ìtxĩ fxi'zewa'jçxá's yaakxsa' pçuwa'jmée ìtxĩ fxi'zewa'ja's ivxiitutxna. Nawa naa kiwete ìtxĩ fxi'zeni's yaakxsame', pçuwa'jmée ìtxĩ fxi'zewa'ja's ji'phutxna. ²⁶ Maawa adxa's selpíi wẽeçxa', adx yakh yuweena, sa' adx mtee ũste'

txãawa kxtey ũsya' ãjana adxna selpiisa'. Aça' maawa adxna selpisaatxi's adx Tata' tuuthe'jena.

Jesusa' txajx uuwa'ja's pta'sxni

²⁷ ãçha' wala nxusna ũsthu, sa' ¿ma'jĩtká? Meeçxa' Tata, adxa's meen nwe'we pxthaa yuukahmen jĩte, ewwáanaxk. Nawa txã'wẽ pxthaa yuuya'íçxáath yuwé' na' txã'jĩme'nja. ²⁸ Tata, maawa idxna jiyuwa'jçxá's mkaavxya'ja'j.

Txajũ' cielujũ we'weni na'wẽk pthũuse:

—Adxna jiyuwa'ja's kaavxya'ja'jyã'th. Nawa maawa adxa's jiyukahn ki' kaavxya'ja'jya'wath jĩnik pthũuse.

²⁹ Aça' nasa' txã'wẽ cielujũ we'weni's wẽse'jçxa':

—Kpi'sxne' txã'jĩ jĩ'tx, naapkaçxha' vxite yu':

—Teeçx angelne' txã'wẽ we'we jĩ'tx.

³⁰ Txajũ' Jesusa' na'jĩk:

—Txã'wẽ we'weni' adxna pta'sxna we'weme', i'kwe'sxtxi pta'sxnak txã'wẽ we'we jiyukahn.

³¹ ãçha' naa kiwete jxukaysa yuuwesa yuuwa'j en ãjk, naapkaçxha' naa kiwete jxkaahna ũssa eçxthẽ'j yu' peena yu' jxkaajxa' ãjãwa'jmeete neeyũuna. ³² Txã'wẽ adxa's êekhẽ ki'pnijũ', jxukaytxi nwe'weya' ãjã'nja.

³³ Txã'wẽ we'weçxak kaajiyu'j ma'wẽ uuya'waçxawa.

³⁴ Txajũ' nasa' na'wẽtx we'we:

—Kwe'sxa' Dxus librute leya's iiwẽse'tha'w, aça' Kristo' bagaçxte yuhwa uuwa'jmée itxi u'juwa'jsa' jĩ'k. Aça' idxa' ¿ma'wẽga Dxus Nçxi'k Nasa Yuusa's êekhẽ ki'pni yuuna jĩna we'we'?

Dxus Nçxi'k Nasa Yuusa' ¿kimna? jĩte', ³⁵ Jesusa' na'jĩnak pas:

—Eena'sa' i'kwe'sx yakh nee ũsuna, nawa maz ençxáa ũsuna. Txã'wēte' eena'te fxi'zewa'ja's mpa'gawe, eena'sa' nee ũsiyna, kxah çxhi'dxsa' i'kwe'sxtxi kpajkxmeena. Txã'wēme', çxhi'dxte u'jusa' maa dxi'j ewsatewa jiyuya' ājã'çme'. ³⁶ Nee i'kwe'sx yakh ũsiyna, eena'sa's mjiyuwe, kxah eena'te fxi'zesa yuune'kwe.

Txã'wē we'wena jxã'jçxa', Jesusa' u'jçxa vxyaame'.

Judiuwe'sxa' Jesusa's jxpa'gameeta'

³⁷ Kim yuhwa ājanimeesa's txakwe wala kaavxya'ja'thewa, nasa' jiyuya' āja'çmeeta' Jesus kimtewa. ³⁸ Nawa Dxus yuwe pta'sxsa Isaiás fxi'jçxa nvxiitni' kxtey yuukahntxi txã'wē yuu: Kxte' na'jĩ'k:

Kwe'sx pta'sxni's ¿kimçxá' jxpa'gata'?

Dxusa' txajx ājani's ¿kimtxiga kaavxya'ja'j? jĩ'k.

Kristo's jiyuya' ājawa'jsameene'ta yu', txãa pa'gak Dxus yuwe pta'sxsa Isaiasa' txã'wē fxi'jçxa nvxiht.

³⁹ Sa' Isaiasa' ki' we'weçxa':

⁴⁰ Dxusa' txãawe'sx yafxtxi aphku uyya' ājãkahmén.

Sa' txãawe'sx ũustxiwa nuywejik jiyukahmen, Sa' Dxus tasxte sxawedçxa katxhiwa'ja'swa nvx- ihtme' jĩ'k.

⁴¹ Jesus ma'wē yuuwa'jsatewa jiyuçxak Isaiasa' txã'wē we'wena fxi'j.

⁴² Txã'wētewa, judiuwe'sx wala kuhsa Jesus kimtewa jiyutx, maaíi yu' npiiçthē'jwe'sx

yã'jçxa. Nawa fxariseowe'sx ahçeqça txãawe'sx pkhaakhenijũ kutxi'jçxa peena yu' pa'jwa'jmée vxitkahmen, ãate yu' pta'sxi'çmeeta' ũukhçxa. ⁴³ Txãawe'sxa' nasaa tuuthe'jniçxá's wejx ji'phu wëeçxatx txã'wë yu'.

Ney pta'sxkaahni's Jesus pta'sxni

⁴⁴ Txajũ' Jesusa' na'jĩnak we'we:

—Maawa adxna ũuste jxpa'gasa', adxçxáana jxpa'gamée, adxna kaahsa Tatanawa jxpa'gana.

⁴⁵ Txã'wëy maawa adxna uysa', adx Tata'swa uysáa yuuna. ⁴⁶ Adxa' nasatx eena'te

kaafxi'ze'jya'th kĩh, kxah adxna ũuste jxpa'gasa' çxhi'dxte neeyũumeetxna. ⁴⁷ Nawa maawa adx pta'sxni's wëse'jçxawa kxtey nwëese'jmeete', txã'wë yũusa's ewmeete nvxiitwa'jsa' adxmeeth. Adx yu' naa kiwetewe'sxtxi ewmeete nvxihtxa' yuwe'çmeeth, wejxwa nwe'weya'th yuwé'.

⁴⁸ Adxa's wa'lçxa adx pta'sxnitxi' kxtey yuumeete', txã'wë yũusatx ewmeete nvxiitwa'jsa ũsa': ãçxh na'wë adx pta'sxna we'we'th txãa pta'sxnisáa íçxáa ewmeete nvxiitwa'jsata' nmeh ente'. ⁴⁹ Txãa pa'gatey adxçxáa we'wena pta'sxiçmeeth. Adxna kaahsa Tataíik

txã'wë pta'sxkaja', ⁵⁰ kxah adxa' jiith adx Tata we'weni' bagaçxte yuhwa pçumée itxi kaafxi'ze'jwa'jsatewa. Aça' adx Tata ma'wë pta'sxkaathe', txã'sna íçxáath adxwa pta'sxi' jĩnak we'we Jesusa'.

13

Jesusa' txãa yakh u'jusawe'sx çxidatx pkhi'kxni

¹ Paskua fxiesta ãjxa' teeçx ençxáa pejiičku yu'. Aça' Jesusa' jiik yu' naa kiwe's nvxihtçxa Ney tasxna u'jwa'j en ãani's. Sa' naa kiwete txãa yakh u'jusawe'stxi' nyafxiitey ma'wêne' peeygãh na', nmeh entepkaçxku peeygãh.

² Jesusa' txãa yakh u'jusawe'sx yakh ũ'na u'ppkaçxha', eçxthê'ja' Simon nçxi'k Judas Iskar-iote's kaaũusuthe'jeçyã'kh yu' Jesusa's ewmeesa kusete dukhahn. ³ Aça' Jesusa' jiik yu' Dxus tasxune' yuusa yu' sa' ki' Dxus tasxnay u'jwa'ja's. Sa' txã'wëy jiik yu' Dxus ma'wëçxah jxkaahwa'ja'swa txãaçxaçxá's dukhni'swa.

⁴ Txajũ' Jesusa' ũ'na u'píi kiitena'wa, atxhna ki'pçxa, toalxa's jxtuhdku. ⁵ Sa' kuse khweeçxaniite yu' awna', mesate ih ũ'na u'psa çxidatx pkhi'kxna', toalxaju adxi'k.

⁶ Sa' Simon Pedro çxidatx pkhi'kxya'wate', txã' na'wëk we'we:

—Kwe'stxi jxpe'jsa yuja', ¿adx çxidatx pkhi'kxma'g? jíte', ⁷ Jesusa' na'wëk pas:

—Ãçxhíi yu' jiyumeene'ga na'wë yũuni's. Nawa e'su' jiyune'ga.

⁸ Txã'jítewa, Pedro' ki' na'jík:

—Idxa' adx çxidatx pkhi'kxwa'jsameeg jíte', Jesusa' na'jĩnak pta'sx:

—Idxa's pkhi'kxmeete', adx yakh ũ'sya' ãjameene'ga jíte', ⁹ Simona' na'wëk pxthaa we'we:

—Txã'wëyã'the', çxidaçxáatx pkhi'kxmée, kuse petx dxikthé yã'jçxa meen pkhi'kx jík.

¹⁰ Nawa Jesusa' na'jík:

—U'se pēwçxa ũssa', jxuka ateyã'tha', kxah çxidaçxáatx pkhi'kxwa'j peejxta'. I'kwe'sxa' ateyã'ji'kwe, nawa jxukasa yu' ate ũsmeei'kwe.

¹¹ Jxukaysa yu' ate ũsmeei'kwe jīnak we'we, txã's ikhkahn dukhwa'jsa's we'weçxak txã'jī.

¹² Txajū' Jesusa' txãawe'sx çxidatx pkhi'kxna jxã'jçxa', atxha's jxkahçna' mesate ki' kaçxçxa na'jīnak paapējx:

—¿I'kwe'sxa' jiyu'kwe' adx txã'wē i'kwe'sx çxidatx pkhi'kxte? ¹³ I'kwe'sxa' adxa'sa' kaapiya'jsa, jxpe'jsa, jīçxa', isa yuh we'we'i'kwe, adxa' txã'wēsa yuhth naa pa'ga. ¹⁴ Adxa' kaapiya'jsa, jxpe'jsaçxawa i'kwe'sx çxidatx

pkhi'kxthu aç'a' i'kwe'sxwa txã'wēy çxidatx puutx ya'pkhi'kxna mfxi'zewe teeçssa na'wēçxaçxáa. ¹⁵ Adx na'wēy yūuna fxi'zekahnthu i'kwe'sxtxi txã'wē selpii.

¹⁶ Isath we'we', maawa selpisa' txajx patronte jxthaakwesame', aç'a' txã'wēy kaahnisawa txã's kaahsate jxthaakwesame'. ¹⁷ Na'wē selpiwa'ja's jiyuçxa kxtey yuuna fxi'zeçxa', weçx weçxa fxi'zene'kwe.

¹⁸ I'kwe'sx jxukaysa yuutxi' txã'jī'çmeeth. Jiith kimçxah adx txhitxhnisatewa. Nawa Dxus li-brute na'wē fxi'jni ũsa': Adx yakh ih ũ'saçxawa, adxa's ahççxa kiikhe'jya'wa' jīna fxi'jni' kxtey yuukahnthu txã'jī'. ¹⁹ Açxhii pta'sxiçthu, kxah kxtey yuute', adxa's ew jiyune'kwe Dxus Nçxi'kdxihtewa. ²⁰ Isath we'we': maawa adx kaahnisa's jxpa'gaçxa', adxa'swa jxpa'gasa yu-una. Sa' adxçxáana jxpa'gamée, adxa's kaah-sanawa jxpa'gasa yuuna.

*Judasa' Jesusa's ewmée yũuya' yaakxni
(Mt 26.20-25; Mr 14.17-21; Lk 22.21-23)*

²¹ Txã'jĩna jxã'jçxa', Jesusa' nxusnxus yajkçxa ãatek we'we:

—Isath txã'jĩ', i'kwe'sx yakh u'jusa teeçxa' adxa's ahççxa ewmeesa kusete dukhya'wa' jĩk.

²² Txajũ' kimna txã'jĩtewa jiyumeeçxa', dxi'p iisaçxáatx puutx thegu' txãawe'sx pwe'sx.

²³ Teeçxa' Jesus pukate ih u'psa' Jesus wedxnisak yu'. ²⁴ Aça' Simon Pedro' kimna txã'jĩtewa jiyu wẽeçxa', txãa ih u'psa's kuseju pta'sxku paapẽykahn. ²⁵ Aça' Jesus pukate ih u'psa' tuphiçxa na'jĩnak paapẽjx:

—Jxpe'jsa, mpeeta'sx çkim idxa's txã'wẽ ahççxa dukhwa'jsana? jĩte', ²⁶ Jesusa' na'jĩnak pta'sx:

—Pana's tuupha'jçxa maana ũsu'nja txãa adxa's dukhwa'jsa' jĩçxa', pana's tuupha'jna'wa Simon nçxi'k Judas Iskariote'sku ũs. ²⁷ Aça' Judasa' pana's jxpa'gaçpkaçxha', eçxthẽ'ja' txajx ũuste u'kak.

Aça' Jesusa' Judasa's na'jĩnak we'we:

—Kĩh yũuya'waçxawa, dud kxtey myuu jĩte', ²⁸ mesate ũ'na u'psa' maa yuhwa jiyumeeta' txã'wẽ we'weni's. ²⁹ Maaíi yu' na'wẽtx yaaki': Judasa' vxyu jxaawsate', kxah wá' Jesusa' fxies-tate peejiwa'ja's weykaja', meeçxawa puuplesatx wá' kĩhçxáawa peeskaja' sũju'tx. ³⁰ Naapkaçxha' Judasa' pana's ũ'na'wa kasehna u'kh. Txã'wẽ yuuçte', çxhi'dxni yã'kh yu'.

U'se jxkaahnisa

³¹ Judas u'jni e'su', Jesusa' na'wẽk pta'sx:

—Dxus Nçxi'k Nasa Yuusa's açxha' tuuthe'jnik yuu, aça' Nçxi'kwa Neyas tuuthe'kh. ³² Dxus Nçxi'k Nasa Yuusa' Neyas tuuthe'jeçpkaçxha', Neywa Nçxi'ka's tuuthe'jena, nawa açxhíi txã'wē yuuya'wa'. ³³ Adx nçxi'kkuēwe'sx, jwee yu' txaçx ũsme'nja i'kwe'sx yakh. Adxa' judiuwe'sxtxi nyafxíi we'weçxa': I'kwe'sxa' adxa's pakweene'kwe. Nawa adx u'jweçthu kxte' yujxa' ãjameene'kwe jĩnath we'we, sa' i'kwe'sxtxiwa txã'wēyçxáath we'we'. ³⁴ I'kwe'sx yakh nvxiituçthu u'se jxkaahnisa's, puutx ya'peeygãhna fxi'zewa'ja's. Adx ma'wētká i'kwe'sxtxi peeygãhna fxi'ze', txã'wēy i'kwe'sxwa puutx ya'peeygãhna mfxi'zewe. ³⁵ Txã'wē puutx ya'peeygãhna fxi'zete', maa nasawa jiyutxna i'kwe'sx adxa's nwēese'jsatewa.

*Pedro' ĩsxiiwa'jsatewa Jesus pta'sxni
(Mt 26.31-35; Mr 14.27-31; Lk 22.31-34)*

³⁶ Txajũ' Simon Pedro' na'jĩnak Jesusa's paapējx:

—Jxpe'jsa, ¿mtee u'jweçga? jĩte', Jesusa' na'jĩnak pta'sx:

—Adx u'jweçthu kxte' yujxa' ãjameene'ga açxhíi yu'. Nawa e's yu' yuweene'ga jĩtewa, ³⁷ Pedro' ki'kin paapējxku:

—Jxpe'jsa ¿kĩh yuuçxa açxhíi yu' yujxa' ãjamée yuuki'th? Adx uuwa'ja's yuhwa ũukhya'mée ũsthu, idxa's peeygãaweete jĩte', ³⁸ Jesus we'weçxa':

—¿Isaga txã'jĩ'á'? Nawa adxa' na'jĩ'th na': atalx we'wemeyna, adxa's jiimeeth jĩna tekh us ĩsxiijaçyã'j yuune'ga jĩk.

14

Jesusa' Dxus tasxte kaapa'ja'jwa'jsa

¹ Jesusa' na'jĭk:

—I'kwe'sx ũuste fxĭikāhna nxusméé meswe. Wejx yuuwa Dxusçxá's yajkxna meswe, sa' adxnawa txã'wěyçxáa yajkxna meswe. ² Adx Tata ũsnite', jxkaasena ũswa'j wala ũsa'. Txã'wě méewaça', meea' jĭna pta'sxni yã'j yu'nja i'kwe'sxtxi. Txãa pa'ga i'kwe'sx kxtee pa'jwa'ja's pheu'jya' u'jweçthu. ³ Sa' u'jçxa kxtee i'kwe'sx pa'jwa'ja's pheu'jçxa', ki' sxawedu'nja i'kwe'sxtxi pe'jna u'jya', kxah i'kwe'sxwa adx ũsnitey adx yakh ih ũsune'kwe. ⁴ I'kwe'sxa' jĭi i'kwe mtee u'jweçtewa, sa' dxi'jnawa jĭi i'kwe.

⁵ Txajũ' Tomasa' na'jĭnak pějx:

—Jxpe'jsa, mtee u'jweçne'ga nawa kwe'sxa' jiimeetha'w, sa' dxi'ja'swa jiimeetha'w jĭte', ⁶ Jesusa' pta'sxku dxi'ja's:

—Adx yuuçxáa Dxus tasxte kaapa'ja'jwa'jsath, sa' adx yuuçxáa kaypuba'jwa'jsameeth, sa' adx yuuçxáa ĩtxi kaafxize'jwa'jsath. Aça' adxpa'ga yuuçxáa maawa adx Tata tasxte pa'jya' ājatxna. ⁷ I'kwe'sxa' adxa's jiyuwaça', adx Tata ma'wēsatewa jiyune'kwe. Txã'wěçxawa āçxha' jiyu i'kwe, uyna ũsi'kwe txãa adx Tata'. ⁸ Txãa adx Tata' jĭte', Fxelope' na'wěk pějx:

—Jxpe'jsa, iidx Tata's āate mkaavxya'j kwe'sx uykahn. Txã'wěçxáa peejxtha'w jĭte', ⁹ Jesusa' pta'sxku:

—Adxa' i'kwe'sx yakh nakwe txaçx ũsthu aça' ¿āçxh pa'jwa adxa's jiyumey wá'ga? Adxna uysa', adx Tatanak uyu'. Aça' ¿ma'wēga

Tata's mkaavxya'j jīna pēyi'? ¹⁰ Jiyu'çmée wá'ga, adxa' Tata yakh bagaçxtewa nesthu yu', aça' txã'wēy Tatawa adx yakh nesa'. Na'wē we'we'th na' peekx ūsuh yajkçxa txã'wē we'we'çmeeth. Tata adx yakh ūssa txāa we'wekaatheçxáath we'we'. ¹¹ Jiyuçxa mneeyūuwe: Bagaçxtewa adxa' Tata yakh e'zsay ih nestha'w yu'. Txã'wē e'zīi ihne'ta fxi'ze' sūhmeeçxawa, adx mjīinisaçxáatxwa uyçxa', Tata yakh ūssaçxak txã'wē ewsatx mjī' sūhna mneeyūuwe. ¹² Isath we'we', adxna ūuste jxpa'gasa' adx na'wēy mjīiya' ājatxna. Nawa txã'wēçxáamée, adx mjīinite jxthaakwe wala mjīiya' ājatxna, txã'wē ājakahníçxáa adxa' u'jweçthu Tata tasxna. ¹³ Sa' i'kwe'sxa' Tata's kīh pēywa'j ji'phçxawa, adxa's pēyine'kwe aça' adxa' i'kwe'sx pēyni's jxuka kxtey yu'nja, kxah Nçxi'kpa'gate Tata weçxani yuuna. ¹⁴ Na'jī'th na': adxa's kīh pējxtewa jxuka kxtey yu'nja.

Jesusa' Dzus Espiritu's kaajxa' neeyūuni

¹⁵ I'kwe'sxa' adxa's peeygājaççxa', adx jxkaahnitxi' nwēese'jna kxtey myuuwe. ¹⁶ Aça' adx Tata's i'kwe'sx pa'gate neewe'we'nja, i'kwe'sxtxi pu'çxwa'jsa teeçx adx na'wēysa's kaakhan. Txã' Dzus Espiritu isasaçxá's kaajiyu'jsa' txã' bagaçxtewa i'kwe'sx yakh nes yuuna. ¹⁷ Naa kiwetewe'sxa' txāa Espiritu's uyya' ājameeçxa' jiyuya'wa ājameetxna, txāasa jxpa'gaya'wa ājameetxna. Nawa i'kwe'sxa' jii yā'ji'kwe, txāa Espiritu i'kwe'sx yakh ūstewa, sa' bagaçxtewa txutemée nes yuuna. ¹⁸ I'kwe'sxçxáatx nvxihtxa'wameeth. Ki'

sxawedu'nja i'kwe'sx yakh ũsya'. ¹⁹ Naajũ' txaçxmeynaçxáa nasa' adxa's peena yu' uymeetxna. Nawa adxa' uuwa'jsameeth, txãa pa'ga i'kwe'sxwa uuwa'jsameei'kwe, txãasa i'kwe'sx yu' adxa's uyuune'kwe. ²⁰ Txajũ txãa ente ew jiyune'kwe adxa' Tata yakh nes yuusatewa, naapkaçxha' i'kwe'sxa' adx yakhi'kwe nes yu' aça' adxa' i'kwe'sx yakthu nes yu'. ²¹ Adx jxkaahnitx nwẽese'jna kxtey yuuna fxi'zesa' adxa's isa ũusuh jxuka yaakxsaçxa txã'wẽ yuutxna. Aça' adx Tata' txã'wẽ yũusatxi' peeygãjana, aça' adxwa txã'wẽ yũusatxi' peeygãhçxa äate vxyaana nes yu'nja.

²² Txã'jĩte', Judas Iskariotemée, vxite Judasa' na'wẽk pẽjx:

—Jxpe'jsa, ¿kĩh yuuçxa kwe'sxçxáatx äate vxyaaçxa', vxite nasa naa kiwetewe'sx yuutxi' vxyaamée yuuki'g? jĩte', ²³ Jesus pasçxa':

—Adxa's ũusuh jxuka yaakxsa' adx jxkaahnitx nwẽese'jna kxteytxi yu'. Aça' txã'wẽ yũusatxi' adx Tata' peeygãja'k. Aça' txã'wẽ nwẽese'jsa yakh yu' nes yu'nja'w Tata yakh. ²⁴ Nawa adx jxkaahnitx nwẽese'jsame', adxa's yaakxsameeçxa txã'wẽ yuuna. Na'wẽ adx kaapiya'jnitx wẽse'ji'kwe txã' adxçxáa kaapiya'jnimeeta'. Adx Tata kaapiya'jnita'.

²⁵ I'kwe'sx yakh nee ũsí na'wẽ pta'sxiçthu. ²⁶ Nawa Dxus Espiritu's Tata' kajana adx na'wẽy i'kwe'sxtxi pu'çxna ũskahn txã' jxuka kaapiya'jana. Sa' na'wẽ kĩhwa pta'sxthu txãatxi'sa' jxuka kaayaki'jina.

27 I'kwe'sx ũuste wēt yajkxna fxi'zewa'ja's peesuçthu. Naa kiwete wēt fxi'zewa'ja's nasa ũsu'tx txã'wësaçxá's peesuçmeeth. Adx ma'wëtká ũuste wëtçxáa yajkxna fxi'ze' txã's i'kwe'sxtxi peesuçthu. Txãa pa'ga fxïikâhna ũukhmée meswe. 28 U'jçxa ki' sxawedu'nja i'kwe'sx yakh ũsya' jïni's wëse'jyã'ji'kwe na', adxna isa wedxdxihçxa', weçxweçxa yaakine'kwe, txãa pa'gatey adxte jxthaakwesa adx Tata tasxna u'jweçthu naa pa'ga. 29 Dxiikhëy pta'sxiçthu, kxah adx pta'sxni kxtey yuuna pa'the', isa yuh pta'sxi'ga sũjune'kwe.

30 I'kwe'sx yakh jwee yu' we'wena ũsya' âjame'nja, txãa pa'gatey naa kiwete jxkaahna ũssa eçxthë'ja' adxa's kïhwa yũuya' âjane'jmeeçxawa, yuja'. 31 Makwe âjane'jmeeçxawa kxtey yuuna, kxah naa kiwete nasa jxukaysa jiyutxna, adx Tata's nwëese'jçxa txajx jxkaahni's kxtey yuusatewa.

Txã'jïna jxã'jçxa', kiiteçxa ayjxu u'jwega jïk.

15

Maawa Jesus yakh txutemée fxi'zewaj

1 Adxii ũ'tasx na'wësath, açá' adx Tata' txãa tasxa's pheu'jsa na'wësa'. 2 Ku'ta yũnsameetxi' spë'the'k, nawa ku'ta yũnsatxi' sũupi'jna pheu'ju'k jxthaakwe yũnkahn. 3 I'kwe'sxa' pheu'jniyã'j ũsi'kwe adx kaapiya'jni's nwëese'pha'ga. 4 Adx yakh txutemée meswe, adxwa ma'wë i'kwe'sx yakh txutemée ũstka txã'wëy. I'kwe'sxa' peekx jii i'kwe: ku'ta çxpiteçxa ũssa' yũnu'çme'. Txã'wëy i'kwe'sxwa

adx yakh txuteeçxa ũsçxa', Dxus dxi'pte selpiiya' ãjameene'kwe.

⁵ Adxa' ũ'tasx na'wēsath aça' i'kwe'sxa' ũ'tasx ku'ta na'wēsa i'kwe. Adx yakh txutemée ũsçxa', wala selpiine'kwe. Aça' adxwa i'kwe'sx yakh txutemée fxi'ze'nja. Adx yakhmée yu', i'kwe'sxa' kīh yuhwa yūuya' ãjameene'kwe.

⁶ Aça' ũ'tasx ku'ta yūnsameetxi' ma'wēga spēethe'thçxa ya'kabu', txā'wēy ya'yuuna adx tasxu txutesatxi'.

⁷ I'kwe'sxa' adx yakh txutemée fxi'zeçxa adx kaapiya'jni's peçxkanameeçxa', kīhwa pēyine'kwe, aça' ya'ūsuna. ⁸ Adx kaapiya'jni's nwēese'jçxa' Dxus dxi'pte wala selpiiya' ãjane'kwe. Aça' txā'wē yūute', adx Tata's wala tuuthe'jni yuuna. ⁹ Adx Tata' adxa's wala peeygāja'k, aça' adxa' txā'wēythu i'kwe'sxtxi peeygāja'. Aça' adx peeygāanijū txutemée meswe. ¹⁰ Adx jxkaahnitx nwēese'jçxa', adx peeygāaniteçxáa fxi'zene'kwe, adxwa ma'wētka Tata jxkaahnitx nwēese'jçxa' txajx peeygāaniteçxáa fxi'ze' txā'wēy.

¹¹ Na'wēth pta'sx kxah adx ma'wētka weçxweçxa yajxna fxi'ze', i'kwe'sxwa txā'wēy багаçxwa weçxweçxa yajxna fxi'zene'kwe.

¹² Adxa' na'wēth jxkaaja': adx ma'wētka i'kwe'sxtxi peeygāja', i'kwe'sxwa txā'wēy puutx ya'peeygāhna mfxi'zewe. ¹³ Namiku's nwe'weya' sūhçxa peekx ĩtxi fxi'zeni's ivxiitunisaçxáa peeygāani yaase'. ¹⁴ I'kwe'sxa' isa adx namiku dxihçxa', adx jxkaahni's kxtex yuune'kwe. ¹⁵ Aça' txā'wē yūusatxi' peena yu' selpisáa jīna kxsusme'nja. Selpisá' txajx patron kīh

yuuya'watewa jiiiméek fxi'ze'. Nawa i'kwe'sxa' adx Tata we'wenitxi' jxuka jii i'kwe, txãa pa'ga adxna selpisáa i'kwe jina kxsusmée, adx namiku i'kwe jinaçxáa kxsusu'nja. ¹⁶ I'kwe'sx khuẽ'y adxa's txhitxhmeei'kwe, wejxwa adxthu i'kwe'sxtxi txhitxh. Sa' i'kwe'sx mteewa u'jçxa Dxus dxi'pte selpiina fxi'zekahnthu neewe'we', aç'a i'kwe'sx txã'wẽ Dxus dxi'pte selpiina u'juni' kxul yuumeena. Txã'wẽ yũusatxi' adx Tata jxuka ũsuna kĩh pějxtewa, adxa's pi'kxçxa pějxte'. ¹⁷ Na'wẽ yũuwa'ja'sthu i'kwe'sxtxi jxkaaja': Puutx ya'peeygãhna mfxi'zewe.

Jesus txhitxnisatxi' naa kiwetewe'sx açeni

¹⁸ Naa kiwetewe'sxa' adxa's nyafxkhēytxi ahçe na' i'kwe'sxtxiwa txã'wēyçxáa açetxna, nawa nxusmée meswe. ¹⁹ I'kwe'sxa' naa kiwetewe'sxwaça', nasa' wedxitxna, txãawe'sx pwe'sx ma'wēta wedxi' txã'wēy. Nawa adxa' i'kwe'sxtxi txhitxthu naa kiwejũ, txãa pa'gatx naa kiwetewe'sxa' i'kwe'sxtxi açe', naa kiwetewe'sxmée yã'ji'kwe naa pa'ga. ²⁰ Miiyajxwe adx na'jina we'weni's: Maawa selpisá' txajx patronte jxthaakwesame' jini's. Adxa' i'kwe'sxtxi jxpe'jsath na's yuhwa ikhya' pakwe'tx na' i'kwe'sxtxiwa txã'wēyçxáa ikhya' pakweetxna. Sa' adx kaapiya'jni's nwēese'jsa', i'kwe'sx kaapiya'jni'swa nwēese'jetxna. ²¹ Adx pa'gaçxáa i'kwe'sxtxi pkuutxna, adxna kaahsa's jiyumeeçxa.

²² Dxus jxkaahni's adx pta'sxya' kĩhmeewaça', txãawe'sxa' yuuwemeesa yuutxna. Nawa açxha' adx pta'sxni's jiyutx na' yuuwemeetha'w jĩa'

ājameetxna. ²³ Adxna ačesa' adx Tatanawa ačesata'. ²⁴ Txāawe'sx ksxavxysu kim yuhwa vxit-ya' ājanimeesa's adx kaavxya'ja'jmeewaça', yuuwemeesa yuutxna. Nawa makwe txā'wē adx ājani's kaavxya'ja'the uyçxawa, adxna ače'tx. Aça' adxna ačesayā'j yu' adx Tatanawa ačesata'. ²⁵ Nawa txāawe'sx leyte na'wē fxi'jni ūsa': adxna ahçetx kīhwa yuuwemeetewa jī'k txā' kxtey yuukahntxi txā'wē yū'.

²⁶ Nawa i'kwe'sxtxi pu'çxwa'jsa Dxus Espiritu isa ew kaajiyu'jwa'jsa's adx Tata tasxu kaja'nja txā' adx kimtewa ew kaajiyu'juna. ²⁷ Aça' i'kwe'sxwa txā'wēy adx kimtewa pta'sxine'kwe, i'kwe'sxa' nyafxii i'kwe adx yakh ūssa yu' naa pa'ga.

16

¹ I'kwe'sxtxi pkxuute', nxusna wala kuh yaakxkahmen na'wē pta'sxiçthu: ² ahçeçxa judiuwe'sx pkhaakhenijū kutxi'jçxa peena yu' jxpa'gameetxna i'kwe'sxtxi. Sa' txā'wēçxáa yūumée i'kwe'sx maaítxi' ikhetxna, nawa txāawe'sx yu' Dxusa's selpiina ūstha'w sūhna txā'wē yūutxna. ³ Txāa ačesawe'sxa' adx Tata's jiimeeta', sa' adxnawa jiimeeta', txāasa txā'wē pkxuutxna. ⁴ Aça' kxahth yaçkhēy txā'wē pta'sxi' na' txā'wē yūuwa'j en āhte', adx pta'sxni's yaakine'kwe.

Dxus Espiritu kaajiyu'jni

Txā'wē pkxuowa'ja's nyafxii yu' pta'sxmeeth, txāa pa'gatey kīhwa meek yu' adx i'kwe'sx yakh ūste'. ⁵ Nawa āçxha' adxna kaahsa

tasxte u'jweçthu. Nawa i'kwe'sxa' maa yuhwa pēyi'çmeei'kwe çmtee u'jweçga? jīna. ⁶ Txā'wē pējxmeeçxa ī'neeçxāa i'kwe wala nxusu', adx u'jweçthu jīna pta'sxte'. ⁷ Nawa isath pta'sxi': adx u'jmeete', i'kwe'sxtxi pu'çxwa'jsa' kīhmeena. Nawa adx u'jçxa', txā's kaja'nja. Txāa pa'ga pejka u'jwaj yuh ji'pthu, i'kwe'sxtxi pu'çxwa'jsa's kaajxa'. ⁸ Aça' txā' naa kiwete kīhçxa', nasatx Dxus dxi'pte yuuwe pkalsa yuhtha'w sūhwa'ja's kaaūsuthe'jena. Sa' Jesusa' kīhte yuhwa yuuwemée ewsa maatxwa jxuka nwe'wewa'jsa yuh yu'ga sūhwa'ja'swa ew kaajiyu'juna. Txā'wēy yuuwesatxi' Dxusa' ewmeete yuh nvxiituna sūhwa'ja'swa kaaūsuthe'jena. ⁹ Maawa adxa's jxpa'gaya' wa'lpa'ga txā'wē pkaal yuuwesata'. ¹⁰ Adxa' maatxwa jxuka nwe'wewa'jsaçxai' nwe'wewa'ja's vxitna uuçxa adx Tata tasxna u'the', peena yu' uymeene'kwe. ¹¹ Sa' yuuwesa' ewmeete neeyūuwa'jsane'tka'w sūjkahnīi naa kiwete jxkaahna ūssa eçxthē'j yuja'swa ewmeete yā'kh nvxiitni yuu.

¹² I'kwe'sxtxi wala pta'sxwa'j ji'phīçxáath, nawa āçxhīi yu' ew jiyuya' ājameene'kwe. ¹³ Nawa Dxus Espiritu kīhçxa', txāa ente i'kwe'sxtxi' jxuka ew kaajiyu'juna, txā' isa we'wenisaçxá's kaajiyu'jsa'. Txā' peekçxáa we'wemée, Dxus kwe'we'jniçxá's pta'sxina, sa' kīh yuuya'watewa dxiikhēy kaajiyu'juna. ¹⁴ Adx ma'wēsatewa ew jiia' na' txāasa i'kwe'sxtxiwa kaajiyu'juna, adxa's tuuthe'jsa' naa pa'ga. ¹⁵ Adx Tata ma'wēsate', adxwa txā'wēysa íçxáath.

Txãa pa'ga Espiritu' adx ma'wēsatewa wejx ew kaajiyu'juna jīnath pta'sxi'.

Nxuswa'j en skhēwte', weçxa en pa'jni

¹⁶ Āçxha' adx Tata tasxna u'jwa'j ājāça', aça' adxa's uymeene'kwe. Nawa vxite enkhē' adxa's ki' uyuune'kwe.

¹⁷ Txã'jīte', txãa yakh u'jusawe'sxa' na'wētx puutx ya'paapēyi':

—¿Ma'jīçxaki'k txã'wē we'we'? Āçxha' adx Tata tasxna u'jwa'j ājaça', aça' adxa's uymeene'kwe. Nawa vxite enkhē' ki' uyuune'kwe jī'k sa', ¹⁸ ¿kīh we'weçxaki'k adx u'jwa'j ājaça' jīna we'we'? nawa kwe'sxa' jiyu'çmeetha'w.

¹⁹ Txã'wē jiyuwēena ūsni's Jesusa' jiyuçxa' pta'sxku:

—Adx Tata tasxna u'jwa'j ājaça', aça' adxa's uymeene'kwe. Nawa vxite enkhē' ki' uyuune'kwe jīnath we'we aça' ¿txã'sna wá'kwe i'kwe'sx pwe'sx jiyu wēena puutx paapēyi'?

²⁰ Isath we'we': I'kwe'sxa' nxusna ū'nene'kwe, aça' naa kiwete nasa yu' wala weçxaatxna. Nawa i'kwe'sxa' makwe nxusna ūsçxawa, nxusu en skhēwte', weçxweçxa neeyūune'kwe. ²¹ Na's mjiyuwe: U'ywa nasa upxya'wate āça'aççxa', wala pxthaa yu'k akate. Nawa luuçx upxte', weçxaweete txãa aka yuuni's peçxkana'k.

²² Txã'wēy i'kwe'sxwa āçxhíi yu' nxusu'i'kwe. Nawa adxa's ki' uyçxa', weçxweçxa yajkxna neeyūune'kwe. Aça' i'kwe'sx weçxweçxa yaakxni's kim yuhwa kusa'jya' ājameena.

²³ Txã'wẽ adxa's ki' uyniijũ', txajũyã'ja' jxuka jiisa adxa's paapẽywa'j ji'phumeene'kwe. Nawa adx Tata yu'sa' kĩhwa jxuka pẽjxya' ãjãne'kwe adxa's pi'kxçxa, aç'a' txã' jxuka ũsuna. ²⁴ Nawa i'kwe'sxa' ãçxh pa'jwa adx Tata's kĩh yuhwa pẽynimée i'kwe adxa's pi'kxçxa. Mpẽjxwe wakx, sa' jxpa'gaçxa' wala weçxaane'kwe.

Kristo' kĩhnawa jxuka knayni

²⁵ Ejemplo yakhçxáath kaaja'da'jna pta'sx i'kwe'sx jiyukahn. Nawa ãate pta'sxwa'j en ãhte', peena yu' ejemplo yakh kaaja'da'jna pta'sxme'nja, wejxwa tehwed ãateçxaçxáa pta'sxi'nja adx Tata ma'wẽsatewa. ²⁶ Txã'wẽ ãate pta'sxwa'j en ãhte', i'kwe'sx yuu adx Tata's pẽjxya' ãjane'kwe, makwe adx yu' i'kwe'sx pa'gate we'we pu'çxmeetewa. ²⁷ I'kwe'sxa' adxa's wedxçxa jxpa'gai'kwe, Dxus tasxu yuusana sũhna. Txãa pa'gak adx Tata' i'kwe'sxtxi peeygãja'. ²⁸ Adxa' Tata tasxu kasehçxa, naa kiwete yuwe'th, sa' ãçxha' naa kiwe's nvxihtçxa ki' u'jweçthu adx Tata tasxna jĩte', ²⁹ txãa yakh u'jusawe'sxa' na'jĩtx:

— ãçxh yuuçxa' ejemplo yakh kaaja'da'jmée, tehwed ãate pta'sxna ũsgu. ³⁰ ãçxha' jiyutha'w, idxa' kĩhnawa jxuka jũig. Txãa pa'gatha'w ew jiyu Dxus tasxu yuusatewa. Txãasa kim yuhwa idxa's paapẽywa'j ji'phmeeta' jĩte', ³¹ Jesusa':

— ¿ãçxha' jiyu'kwe? jĩnak we'we. ³² ãçxha' ena' ãjk, aç'a' ãçxhíi i'kwe'sxa' teeçxsa na'wẽçxah fxiifxii txuteene'kwe, sa' adxçxáana nvxiitune'kwe. Nawa adxçxáa yu' neeyũume'nja, Tata' adx yakh ũsa' naa

pa'ga. ³³ Txã'wēth adx yakh fxi'zewa'ja's jxuka pta'sxi', kxah adxa's neewe'weçxa', ũukhmée wētweēt yaakine'kwe. Naa kiwete' thēyte nxuste fxi'zewa'ja's ji'phune'kwe. Nawa adxa's çxhãçxha miiyajxwe, txãa pa'gatey naa kiwete ewmeesa's adxa' knayyã'th naa pa'ga jík.

17

Jesusa' txajx jxpe'jnisatx Dxus kusete neewe'weni

¹ Jesusa' txã'wē pta'sxna jxã'jçxa', cielute pa-gayçxa Dxus yakh puutx we'wek na'jīna:

—Tata, ena' ājk. Iidx Nçxi'k kimtewa nasa jiyukahn āate mkaavxya'ja', kxah Nçxi'kwa idxa's āate kaajiyu'juna nasatx. ² Nasa jxukaysatx jxkaahwa'ja's adxna ũsgu, iidx ũsni yuutxi' jxukaysatx pçuwa'jmée itxi fxi'zewa'ja's ũskahn. ³ Aça' pçuwa'jmée itxi fxi'zewa'ja's ji'phu wēeçxa', teeçx Dxusçxãa ũsgu txã'sna jiyuwa'j ji'phta', sa' txã'wēy iidx kaahnisa Jesukristo'swa jiyuwa'j ji'phta'.

⁴ Adxa' naa kiwetewe'sxtxi' ew kaajiyu'th idx ma'wēsatewa, sa' idx mjīi kaahni's jxã'jyã'th.

⁵ Tata, naa kiwe meetey ma'wētka'w cielute ih weçxana ũsu', ãçxha' txã'sa' ki' mah kxtey ih weçxana ũswa'ja's.

⁶ Naa kiwejũ maaítxi' txhitxgu, aça' txãawe'sxtxi' kaajiyu'th idx ma'wēsatewa. Txãawe'sxa' iidx jīitx yu', nawa adx jxpe'khangu ũs, aça' txãawe'sxa' nwēese'jtx iidx jxkaahni's.

⁷ Sa' na'wē kījkihwa yūuya' āja'th txãa ājanisa' iidx jxkaahnitxna sūhwa'ja's ji'phutx. ⁸ Idx yuwe

pta'sxkaahg txã'sa' pta'sxthu, açã' txãawe'sxa' jxpa'gaçxa ũuste yu'akhtxi. Sa' adxa' Dxus kaahnisa iidx tasxuh yuusatewa jiita'.

⁹ Adxa' txãawe'sxtxi' iidx kuseteth nvxihtna neewe'we'. Naa kiwete idxa's jiimeesa ũsta' txãawe'sx pa'gate neewe'we'çmeeth. Adx jxpe'khan ũsgu txãawe'sx pa'gateçxáath neewe'we', txãawe'sxa' iidx jiita' naa pa'ga. ¹⁰ Jxuka adx ji' iidx jiiçxaçxáata'. Açã' jxuka iidx ji' adx jiiçxaçxáata'. Txãawe'sxpa'ga yuuçxáath txakwe wala weçxaawa'ja's ji'phu.

¹¹ Adxa' naa kiwete txaçxmeeçxáa ũswa'j ji'phtu. Nawa txãawe'sxa' naa kiwete neeyũutxna, naapkaçxha' adxa' yuhth idx yakh ũsya'. Tata, adxna ũsgu txãawe'sxtxi' meen jxpe'j jxpa'yakx, kxah teeçxsa na'wẽçxah idx yakh txutemée fxi'zetxna adxwa ma'wẽtka idx yakh txutemée fxi'ze' txã'wẽy. ¹² Adxa' naa kiwete txãawe'sx yakh ũsçxa', idx pu'çxte' jxpa'yakxthu jxpe'jna fxi'ze adxa's jxpe'khan ũsgu txãawe'sxtxi's. Açã' jxukaysa yu' vxitumeeta', naasáa teeçx vxituwa'jsane' yu' txãa yuuçxáak vxitu, Dxus libroute pta'sxna fxi'jni' kxtey yuukahn.

¹³ Açxha' yuhth idx ũsgu kxtey. Nawa naa kiwete nee ũsíi txã'wẽth idxa's neewe'we', kxah txãawe'sxa' ũukhmée weçxana fxi'zetxna, adxwa na'wẽth weçxana fxi'ze' txã'wẽy. ¹⁴ Iidx pta'sx kaahni's pta'sxthu adx jxpe'jnisatxi', nawa naa kiwetewe'sxa' txãawe'sxtxi' açe'tx, adx jxpe'jnisawe'sxa' adx na'wẽy naa kiwetewe'sxmeeta' naa pa'ga. ¹⁵ Adx jxpe'jnisatxi' naa kiwejũ mkuutxi'j

jĩ'çmeeth, naasáa eçxthē'j kaypuba'khamen meen nwe'we jĩnaçxáath neewe'we'. ¹⁶ Adxa' naa kiwetewe'sxmeeth, aça' txāawe'sxwa naa kiwetewe'sxmeeta'. ¹⁷ Txāawe'sxa' iidx jĩiçxáa yuukahn idxçxáa jxpe'jene'ga, isasa's kaapiya'jna. Iidx kaapiya'jni' kaypuba'jwa'jsame'. ¹⁸ Idxwa ma'wēga adxa'sa' naa kiwete kaah, txā'wēy txāawe'sxtxiwa kajaçthu. ¹⁹ Sa' txāawe'sx pa'gate adxwa iidx kusete neeyũuçthu, kxah txāawe'sxwa iidx jxpe'jwa'jyā'j neeyũutxna.

²⁰ Txāawe'sx pa'gateçxáa neewe'weçmeeth. Txāawe'sx iidx yuwe's pta'sxte', maawa idxa's jiyuwa'jsa ũstxna txāawe'sx pa'gate ja'dath neewe'we'. ²¹ Txāawe'sx jxukaysa teeçxsa na'wēçxaçxáa yajkxna kwe'sx yakh txutemée fxi'zekahnthu neewe'we', Tata, idxwa na'wē adx yakh fxi'zena ũsgu aça' adxwa idx yakh fxi'zena ũsthu txā'wēy yuukahn. Txā'wē yuuçxa teeçxsa na'wēçxaçxáa ih fxi'zetxna, kxah naa kiwetewe'sxa' jiyutxna adxa' iidx kaahnisatewa. ²² Idx yakh ih fxi'zewa'ja's adxa's ũsgu aça' txāawe'sxtxiwa idx yakh ih fxi'zewa'ja's adxa' ũsthu, adxwa idx yakh ma'wētkaw teeçxçxáa na'wē fxi'ze' txā'wēy ih fxi'zekahn. ²³ Adxa' txāawe'sx yakh fxi'zete', idxwa adx yakh fxi'zene'ga, kxah txāawe'sxa' teeçxçxáa na'wēsa yuutxna. Aça' txā'wē yũute', naa kiwetewe'sxa' jiyutxna adxa' iidx kaahnisatewa. Sa' adxa's ma'wēga peeygāja', txā'wēygu peeygāja' naawe'sxtxiwa.

²⁴ Tata, adxa's jxpe'khan ũsgu aça' txāawe'sxtxi' adx ũsnitey ihth ũs jxthāasu',

naa kiwe meetey adxa's peeygãhçxa weçxana jxpe'jna ũsu'g txã'sa' uykahn. ²⁵ Tata, idxa' wala yuh ewsatewa, naa kiwetewe'sxa' idxa's jiimeeta'. Nawa adx yu' jiith, aç'a' adx jxpe'jnisawa jiita' adxa' iidx kaahnisatewa. ²⁶ Adx jxpe'jnisatxi' kaajiyu'th idx kimtewa, sa' kaajiyu'jna nes yu'nja, kxah idx adxa's peeygãani' txãawe'sx ũuste nes yuute', adxwa txãawe'sx ũuste nes yu'nja.

18

Jesusa's preesu'jni

(Mt 26.47-56; Mr 14.43-50; Lk 22.47-53)

¹ Jesusa' txã'wẽ neewe'wena jxã'jçxa', Cedron yu'kuten ktejkana u'kh, txãa yakh u'jusawe'sx yã'jçxa teeçx walta ũsa' kxtee u'kaya'. ² Txãa waltate' Jesus yakh u'jusawe'sxa' maz uswa txãa yakh pkhaakheya' u'kasatx yu', naa pa'gak Jesusa's ikhkahn dukhwa'jsa Judasa' jii yu'. ³ Txãasak Judasa' jiiyã'jçxa', soldauwe'sxtxi pe'jçxa kxtee pa'j u'j dxuus yat thegsawe'sx yã'jçxa. Txãa dxuus yat thegsawe'sx yu', sacerdote npiiçthẽ'j vxite' fxariseowe'sx jxkaahnitx yu'. Vxite' fxtũ, vxite' kçxilx, vxite' lampara atçxatx pa'j. ⁴ Nawa Jesusa' txã'sna ma'wẽwa pkxuuçxa ikhwa'j ähte jiiyã'jçxa', puutx uyya' kasejk. Sa' na'jĩk:

—¿Kimnakwe pakwé'? jĩte', ⁵ txãawe'sxa' na'wẽtx pas:

—Jesus Nasarethuwe'sxa'stha'w pakwé' jĩte', Jesusa' na'jĩk:

—Adxii txãath.

Aça' Judaswa kxtee txãawe'sx yakh ũsu'k, Jesusna kuuwe'jna. ⁶ Txajũ' adxíith jĩna Jesusa we'weniteçxáa, Jesusa's tudwa'jsa' e'su ya'skaçxa kiwegatx wete. ⁷ Aça' Jesusa' ki' pějxku:

—¿Kimnakwe pakwé'? jĩte', txãawe'sxa':

—Jesus Nasarethuwe'sxa'stha'w pakwé' jĩnatx pas.

⁸ Aça' Jesus pasçxa':

—Adxíith jĩna pta'sxyã'th. Aça' adxa's pakweeççxa', adx yakh u'jusawe'sx ayte ũsta' txãawe'sxtxi' kuçx yuunuwe u'khan jĩk.

⁹ Jesusa' nyafxíi we'weçxa': Tata adxna jxpe'khan ũsku txã' jxukaysa yu' vxitumeeta' txã'jĩni' kxtey yuukahnku txã'jĩ.

¹⁰ Naapkaçxha' Simon Pedro' kçxilx ya'kxnisa's jxkuutxi'jçxa teeçx piçthē'j thũ'wē paçuwe'sxa'sku spē'th. (Txãa piçthē'ja' sacerdote npiçthē'ja's selpisáa Malko yaasek yu'.) ¹¹ Aça' Jesusa' Pedro's na'jĩnak jxkaah:

—Kçxilxa's wainutey myu'akh. Adx nxuste pxthaa yuuwa'ja'sku Tata' jxthãasu' aça' txã'sa' jxpa'gawa'jsameena sũju'wá'ga jĩk.

Jesusa's Anas tasxna jxũna u'jni

(Mt 26.57-58; Mr 14.53-54; Lk 22.54)

¹² Txajũ' soldau npiçthē'j txajx nasa yakh vxite' dxuus yat thegsawe'sx yã'jçxa Jesusa's tudçxa', ¹³ Anas tasxna khuē'y jxũna u'jtx. Txãa Anas duh Kaifxasa' sacerdote npiçthē'kh yu' txãa anxute. ¹⁴ Txãa Kaifxasiik judiuwe'sxtxi na'jĩna we'wesa yu': Nasa jxukaysa pa'gate teeçx piçthē'jçxáa uuwaç wejx ewna jĩsak yu'.

*Pedro ĩsxiini**(Mt 26.69-70; Mr 14.66-68; Lk 22.55-57)*

¹⁵ Jesusa's tudçxa jxūna u'the', Simon Pedro' vxite piçthē'jyā'jçxa Jesus e'stey u'kh. Txāa vxite piçthē'j yu' sacerdote npiičthē'j yakh jiisak yu', txāa pa'ga txāa npiičthē'jsa yat patxute u'kak Jesus u'kanitey. ¹⁶ Nawa Pedro' u'kamée vxitx pukate neeyūuk. Txāasak sacerdote npiičthē'j yakh jiisa' kxtee vxitxte thegsa yakh puutx we'weçxa Pedro's dxiite ka'gaj'. ¹⁷ Aça' vxitxte thegsa' pějxku Pedro's:

—Idxa' çnaa piçthē'j yakh u'jusameegá'? jīte', Pedro paççxa':

—Txāa yakh u'jusameeth jīk.

¹⁸ Txajū' kxtee selpisaawe'sx vxite' dxuus yat thegsawe'sx yā'jçxa kumaçxa ipx yuthçxatx bajçxna ũsu' patxute. Aça' Pedrowa kxtee txāawe'sx yakh ipx pukate bajçxna ũsu'k.

*Anas Jesusa's paapēyni**(Mt 26.59-66; Mr 14.55-64; Lk 22.66-71)*

¹⁹ Txajū' Anasa' paapējxya' takhku Jesusa's:

—Idx yakh u'jusawe'sxa' çkimtçna? aça' idxa' çkīhga kaapiya'ja'? jīte', ²⁰ Jesusa' na'jīnak pas:

—Adxa' āateçxaççxāa iīwe'weth nasa jxukaysa dxi'pte, judiuwe'sx pkhaakhenisu vxite' dxuus yatte judiuwe'sx jxukaysa ksxavxyte Dxus yuwe's kaapiya'jna. Adxa' paaçte yu' kīhwa iipta'sxmeeth. ²¹ Aça' adxa's çkījxa'ga paapēyi'? Adx pta'sxni's wēse'jsatx mpaapējx, aça' txāawe'sxa' pta'sxitçna adx kīh we'weni'swa. Txāawe'sxa' adx pta'sxni's jiita' na'.

²² Txã'wě we'wete', dxuus yat thegsawe'sx teeçx kxtee ũssa' kuseju Jesus dxip'ga pehtxaçxa', na'wěk juuna' we'we:

—Anasa' sacerdote npiiçthě'ja' aç yuja' ¿txã'wě pasu'gá'? jíte', ²³ Jesus pasçxa':

—Adx ewmée we'wete', mpeeta'sx kĩhsu ewmée we'weçtewa. Nawa ewsaçxá's we'weçte', ¿ma'wětega adxa's txã'wě pkxú'? jĩnak pas.

²⁴ Txã'wě yũunijũ' Anasa' Jesusa's tudni ũsíin, jxũna u'khaakh sacerdote npiiçthě'j Kaifxas tasxna.

Pedro ki' ĩsxiini

(Mt 26.71-75; Mr 14.69-72; Lk 22.58-62)

²⁵ Naapkaçxha' Pedro' ipx pukate bajçxna ũsíiçxáak yu'. Aça' kxtee ũssawe'sxa' na'wětx pějx:

—Idxa' ¿naa piçthě'j yakh u'jusa yuh meega wakh? jíte', Pedro':

—Adxa' txãameeth jĩnak pas.

²⁶ Aça' sacerdote npiiçthě'ja's selpisáa teeçxsa' na'jĩnak pějx:

—Idxa's ¿uymeewá'ntka waltate txãa yakh ũste? (Txã'jĩna pěysa' Pedro teeçx piçthě'j thũ'wě's spě'thku txãa piçthě'j nwe'sxku yu'.)

²⁷ Txã'jĩna ki' pějxte', Pedro' ki'kin ĩsxiijaçpkaçxha', atalxa' we'wek.

Jesusa's Pilato tasxna jxũna u'jni

(Mt 27.1-2, 11-14; Mr 15.1-5; Lk 23.1-5)

²⁸ Txajũ' Kaifxas yatu Jesusa's jxũna u'jtx ne'jwe'sx Pilato tasxte nuypa'jya'. Naapkaçxha' khikhiiçku yu'. Txajũ' judiawe'sxa' ne'jwe'sx

u'pnite u'kameeta', pkal pēetheejena sūhçxa. Txã'wē pkal pēetheethe', Paskuatewe'sxa's ũ'ya' ājame'nja'w sūhçxatx u'kamée. ²⁹ Txãa pa'gak Pilato' eka kasehçxa' na'jīna paapējx:

—Naa piçthē'ja' ¿kīhga yuu aç txã'wē pāatxhī'khna yujkwe? jīte', ³⁰ txãawe'sxa' na'wēttx pas:

—Kīhwa yuuwemeewaça', iidx tasxte nuypa'jwa'jmeene'tka'w yu' jīte', ³¹ Pilato' na'jīnak jxkaah:

—Jxūna me'jwe, sa' i'kwe'sx ley ma'wē jxkaathe', kxtey yuune'kwe jīte', judiuwe'sxa' na'jīnatx we'we:

—Kwe'sxa' judiuwe'sxtha'w na' ¿ma'wē ikh kaajxa' ājakxtha'w?

³² Jesusa' ma'wē uuwa'jsaçxawa pta'sxku txãa pta'sxni' kxtey yuukahntxi txã'jīna we'we.

³³ Txajū' Pilato' txajx u'pnite ki' kūhçxa', Jesusa's pa'yaçxa na'wēk paapējx:

—¿Idxa' judiuwe'sxtxi jxkaahsawá'ga? jīte', ³⁴ Jesusa' na'jīk:

—¿Iidx ũusuh yajkxçxaga txã'jī'á'? meeçxa' ¿vxitesa txã'jīna adxa's kxsuusni's wēse'jçxawá'ga txã'jī'? jīte', ³⁵ Pilato' na'wēk pas:

—Adxa' judiumeeth. Iidx nwe'sx vxite' sacerdote npiiçthē'jwe'sxtxi adx tasxte idxa's nuykūh, aç'a idxa' ¿kīhga ewmée yūu? jīte', ³⁶ Jesusa' pta'sxku:

—Adx jxkaahwa'ja' naa kiweteme'. Txã'wē naa kiwete jxkaahwa'jsawaça', adx ju'gusawe'sxa' puiiwa'jne'ta yu', judiuwe'sx kusete adxa's dukhkahmen. Aç'a naa kiwete jxkaahsameeth.

³⁷ Txã'jíte', Pilato' ki' pějxku:

—Txã'wěçxa' çidxa' jxkaahsa dxihgá'? jíte', Jesusa' na'jĩk:

—Idx kxsusu'g txã'wěíith. Naa kiwete upxçxa isasaçxáana pta'sxya'th yuwé'. Maawa isasa's nwēese'jwa'jsa' adx we'weni's jxpa'yakxtxi wēse'je' jíte', ³⁸ Pilato' na'wěk paapějx:

—Na'wě isasa' jĩna we'we'g txã' çkĩhna?

Jesusa' ikhwa'j yuuni

(Mt 27.15-31; Mr 15.6-20; Lk 23.13-25)

Txã'wě Jesusa's paapějxçxa', Pilato' ki' eka kasejk judiuwe'sxtxi na'jĩna pta'sxya':

—Naa piçthěj'j ewmée yũuni's kĩhte yuhwa uyu'çmeeth. ³⁹ Nawa Paskua fxiesta iisa teeçx preesu kaatxhweete'je'i'kwe na' çãçxwa txã'wěy txhweete jxthãasu'kwe' naa judiuwe'sxtxi jxkaahsa's? jíte', ⁴⁰ jxukaysa na'jĩtx:

—Txã'sa' kaatxhweete'jnu. Barabasçxá's mkaatxhweete'j jĩnatx weyi'.

Txãa Barabasa' iiméh jxthaakwe pesweesak yu'.

19

¹ Txajũ' Pilato' Jesusa's jxũna u'jçxa peçxuukwekaakh. ² Aça' soldauwe'sxa' çhũçhna tadx vxitçxa Jesus dxikthete kaafxĩkhe'jtx, sa' atxh behsa's kaapã'çxi'jçxatx na'jĩ':

³ —¡Vxiwa, judiuwe'sxtxi jxkaahsa! Txã'jĩçxatx dxi'pga petxaatxa.

⁴ Txajũ' Pilato' ki' eka kasehçxa' na'wěk we'we:

—Mthegwe, naa piçthê'ja' aye ũsa', nawa txã'sa' makwe paapêjxçxawa txajx ewmée yūuni's uymeeth.

⁵ Txã'jī yā'the', Jesusa' kasejk dxikthete çhūçha's tadxçxa kaafxīkhe'jni, sa' atxh behsa's kaapã'çxi'jni. Aça' Pilato' na'jīnak we'we:

—Ăçxha' aye ũsa' txãa piçthê'ja's mthegwe.

⁶ Txã'jīte', sacerdote npiiçthê'jwe'sx vxite' dxuus yat thegsawe'sx Jesusa's thegçxa' na'jīnatx sus weyya' kiite:

—Kluuste mkaafxuçu'j, kluuste mkaafxuçu'j jīte', Pilato' na'jīk:

—I'kwe'sx jxpa'gaçxa kluuste mfxuçwe. Adxa' kīh yuhwa ewmée yūuni's jiyuya' ājameeth jīte',
⁷ judiuwe'sxa' na'jīnatx we'we:

—Kwe'sxa' ley ji'ptha'w txãa leya' ikhkaja'k, Dxus Nçxi'kthu jīna u'jupa'ga.

⁸ Txã'jīni's wēse'jçxa', Pilato' jweeíçxáak wala ũukhwa'j ji'phu. ⁹ Sa' txajx u'pnite u'kaçxa', na'jīnak Jesusa's paapêjx:

—Idxa' ¿majūwe'sxga? jītewa, Jesusa' pasme'.

¹⁰ Aça' Pilato' na'jīk:

—¿Adxa's kīh yuuçxaga pasu'çmée? ¿Ji-meewá'ga? adxa' kluuste fxuçkahn jxkaajxa'wa ājawa'jsath, sa' txã'wēy kaatxhweete'jya'wa ājawa'jsath jīte', ¹¹ Jesusa' pasku:

—Dxuspa'gameewaça', idxa' kījxa'yuhwa ājawa'jsameeg adxa's. Nawa iidx kusete adxa's dukhsa' idxte jxthaakwe yuuwesa'.

¹² Txã'jīna we'wenijū' Pilato' wala pa'pçxuk Jesusa's txhweetewēeçxa. Nawa judiuwe'sxa' na'jīnatx sus we'we:

—Naa piçthê'ja's txhweteçxa', jxkaahsa Cesar namikumêe yuune'ga. Maawa fxiy jxkaahsa' txã' Cesar ju'gusame'.

¹³ Txã'jîni's wêse'jçxa', Pilato' Jesusa's ekate pe'jna u'jçxa', jxkaahna u'pnite kaçxku. Txãa jxkaahna u'pni' Gabata yaasek yu' hebreo yuwete. Txã' Kwet Fxuçni jîni'. ¹⁴ Paskua fxiesta âjaçtek txã'wê yûuna ũsu'. Txajû' Pilato' na'wêk we'we judiuwe'sxtxi:

—I'kwe'sxtxi jxkaahsa' ayte ũsa' jîte',

¹⁵ txãawe'sxa' na'wêtx sus we'we:

—jPeekx uuna, kluuste mfxuç! jîte', Pilato' na'wêk we'we:

—I'kwe'sxtxi jxkaahsa yuja's, ¿ma'wê kluuste fxuç kajaki'th? jîte', sacerdote npiiçthê'jwe'sxa' na'wêtx we'we:

—Kwe'sxtxi jxkaahsa' Cesar yuuçxá'. Vxite jxkaahsa yu' ji'phmeetha'w.

¹⁶ Txã'wê we'we yã'the', Pilato' Jesusa's txãawe'sx kusete kluuste fxuçkahn dukhte', jxûna u'jtx.

Jesusa's kluuskhê fxuççxa ikhni

(Mt 27.32-44; Mr 15.21-32; Lk 23.26-43)

¹⁷ Jesusa' txã'sna fxuçwa'j kluusa's yakhçxa çxhabu kasehna u'kh, teeçx ahte Gólgota yaase' kxtee pa'j. Txãa Gólgota yu', Uusáa Jxkwet Dxi'th jîni' hebreo yuwete'. ¹⁸ Kxtee pa'jçxa' Jesusa's kluuste fxuçtxi, vxite e'z piçthê'jtx txã'wêy, Jesusa's pxãhte txahçxa. ¹⁹ Txajû' Pilato' kluus kajkwete na'wêk ki'p kaah: Jesus Nasarethuwe'sx, judiuwe'sxtxi jxkaahsa jîna fxi'jni's. ²⁰ Aça' kluuste fxuçni' çxhab utxatek yu', naa pa'ga maazkuêe judiwa txãa fxi'jni's thegu'tx. Txãa

fxi'jni', hebreo, griego, latin yuwejuk fxi'jni yu'.
 21 Aça' sacerdote npiiçthê'jwe'sx vxite' judiu
 npiiçthê'jwe'sxa' na'jĩnatx Pilato's paatxhĩ'kh:

—Judiuwe'sxtxi Jxkaahsa jĩna fxi'j na'wě,
 Adxa' Judiuwe'sxtxi Jxkaahsath jĩ'k jĩna
 fxi'jwaça', wejx ewna.

22 Nawa Pilato pasçxa' na'jĩk:

—Adx txã'wě fxi'jni's kim yuhwa
 yu'pthehmeena.

23 Txajũ' soldauwe'sxa' Jesusa's kluuste fxuç
 yã'jçxa', Jesus athni's pahzsa txu'dedetx soldau
 iisa teeçxteeçx. Sa' atxha'swa txã'wěytxi
 yũu wěe, nawa txã' teehwedsaçxáak yu'
 kaçnimeesa. 24 Aça' soldauwe'sxa' na'wětx
 puutx we'we:

—Txã's sudeya'mée swerte kaja'nja'w kim jĩ
 neeyũutewa jiyuya'.

Soldauwe'sx txã'wě yũuni' Dxus librute na'wě
 fxi'jni kxtey yuuk: Adx athni's txãawe'sx pwe'sx
 txu'dedetx swerte kaahçxa jĩna fxi'jni'.

25 Txã'wě yũuçpkaçxha', Jesusa's fxuçni kluus
 pukate njĩ'jwa ũsu'k vxite' Jesus njĩ'j yũkwe, vx-
 ite' Kleofxas nyu Maria, vxite' Maria Magdalena.

26 Aça' Jesus njĩ'j pukate Jesus wedxnisa ih ũste
 Jesus uyçxa', njĩ'ja's na'jĩk:

—Naa piçthê'ja' i'kwe's jxpe'jena nçxi'k na'wě
 jĩçxa', 27 txãa piçthê'ja'swa na'jĩnak neewe'we:

—Na'sa' iidx mama na'wě jxpe'jene'ga.

Txã'jĩte', txãa piçthê'ja' txãa oratey Jesus
 njĩ'ja's txajx yatna pe'jna u'kh.

Jesus uunũ

(Mt 27.45-56; Mr 15.33-41; Lk 23.44-49)

²⁸ Txãa skhêua', Jesusa' jiik yu' jxuka kxtey yuuna u'jweçtewa. Sa' Dxus librute ma'wê fxi'jni kxtey yuukahnu na'jîna we'we:

—Yû'wêeth jîna.

²⁹ Teeçx tasa vxino utak ũsu'. Aça' txãa vxinote esponja's tuupha'jçxa fxtûte açhçxa Jesus yuwete utxatx çxazxakahn. ³⁰ Aça' Jesusa' esponja's çxazxaçxa', na'wêk we'we:

—Jxuka jxã'jnik neeyũu jîna'wa, kîiçhuna' uuk.

Teeçx soldau Jesus tabxte yâjani

³¹ Aça' Paskua fxiesta en âjaç yâ'kh yu'. Txãa ena' wala ki'snisa yu'k. Aça' judiwe'sxa' fxiesta ente uusaawe'sx kakwetx kluuskhê nvxiit wêemeçxa', Pilato's pêjxtxi kluuskhê ki'pnisa çxidatx çxkadede'ya' kaakhan, dud uute' kakwetx txajũ kiisya'. ³² Txajũ' soldauwe'sx u'jçxa çxidatx çxkadedetx teeçxsa khuê'yna, sa' vxitenawa txã'wêytxi yũu Jesus pukakhê kluuskhê u'psa's. ³³ Nawa Jesusnawa txã'wêy yũuya' utxaana kũhçxa', uunii yâ'j u'ptetx uy. Txãa pa'gatx Jesus çxidatx çxkademedée. ³⁴ Txã'wêtewa, teeçx soldau yu' Jesus tabxte we'thuk yâja'. Aça' txã'wê yâjate', ee yu' yakhku uwu. ³⁵ Txã'wê yũunisa's pta'sxsa' txajx yafxju yuuk uy, sa' isak we'we'. Sa' jiia' isa we'weççxawa, kxah i'kwe'sxwa txã'wê yuh yũune' sũhwa'ja's ji'phune'kwe. ³⁶ Nawa Dxus librute' na'wê fxi'jni': Iidx dxi'thtxi' teeçxçxáa yuhwa çxkahdemeetxna jîni kxtey yuukahntxi txã'wê yũu. ³⁷ Dxus librutey vxite ajkhê na'wê fxi'jni ũsa': We'thu yâjaçxa', thegutxna jî'k.

*Jesusa's pedaní**(Mt 27.57-61; Mr 15.42-47; Lk 23.50-56)*

³⁸ Txã'wē yūuniijũ' Jose yaasesa Arimatea çxhabuwe'sxa' Pilato tasxte utxaak Jesus kakwe's pějxçxa jxūna u'jya'. Aça' Pilato' ewna jíte', Josea' Jesus kakwe's pedaaya' jxūna u'kh. Naa Jose yu' Jesus ju'gsak yu', nawa judiuwe'sxtxi ũukhçxa kimwa jiyunimeene' u'jusa yu'. ³⁹ Txajũ' Nikodemowa pa'kh, Jesus yakh kus puutx we'wesa. Txãa yu' treinta kilo ãjk yu'çe tũ'sçxa pa'j, miçxa aloe yakh ka'dnisa. ⁴⁰ Txajũ' Jose' Nikodemo yakh Jesus kakwe's jxūna u'jçxa', yaptxi txãa yu'çe ka'dnisa yakh, judiuwe'sx ma'wēne'ta uusáa kakwetx pedá' txã'wēytxi yūu.

⁴¹ Jesusna kluuste fxuçni utxasu walta ũsu'k. Aça' txãa waltate' uusáa pedawa'j kafx u'sesa u'pu'k, kim yuhtxwa pedanimeesa. ⁴² Txkaatx Jesus kakwe's khikh, kafxa' utxatek u'pu' aça' ki'swa'j enwa ãjaçku yu' naa pa'ga.

20*Jesus ki' itxi yuuni**(Mt 28.1-10; Mr 16.1-8; Lk 24.1-12)*

¹ Ki'sen khikhiiçte wala kusí çxhi'dxtey Maria Magdalena' pedaní kafxte kũhçxa', kxtee aphni kweta's kiisniyã'j ũstek uy. ² Txajũ' wuwuuçxáak u'j Simon Pedro vxite' Jesus wedxnisa tasxte pa'j. Sa' na'jĩnak pta'sx:

—Kwe'sxtxi jxpe'jsa kakwe's jxūna u'jne'ta pedaniijũ, aça' jiyumeetha'w mkaane'ta khikh nanwa jíte', ³ Pedrowe'sxa' tehwed pedani

kafxte thegya' u'jtx. ⁴ E'zîi wuwuuxáatx u'j, nawa teeçxa' thaakwe dud wuwuuxa Pedro's phyahçça' txãa khuẽ'y yaçte kũjk pedani kafxte. ⁵ Sa' kuyçxa' Jesus kakwe's yapnisaçxáa u'ptek uy. Nawa txã'wẽ uyçxawa, dxiite yu' u'kame'. ⁶ Txajũ' Pedrowa e'ste kũhçxa pedani kafxte u'kak, sa' txãawa uyku Jesus kakwe's yapnisaçxáa ki'pni u'pte. ⁷ Sa' Jesus dxikthé yapnisa yu' tpehgçxa fxiite ki'pni u'ptek uy. ⁸ Aça' yaçte kũusawa kafx dxiite u'kaçxa', txã'wẽ tpehgçxa ki'pni u'pte uyçxa', Jesusa' îtxi yuu yuhgakx sũhwa'ja's ji'phuk. ⁹ Nawa Jesusa' uuçxa ki' îtxi yuuna jĩna Dxus librute fxi'jni's jiyumeytxi yu'. ¹⁰ Txajũ' Pedro Juanwe'sxa' txã'wẽ uyçxa', yatna ki' sxawedna u'jtx.

Maria Magdalena's Jesus vxyaani
(Mr 16.9-11)

¹¹ Pedrowe'sx u'jweçpkaçxha', Maria Magdalena' pedaní kafx pukate ũ'nena neeyũuk. Txã'wẽ ũ'nena u'píi, kafx dxiiga kuyçxa' uyku ¹² e'z angeleswe'sx çxihmeçxáa iikãh jxaathsatx Jesus kakwe's khikhnite pdxi'p kaççxa u'pu', teeçxa' dxikthé ja'date vxite' çxida ja'date.

¹³ Txajũ' angeleswe'sxa' na'wẽtx pẽjx:

—I'kwe' çkĩh yũuçxa ũ'nena ũskwe? jĩte', na'jĩnak pas:

—Ũ'kwe's jxpe'jsa's jxũna u'tha, aça' jiimeeth mkaane'ta khikh nanwa.

¹⁴ Txã'wẽ we'wepu'na' yu'thegçxa', teeçx piçthẽ'j yujuçxa ũstek uy. Nawa txã' Jesusna sũhme'. ¹⁵ Aça' Jesusa' na'jĩk:

—I'kwe' ¿kĩh yuutekwe ù'né'? sa' ¿kimnakwe pakwé'? jíte', Maria' kxtee walta thegsa wá' txã'wě we'we' sũhçxa', na'wěk pas:

—Idx wá'ga ù'kwe's jxpe'jsa kakwe's jxũna u'j na' mpeeta'sx mkaa khikhçxawa, ù'kwe jxũna u'khan. ¹⁶ Txã'jíte' Jesusa':

—¡Maria! jĩnak kxsus.

Aça' Maria tuphiçxa na'wěk we'we hebreo yuweju:

—¡Raboni! jĩk, txã' Kaapiya'jsa jĩni'. ¹⁷ Txajũ' Jesusa' na'jĩk:

—Adxa's jxa'dxnuwe, Tata tasxna u'jmeythu naa pa'ga. Wejxwa adx yakthê'jwe'sxtxi pta'sxya' me'jwe na'jĩna: Adx Tata' i'kwe'sx Tatafiçxá', sa' adx Dxusa' i'kwe'sx Dxusifiçxá' tx-ajx tasxna u'jweçthu jĩnak pta'sxkaah jĩne'kwe.

¹⁸ Txã'wě pta'sxkaathe', Maria Magdalena' pta'sxya' u'kh: Jxpe'jsa's uythu, aça' txãak txã'jĩna pta'sxkaah jĩk.

*Jesus txãa yakh u'jusawe'sxtxi vxyaani
(Mt 28.16-20; Mr 16.14-18; Lk 24.36-49)*

¹⁹ Txãa ki'sen entey kusa' Jesus yakh u'jusawe'sxa' yatte u'kaçxa vxitxtxi jxuka aphçxatx ùsu', judiuwe'sxtxi ùukhçxa. Txã'wě ùspkaçha', Jesusa' txãawe'sx pxãhte vxyaaçxa na'jĩnak weçxa:

—Ûukhmée wět wětçxáa yajkxna meswe.

²⁰ Txã'jĩçxa', txajx kuse kpã'tx pta'sxku, tabxte we'thu yājani'swa txã'wěy. Aça' txãawe'sxa' Jesusa's uyçxa' wala weçxweçxa yajkxtxi. ²¹ Txajũ' Jesusa' ki' we'weçxa na'jĩk:

—Ūukhmée wēt̄wēt̄çxáa yajkxna meswe. Adx Tatawa ma'wēga adxa's kaah txā'wēy adxwa i'kwe'sxtxi kajaçthu.

²² Txā'jĩçxa', txāawe'sx kajkwesu puthku na'jĩna:

—Miipa'gawe Dxus Espiritu's. ²³ I'kwe'sxa' maatxwa we'weçxa': I'kwe'sx pkaltxi' Dxusa' peltunaĩna jĩte', peltunāyni yuutxna. Nawa peltunaĩmeena jĩte', peltunāynimée neeyũutxna jĩk.

Jesus ĩtxi yuuni's Tomas uyni

²⁴ Jesus yakh u'jusaçxawa, Tomas melxisu jĩnisa' meek yu' Jesus txā'wē vxyaani ente yu'.

²⁵ Aça' Tomas yu' uymeetewa, Jesus yakh u'jusa vxite yu' pta'sxtxi:

—Kwe'sxtxi jxpe'jsa's uytha'w jĩna.

Txā'wē pta'sxtewa, Tomasa' na'jĩk:

—Kusete klaus kpā'vxitni's uyçxa txajx tabxte we'thu yājani'swa uyçxa txkaa adx kuse's kaah-meeçxa yu', txā'wē ĩtxi yuune' sũhme'nja jĩk.

²⁶ Txajũ' teeçx ki'su skhēwniite', Jesus yakh u'jusawe'sxa' ki' pkhaakheçxa ũsu'tx teeçx yatte. Aça' txāa ente' Tomaswa txāawe'sx yakh pkhaakhena ũsu'k. Aça' makwe vxitxtxi aphçxa ũstewa, Jesusa' txāawe'sx pxāhte vxyaaçxáak yuu, sa' na'jĩk:

—Ūukhmée wēt̄wēt̄çxáa yajkxna meswe jĩk.

²⁷ Txā'wē we'weçxa', Tomasa'swa na'jĩk:

—Adx kusete kpā'yuunitx thegçxa, txkaa iidx kuse's mkuupath, sa' adx tabxte we'thu yājanigawa mkuupath. Txā'wē yũuçxa', kuh

jwed yajkxmée, ìtxi yuu yuhga sũhwa'jçxá's
ji'phune'ga jíte', ²⁸ Tomasa' na'jìk:

—¡Adxna jxpe'jsa yuhg, sa' adx Dxus yuhg!

²⁹ Txajũ' Jesusa' na'jìk:

—Tomas, ãçxha' adxa's uyçxa', ìtxi yuu yuhga
sũhwa'ja's ji'phug. Nawa adxa's uymeeçxawa
txã'wē ìtxi yuu yuhne' sũhna yaakxsawa
weçxweçxa fxi'zewa'jsata' jĩnak we'we.

*Jesukristo' Dxus Nçxi'k yuh yu'k jĩna pta'sxsa'
naa libru'*

³⁰ Naa kiwete kim yuhwa ãjanimeesatx Jesusa'
wala kuh kaavxya'ja'kh txãa yakh u'jusawe'sxtxi.
Nawa jxuka yu' naa librute fxi'jnimeeta'. ³¹ Nawa
Jesukristo' Dxus kaahni txajx Nçxi'k yuh yu'ga
sũhna jiyuçxa' txã'sna jxpa'gaçxa', pçumée ìtxi
fxi'zewa'ja's ji'phukahñ pta'sxna fxi'jnisaçxáata'.

21

Tiberias ìkh pukate Jesus vxyaani

¹ Jesusa' Tiberias ìkh wala pukate ki'kin
na'wēk vxyaa txãa yakh u'jusawe'sxtxi. ² Kxtee
pkhaakheçxatx ũs yu' Simon Pedro, vxite' Tomas
melxisu jĩ'tx txãa, vxite' Natanael Galilea kiwesu
Kaná çxhabetewe'sx, vxite' Zebedeo nçxi'kwe'sx,
vxite' e'zsa. ³ Kxtee pkhaakheçxa ũsçxa', Simon
Pedro' na'jĩnak we'we:

—Wedx uweya' u'jweçthu jíte':

—Kwe'sxwa idx yakh yuhtha'w jĩnatx pas
txãawe'sxwa.

Sa' teeçx barkote khēeçxa u'jtx. Nawa txãa
kuste' teeçx wedx yuhwa uwemeeta'. ⁴ Khikhyna
sējeçte', Jesusa' ìkh pukate vxyaak. Nawa

txãawe'sxa' jiyumeeta' kimtewa. ⁵ Txajũ' Jesusa' na'jĩnak pẽjx:

—¿Teeçx wedxçxá' uwekwe'? jĩte':

—Uwemeetha'w jĩna paste', ⁶ Jesusa' na'jĩnak jxkaah:

—Wedx ukhe's paçu ju'gkhẽ makhwe, sa' uweene'kwe jĩte', txã'wẽy ukhe's akhçxa', yu'ju wezçxawa kutxi'jya' çxhãçxhameeta', wedx iiméh kuh khẽepa'ga. ⁷ Txã'wẽ yũuni's uyçxa', Jesus yakh u'jusa wedxnisa' Pedro's na'jĩnak pta'sx:

—jNaate ũsa' txã' kwe'sxtxi jxpe'jsa'!

Txã'jĩna we'weçpkaçxha', Pedro' txã'wẽ wẽse'jna' ropa's jathna'wa yu'khẽ khẽek Jesus tasxna u'jya'. (Ropa's pahdeçxak ũs yu', txãasak txã'wẽ yũu.) ⁸ Barkote neeyũusáa vxite yu' wedx ukhe's wezçna kũhtx, cien metroçxáak ũhdxte kũuwa'j peeçx yu' naa pa'ga. ⁹ Txajũ' barkoju jxsa'jçxa', ipx yuthni çxhã'çxha kajkwega teeçx wedx petx pan khikhni ũstetx uy. ¹⁰ Txajũ' Jesus we'weçxa':

—Ãçxh uwenisa wedxtxi mneejxũhwe jĩte', ¹¹ Simon Pedro' barkote khẽena'wa wedx ukhe's wedx walasaçxaçxáa ji'phsa's wezçna kũjk ũhdxte pa'j. Ciento cinkwenta y tres wedxku ji'phu'. Kxaazkuẽe wedx ji'phçxawa, ukhe' suteme'.

¹² Txajũ' Jesus pa'yaçxa':

—Û'ya' myuhwe jĩk.

Txã'wẽ pa'yate', txãa yakh u'jusawe'sxa' jxpe'jsatewa jiyuçxa', maa yuhwa: Idxa' ¿kinga? jĩna pẽyi'çmeeta'. ¹³ Aça' Jesusa'

utxaana kũhçxa', pana's uwena'wa txãawe'sxtxi
ũsu'sku, wedxnawa txã'wěy.

¹⁴ Jesus uuçxa ki' ĩtxi yuunijũ naa yakha' tekx
us vxyaak txãa yakh u'jusawe'sxtxi.

Jesus Pedro's neewe'weni

¹⁵ Txajũ' ũ'na jxã'jçxa', Jesusa' Simon Pedro's
pějxku:

—Jonas nçxi'k Simon, ¿ayte ũsta' txãawe'sxte
jxthaakwega' adxa's wedxi'á? jĩte', Pedro
pasçxa':

—Idxa' peekx jiig adx idxa's wedxiçtewa jĩte',
Jesusa' na'wěk neewe'we:

—Txã'wěçxa', adx piisxakuẽtx wedxna miipe'j
jĩk.

¹⁶ Txajũ' Jesusa' Pedro's ki' pějxku:

—Jonas nçxi'k Simon ¿adxa's wedxi'gá? jĩte',
Pedro pasçxa':

—Idxa' jiig adx idxa's wedxiçtewa. Txã'jĩte',
Jesusa' na'wěk neewe'we:

—Txã'wěçxa', adx piisxaatx sã'jĩna miipe'j jĩk.

¹⁷ Tekx uswa ki' pějxku Jesusa':

—Jonas nçxi'k Simon, ¿adxa's wedxi'gá? Aça'
Pedro' wala nxusku txã'wě tekx us ¿adxa's
wedxi'gá? jĩna pějxte'. Sa' na'jĩk:

—Idxa' jxuka jiig adx idxa's wedxiçtewa jĩte',
Jesusa' na'jĩnak neewe'we:

—Txã'wěçxa' adx piisxaatx jxpa'yakx miipe'j.

¹⁸ Isath we'we', nyafxĩ piçtakxteya' ropa's peekĩ
jathe'g, sa' mtee u'j wěeçxawa u'jwe'g. Nawa ĩisx
yã'the', vxitesa' idxa's tudçxa jxũna u'jwetxna
idx u'j wěemeetewa.

19 Jesusa' txã'wẽ we'weçxa', Pedro ma'wẽ yũuni uuçxa Dxusa's äate kaavxya'ja'jwa'ja's pta'sxnak txã'jĩ.

Txajũ' Jesus we'weçxa':

—Adx yakh myuhçxáa jĩnak pi'kx.

Jesus yakh u'jusa wedxnisa

20 Pedro' yu'thegçxa' uyku Jesus wedxnisa's. Txãa wedxnisaái nmeħ kus ũ'weçte', Jesus pukate kaçxçxa u'pçxa' na'jĩnak pẽysa yu': Jxpe'jsa ¿kim idxa's dukhwa'jsana? jĩna.

21 Txã'sna Pedro uyçxa', na'jĩnak Jesusa's pẽjx:

—Jxpe'jsa, naa piçthẽ'ja's ¿kĩħ yuukx? jĩte',

22 Jesusa' na'wẽk pas:

—Adx jxthãaste' naa piçthẽ'ja' uumée u'juma'k adx sxawedna kĩhpkaçx, nawa txã'sa' idxa' yaakxwa'j ji'phmeeg. Idxa' adx yakh fxi'zewa'jçxá's miijajkx.

23 Jesus txã'wẽ we'wepa'ga, txãa piçthẽ'ja' uuwa'jsamée wáana sũhnatx ũsu' Jesus yakh u'jusawe'sx vxite yu'. Nawa uumeena jĩçxa Jesusa' txã'wẽ we'weme', naasáa adx jxthãaste', uumée u'juma'k adx sxawedna kĩhpkaçx, nawa idxa' txã'sa' yaakxwa'j ji'phmeeg jĩnaçxáak we'we.

24 Jesus we'weçxa' txã'wẽ uumeena jĩna we'wenisa piçthẽ'jĩçxáak pta'sxna fxi'j, aça' isasa yuja's we'we'k sũju'tha'w.

25 Txã'wẽ Jesus kĩjkĩhwa kaavxya'ja'jnıtx jxuka pta'sxna fxi'jwaça', naa kiwete libru yuuwa khẽemeetxna sũju'th.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

06da09f4-8d0f-5001-ae8c-0e6aa0131ffd